


欽定梁書

卷四十六之五十六





梁書卷四十六

唐 散 騎 常 侍 姚 思 廉 撰

列傳第四十

胡僧祐

徐文盛

杜勛

兄岸 弟幼安 兄子龜

陰子春

胡僧祐字願果南陽冠軍人少勇決有武幹仕魏至銀青光祿大夫以大通二年歸國頻上封事高祖器之拜假節超武將軍文德主帥使戍項城城陷復沒于魏中大通元年陳慶之送魏北海王元顥入洛陽僧祐又得還國除南天水天門二郡太守有善政性好讀書不解緝綴然每在公宴必彊賦詩文辭鄙俚多被譏謔僧祐怡然自若謂己實工矜伐愈甚晚事世祖為鎮西錄事參軍侯景亂西沮蠻反世祖令僧祐討之使盡誅其渠帥僧祐諫忤旨下獄大寶二年侯景寇京陝圍王僧辯於巴陵世祖乃引僧祐於獄拜為假節武猛將軍封新市縣侯令赴援僧祐將發謂其子曰汝可開兩門一門擬朱一門擬白吉則由朱門凶則由白門吾不捷不歸也世祖聞而壯之至楊浦景遣其將任約率銳卒五千據白塔遙以待之僧祐由別路西上約謂畏己而退急追之及於南安芋口呼僧祐曰吳兒何為不早降走何處去僧祐不與之言潛引却至赤砂亭會陸法和至乃與并軍擊約大破之擒約送于江陵侯景聞之遂遁世祖以僧

祐爲侍中領軍將軍徵還荊州承聖二年進爲車騎將軍開府儀同三司餘悉如故西魏寇至以僧祐爲都督城東諸軍事魏軍四面起攻百道齊舉僧祐親當矢石晝夜督戰獎勵將士明於賞罰衆皆感之咸爲致死所向摧殄賊莫敢前俄而中流矢卒時年六十三世祖聞之馳往臨哭於是內外惶駭城遂陷

徐文盛字道茂彭城人也世仕魏爲將父慶之天監初率千餘人自北歸款未至道卒文盛仍統其衆稍立功績高祖甚優寵之大同末以爲持節督寧州刺史先是州在僻遠所管羣蠻不識教義貪欲財賄劫篡相尋前後刺史莫能制文盛推心撫慰示以威德夷獠感之風俗遂改太清二年聞國難乃召募得數萬人來赴世祖嘉之以爲持節散騎常侍左衛將軍督梁南秦沙東益巴北巴六州諸軍事仁威將軍秦州刺史授以東討之略於是文盛督衆軍東下至武昌遇侯景將任約遂與相持久之世祖又命護軍將軍尹悅平東將軍杜幼安巴州刺史王珣等會之並授文盛節度擊任約於貝磯約大敗退保西陽文盛進據蘆洲又與相持侯景聞之乃率大衆西上援約至西陽文盛不敢戰諸將咸曰景水軍輕進又甚飢疲可因此擊之必大捷文盛不許文盛妻石氏先在建業至是景載以還之文盛深德景遂密通信使都無戰心衆咸憤怒杜幼安宋道等乃率所領獨進與景戰大破之獲其舟艦以歸會景密遣騎從間道襲陷鄆州軍中恟懼遂大潰文盛奔還荊州世祖仍以爲城北面都督又聚贓汚甚多世祖大怒下令責之

數其十罪除其官爵文盛既失兵權私懷怨望世祖聞之乃以下獄時任約被擒與文盛同禁文盛謂約曰汝何不早降令我至此約曰門外不見卿馬跡使我何遽得降文盛無以答遂死獄中

杜勗京兆杜陵人也其先自北歸南居於雍州之襄陽子孫因家焉祖靈啟齊給事中父懷寶少有志節常邀際會高祖義師東下隨南平王偉留鎮襄陽天監中稍立功績官至驍猛將軍梁州刺史大同初魏梁州刺史元羅舉州內附懷寶復進督華州值秦州所部武興氏王楊紹反懷寶擊破之五年卒於鎮勗卽懷寶第七子也幼有志氣居鄉里以膽勇稱釋褐廬江驃騎府中兵參軍世祖臨荊州仍參幕府後爲新興太守太清二年隨岳陽王來襲荊州世祖以與之有舊密邀之勗乃與兄弟幼安兄子龜等夜歸于世祖世祖以爲持節信威將軍武州刺史俄遷宣毅將軍領鎮護軍武陵內史枝江縣侯邑千戶令隨王僧辯東討侯景至巴陵會景來攻數十日不尅而遁加侍中左衛將軍進爵爲公增邑五百戶仍隨僧辯追景至石頭與賊相持橫嶺及戰景親率精銳左右衝突勗從嶺後橫截之景乃大敗東奔晉陵勗入據城景平加散騎常侍持節督江州諸軍事江州刺史增邑千戶是月齊將郭元建攻秦州刺史嚴超達於秦郡王僧辯令勗赴援陳霸先亦自歐陽來會與元建大戰於士林霸先令彊弩射元建衆却勗因縱兵擊大破之斬首萬餘級生擒千餘人元建收餘衆而遁時世祖執王琳於江陵其長史陸納等遂於

長沙反世祖徵勛與王僧辯討之承聖二年及納等戰於車輪大敗陷其二壘納等走保長沙勛等圍之
後納等降勛又與王僧辯西討武陵王於硤口至卽破平之於是旋鎮遵疾卒詔曰勛京兆舊姓元凱苗
裔家傳學業世載忠貞自驅傳江渚政號廉能推轂淺源實聞清靜奄致殞喪惻愴于懷可贈車騎將軍
加鼓吹一部諡曰武勛兄弟九人兄嵩岑崔及疑嶽岸及弟幼安並知名當世

岸字公衡少有武幹好從橫之術太清中與勛同歸世祖世祖以爲持節平北將軍北梁州刺史封江陵
縣侯邑一千戶岸因請襲襄陽世祖許之岸乃晝夜兼行先往攻其城不尅岳陽至遂走依其兄嶽於南
陽嶽時爲南陽太守岳陽尋遣攻陷其城岸及嶽俱遇害

幼安性至孝寬厚雄勇過人太清中與兄勛同歸世祖世祖以爲雲麾將軍西荊州刺史封華容縣侯邑
一千戶令與平南將軍王僧辯討河東王魯於長沙平之又命率精甲一萬助左衛將軍徐文盛東討侯
景至貝磯遇景將任約來逆遂與戰大敗之斬其儀同叱羅子通湘州刺史趙威方等傳首江陵乃進軍
大舉因與景相持別攻武昌拔之景渡蘆洲上流以壓文盛等幼安與衆軍攻之景大敗盡獲其舟艦會
景密遣襲郢州執刺史方諸等以歸人情大駭徐文盛由漢口遁歸衆軍大敗幼安遂降于景景殺之
以其多反覆故也

龔勳第二兄岑之子少驍勇善用兵亦太清中與諸父同歸世祖世祖以爲持節忠武將軍鄆州刺史廬縣侯邑一千戶與叔幼安俱隨王僧辯討河東王平之又隨僧辯下繼徐文盛軍至巴陵聞侯景襲陷郢州西上將至乃與僧辯等守巴陵以待之景至圍之數旬不尅而遁遷太府卿安北將軍督定州諸軍事定州刺史加通直散騎常侍增邑五百戶仍隨僧辯追景至江夏圍其城景將宋子仙棄城遁龔追至楊浦生擒之大寶三年衆軍至姑孰景將侯子鑒逆戰龔與陳霸先王琳等率精銳擊之大敗子鑒遂至于石頭景親率其黨會戰龔與衆軍奮擊大破景景遂東奔論功爲最授平東將軍東揚州刺史益封一千戶承聖二年又與王僧辯討陸納等於長沙降之又征武陵王於西陵亦平之後江陵陷齊納貞陽侯以紹梁嗣以龔爲震州刺史吳興太守又除鎮南將軍都督南豫州諸軍事南豫州刺史溧陽縣侯給鼓吹一部又加散騎常侍鎮東大將軍會陳霸先襲陷京師執王僧辯殺之龔僧辯之壻也爲吳興太守以霸先旣非貴素兵又猥雜在軍府日都不以霸先經心及爲本郡每以法繩其宗門無所縱捨霸先銜之切齒及僧辯敗龔乃據吳興以距之遣軍副杜泰攻陳潛於長城反爲潛所敗霸先乃遣將周文育討龔龔令從弟北叟出距又爲文育所破走義興霸先親率衆圍之會齊將柳達摩等襲京師霸先恐遂還與齊人連和龔聞齊兵還乃降遂遇害

陰子春字幼文武威姑臧人也晉義熙末曾祖襲隨宋高祖南遷至南平因家焉父智伯與高祖隣居少相友善嘗入高祖臥內見有異光成五色因握高祖手曰公後必大貴非人臣也天下方亂安蒼生者其在君乎高祖曰幸勿多言於是情好轉密高祖每有求索如外府焉及高祖踐阼官至梁秦二州刺史子春天監初起家宣惠將軍西陽太守普通中累遷至明威將軍南梁州刺史又遷信威將軍都督梁秦華三州諸軍事梁秦二州刺史太清二年討峽中叛蠻平之徵爲左衛將軍又遷侍中屬侯景亂世祖令子春隨領軍將軍王僧辯攻邵陵王於郢州平之又與左衛將軍徐文盛東討侯景至貝磯與景遇子春力戰恒冠諸軍頻敗景值郢州陷沒軍遂退敗大寶二年卒於江陵孫顯少知名釋褐奉朝請歷尙書金部郎後入周撰瓊林二十卷

史臣曰胡僧祐勇幹有聞擐旗破敵者數矣及捐軀殉節殞身王事雖古之忠烈何以加焉徐文盛始立功績不能終其成名爲不義也杜崱識機變之理知向背之宜加以身屢典軍抄寇逆勳庸顯著卒爲中興功臣義哉


梁書卷四十六考證

胡僧祐傳性好讀書不解緝綴○不解南史作愛

杜崱傳齊將郭元建攻秦州刺史嚴超遠於秦郡○遠南史作遠

兄嵩岑嶮巖嶽岸及弟幼安○南史作兄嵩岑嶮巖嶽岸及弟嶮幼安與此小異

梁書卷四十六考證



梁書卷四十七

唐 散 騎 常 侍 姚 思 廉 撰

列傳第四十一

孝行

滕曇恭 徐普濟宛陵女子

沈崇儀

荀匠

庾黔婁

吉翊

甄恬

韓懷明

劉曇淨

何炯

庾沙彌

江紉

劉霽

褚脩

謝蘭

經云夫孝德之本也此生民之為大有國之所先歟高祖創業開基飭躬化俗澆弊之風以革孝治之術斯著每發絲綸遠加旌表而淳和比屋罕要詭俗之譽潛晦成風俯列踰羣之迹彰於視聽蓋無幾焉今採綴以備遺逸云爾

滕曇恭豫章南昌人也年五歲母楊氏患熱思食寒瓜土俗所不產曇恭歷訪不能得銜悲哀切俄值一桑門問其故曇恭具以告桑門曰我有兩瓜分一相遺曇恭拜謝因捧瓜還以薦其母舉室驚異尋訪桑門莫知所在及父母卒曇恭水漿不入口者旬日感慟嘔血絕而復蘇隆冬不著重絮蔬食終身每至忌日思慕不自堪晝夜哀慟其門外有冬生樹二株時忽有神光自樹而起俄見佛像及夾侍之儀容光顯

著自門而入曇恭家人大小咸共禮拜久之乃滅遠近道俗咸傳之太守王僧度引曇恭爲功曹固辭不就王儉時隨僧度在郡號爲勝曾子天監元年陸璉奉使巡行風俗表言其狀曇恭有子三人皆有行業時有徐普濟者長沙臨湘人居喪未及葬而隣家火起延及其舍普濟號慟伏棺上以身蔽火隣人往救之焚炙已悶絕累日方蘇宣城宛陵有女子與母同床寢母爲猛虎所搏女號叫攀虎虎毛盡落行十數里虎乃棄之女抱母還猶有氣經時乃絕太守蕭琛賻焉表言其狀有詔旌其門閭

沈崇儻字思整吳興武康人也父懷明宋兗州刺史崇儻六歲丁父憂哭踊過禮及長備書以養母焉齊建武初起家爲奉朝請永元末遷司徒行參軍天監初爲前軍鄱陽王參軍事三年太守柳惲辟爲主簿崇儻從惲到郡還迎其母母卒崇儻以不及侍疾將欲致死水漿不入口晝夜號哭旬日殆將絕氣兄弟謂之曰殯葬未申遽自毀滅非全孝之道也崇儻之瘞所不避雨雪倚墳哀慟每夜恒有猛獸來望之有聲狀如歎息者家貧無以遷窆乃行乞經年始獲葬焉旣而廬于墓側自以初行喪禮不備復以葬後更治服三年久食麥屑不噉鹽酢坐臥於單薦因虛腫不能起郡縣舉其至孝高祖聞卽遣中書舍人慰勉之乃下詔曰前軍沈崇儻少有志行居喪踰禮齋制不終未得大葬自以行乞淹年哀典多闕方欲以承慕之晨更爲再葺之始雖卽情可矜禮有明斷可便令除釋擢補太子洗馬旌彼門閭敦茲風教崇儻奉

詔釋服而涕泣如居喪固辭不受官苦自陳讓經年乃得爲永寧令自以祿不及養悵恨愈甚哀思不自堪至縣卒時年三十九

荀匠字文師潁陰人晉太保勗九世孫也祖瓊年十五復父仇於成都市以孝聞宋元嘉末渡淮赴武陵王義爲元凶追兵所殺贈員外散騎侍郎父法超齊中興末爲安復令卒於官凶問至匠號慟氣絕身體皆冷至夜乃蘇旣而奔喪每宿江渚商旅皆不忍聞其哭聲服未闋兄斐起家爲鬱林太守征徼賊爲流矢所中死於陣喪還匠迎于豫章望舟投水傍人赴救僅而得全旣至家貧不得時葬居父憂并兄服歷四年不出廬戶自括髮後不復櫛沐髮皆禿落哭無時聲盡則係之以泣目眦皆爛形體枯槁皮骨裁連雖家人不復識郡縣以狀言高祖詔遣中書舍人爲其除服擢爲豫章王國左常侍匠雖卽吉毀頓逾甚外祖孫謙誠之曰主上以孝治天下汝行過古人故發明詔擢汝此職非唯君父之命難拒故亦揚名後世所顯豈獨汝身哉匠於是乃拜竟以毀卒於家時年二十一

庾黔婁字子貞新野人也父易司徒主簿徵不至有高名黔婁少好學多講誦孝經未嘗失色於人南陽高士劉虬宗測並歎異之起家本州主簿遷平西行參軍出爲編令治有異績先是縣境多虎暴黔婁至虎皆渡往臨沮界當時以爲仁化所感齊永元初除辱陵令到縣未旬易在家遺疾黔婁忽然心驚舉身

流汗卽日棄官歸家家人悉驚其忽至時易疾始二日醫云欲知差劇但嘗糞甜苦易泄痢黔婁輒取嘗之味轉甜滑心逾憂苦至夕每稽顙北辰求以身代俄聞空中有聲曰徵君壽命盡不復可延汝誠禱既至止得申至月末及晦而易亡黔婁居喪過禮廬于冢側和帝卽位將起之鎮軍蕭穎胄手書敦譬黔婁固辭服闋除西臺尙書儀曹郎梁臺建鄧元起爲益州刺史表黔婁爲府長史巴西梓潼二郡太守及成都平城中珍寶山積元起悉分與僚佐惟黔婁一無所取元起惡其異衆厲聲曰長史何獨爾爲黔婁示不違之請書數篋尋除蜀郡太守在職清素百姓便之元起死于蜀部曲皆散黔婁身營殯殮攜持喪柩歸鄉里還爲尙書金部郎遷中軍表記室參軍東宮建以本官侍皇太子讀甚見知重詔與太子中庶子殷鈞中舍人到洽國子博士明山賓等遞日爲太子講五經義遷散騎侍郎荊州大中正卒時年四十六吉玢字彥鸞馮翊蓮勺人也世居襄陽玢幼有孝性年十一遭所生母憂水漿不入口殆將滅性親黨異之天監初父爲吳興原鄉令爲姦吏所誣逮請廷尉玢年十五號泣衢路祈請公卿行人見者皆爲隕涕其父理雖清白恥爲吏訊乃虛自引咎罪當大辟玢乃搥登聞鼓乞代父命高祖異之敕廷尉卿蔡法度曰吉玢請死贖父義誠可嘉但其幼童未必自能造意卿可嚴加脅誘取其款實法度受敕還寺感陳微纒備列官司厲色問玢曰爾求代父死敕已相許便應伏法然刀鋸至劇審能死不且爾童孺志不及此

必爲人所教姓名是誰可具列答若有悔異亦相聽許玃對曰囚雖蒙弱豈不知死可畏憚顧諸弟稚藐唯囚爲長不忍見父極刑自延視息所以內斷胸臆上千萬乘今欲殉身不測委骨泉壤此非細故奈何受人教邪明詔聽代不異登仙豈有回貳法度知玃至心有在不可屈撓乃更和顏誘語之曰主上知尊侯無罪行當釋亮觀君神儀明秀足稱佳童今若轉辭幸父子同濟奚以此妙年苦求湯鑊玃對曰凡覬蠅蟻尙惜其生況在人斯豈願盡粉但囚父挂深劾必正刑書故思殞仆冀延父命今瞑目引領以聽大戮情殫意極無言復對玃初見囚獄掾依法備加桎梏法度矜之命脫其二械更令著一小者玃弗聽曰玃求代父死死罪之囚唯宜增益豈可減乎竟不脫械法度具以奏聞高祖乃宥其父丹陽尹王志求其在廷尉故事并請鄉居欲於歲首舉充純孝之選玃曰異哉王尹何量玃之薄乎夫父辱子死斯道固然若玃有覩面目當其此舉則是因父買名一何甚辱拒之而止年十七應辟爲本州主簿出監萬年縣攝官朞月風化大行自雍還至郢湘州刺史柳悅復召爲主簿後鄉人裴儉丹陽尹丞臧盾揚州中正張仄連名薦玃以爲孝行純至明通易老敕付太常旌舉初玃以父陷罪因成悖疾後因發而卒甄恬字彥約中山無極人也世居江陵祖欽之長靈令父擯之州從事情數歲喪父哀感有若成人家人矜其小以肉汁和飯飼之恬不肯食年八歲問其母恨生不識父遂悲泣累日忽若有見言其形貌則其

父也時以爲孝感家貧養母常得珍羞及居喪廬於墓側恒有烏玄黃雜色集於廬樹恬哭則鳴哭止則止又有白雀栖宿其廬州將始興王憺表其行狀詔曰朕虛己欽賢寤寐盈想詔彼羣岳務盡搜揚恬旣孝行殊異聲著邦壤敦風厲俗弘益茲多牧守騰聞義同親覽可旌表室閭加以爵位恬官至安南行參軍

韓懷明上黨人也客居荊州年十歲母患屍疰每發輒危殆懷明夜於星下稽顙祈禱時寒甚切忽聞香氣空中有人語曰童子母須臾永差無勞自苦未曉而母豁然平復鄉里異之十五喪父幾至滅性負土成墳贈助無所受免喪與鄉人郭曆俱師事南陽劉虬嘗一日廢講獨居涕泣懷明竊問其故虬家人荅云是外祖亡日時虬母亦亡矣懷明聞之卽日罷學還家就養虬歎曰韓生無虞丘之恨矣家貧常肆力以供甘脆嬉怡膝下朝夕不離母側母年九十一以壽終懷明水漿不入口一旬號哭不絕聲有雙白鳩巢其廬上字乳馴狎若家禽焉服釋乃去旣除喪蔬食終身衣衾無改天監初刺史始興王憺表言之州累辟不就卒于家

劉曇淨字元光彭城葛人也祖元真淮南太守居郡得罪父慧鏡歷詣朝士乞哀懇惻甚至遂以孝聞曇淨篤行有父風解褐安成王國左常侍父卒於郡曇淨奔喪不食飲者累日絕而又蘇每哭輒嘔血服闋

因毀瘠成疾會有詔士姓各舉四科曇淨叔父慧斐舉以應孝行高祖用爲海鹽令曇淨以兄未爲縣因以讓兄乃除安西行參軍父亡後事母尤瀟至身營殮粥不以委人母疾衣不解帶及母亡水漿不入口者殆一旬母喪權瘞藥王寺時天寒曇淨身衣單布廬於瘞所晝夜哭泣不絕聲哀感行路未及暮而卒何炯字士光廬江潛人也父擢太中大夫炯年十五從兄胤受業一暮並通五經章句炯白皙美容貌從兄求點每稱之曰叔寶神清弘治膚清今觀此子復見衛杜在目炯常慕恬退不樂進仕從叔昌寓謂曰求點皆已高蹈爾無宜復爾且君子出處亦各一途年十九解褐揚州主簿舉秀才累遷王府行參軍尙書兵庫部二曹郎出爲永康令以和理稱遷爲仁威南康王限內記室遷治書侍御史以父疾經旬衣不解帶頭不櫛沐信宿之間形貌頓改及父卒號慟不絕聲枕臼藉地腰虛脚腫竟以毀卒

庾沙彌穎陰人也晉司空冰六世孫父佩玉輔國長史長沙內史宋昇明中坐沈攸之事誅沙彌時始生年至五歲所生母爲製采衣輒不肯服母問其故流涕對曰家門禍酷用是何爲旣長終身布衣蔬食起家臨川王國左常侍遷中軍田曹行參軍嫡母劉氏寢疾沙彌晨昏侍側衣不解帶或應鍼灸輒以身先試之及母亡水漿不入口累日終喪不解衰絰不出廬戶晝夜號慟隣人不忍聞墓在新林因有旅松百餘株自生墳側族兄都官尙書詠表言其狀應純孝之舉高祖召見嘉之以補缺令遷除輕車邵陵王參

軍事隨府會稽復丁所生母憂喪還都濟浙江中流遇風舫將覆沒沙彌抱柩號哭俄而風靜蓋孝感所致服闋除信威刑獄參軍兼丹陽郡

缺二字

累遷寧遠錄事參軍轉司馬出爲長城令卒

江紉字含潔濟陽考城人也父禧光祿大夫紉幼有孝性年十三父患眼紉侍疾將期月衣不解帶夜夢一僧云患眼者飲慧眼水必差及覺說之莫能解者紉第三叔祿與草堂寺智者法師善往訪之智者曰無量壽經云慧眼見真能渡彼岸禧乃因智者敢捨同夏縣界牛屯里舍爲寺乞賜嘉名敕答云純臣孝子往往感應晉世顏含遂見冥中送藥近見智者知卿第二息感夢云飲慧眼水慧眼則是五眼之一號若欲造寺可以慧眼爲名及就創造泄故井井水清冽異於常泉依夢取水洗眼及煮藥稍覺有瘳因此遂差時人謂之孝感南康王爲南州召爲迎主簿紉性靜好老莊玄言尤善佛義不樂進仕及父卒紉廬于墓終日號慟不絕聲月餘卒

劉霽字士烜平原人也祖乘民宋冀州刺史父聞慰齊工員郎霽年九歲能誦左氏傳宗黨咸異之十四居父愛有至性每哭輒嘔血家貧與弟杏歆相篤勵學旣長博涉多通天監中起家奉朝請稍遷宣惠督安王府參軍兼限內記室出補西昌相入爲尙書主客侍郎末期除海鹽令霽前後宰二邑並以和理著稱還爲建康正非所好頃之以疾免尋除建康令不拜母明氏寢疾霽年已五十衣不解帶者七旬誦觀

世音經數至萬遍夜因感夢見一僧謂曰夫人算盡君精誠篤至當相爲申延後六十餘日乃亡霽廬于墓哀慟過禮常有雙白鶴馴翔廬側處士阮孝緒致書抑臂霽思慕不已服未終而卒時年五十二著釋俗語八卷文集十卷弟杳在文士傳歎在處士傳

褚脩吳郡錢塘人也父仲都善周易爲當時最天監中歷官五經博士脩少傳父業兼通孝經論語善尺牘頗解文章初爲湘東王國侍郎稍遷輕車湘東府行參軍並兼國子助教武陵王爲揚州引爲宣惠參軍限內記室修性至孝父喪毀瘠過禮因患冷氣及丁母憂水漿不入口二十三日氣絕復蘇每號慟嘔血遂以毀卒

謝蘭字希如陳郡陽夏人也晉太傅安八世孫父經中郎諮議參軍蘭五歲每父母未飯乳媪欲令蘭先飯蘭曰旣不覺飢彊食終不進舅阮孝緒聞之歎曰此兒在家則曾子之流事君則蘭生之匹因名之曰蘭稍受以經史過目便能諷誦孝緒每曰吾家陽元也及丁父憂晝夜號慟毀瘠骨立母阮氏常自守視臂抑之服闋後吏部尚書蕭子顯表其至行擢爲王府法曹行參軍累遷外兵記室參軍時甘露降士林館蘭獻頌高祖嘉之因有詔使製北兗州刺史蕭楷德政碑又奉令製宣城王奉述中庸頌太清元年遷散騎侍郎兼散騎常侍使於魏會侯景舉地入附境上交兵蘭母慮不得還感氣卒及蘭還入境爾夕夢

不祥且便投効馳歸既至號慟嘔血氣絕久之水漿不入口親友慮其不全相對悲慟彊勸以飲粥藺初
勉彊受之終不能進經月餘日因夜臨而卒時年三十八藺所製詩賦碑頌數十篇

史臣曰孔子稱毀不滅性教民無以死傷生也故制喪紀爲之節文高柴仲由伏膺聖教會參閔損虔恭
孝道或水漿不入口泣血終年豈不知創鉅痛深蓼莪慕切所謂先王制禮賢者俯就至如巨吳終於毀
滅若劉曇淨何炯江綰謝蘭者亦二子之志歟

梁書卷四十七考證

滕曇恭傳太守王僧度引曇恭爲功曹固辭不就王儉時隨僧度在郡號爲滕曾子○度南史作處臣人

龍按南齊書王儉爲叔父僧虔所養僧虔嘗爲豫章內史則南史是也

荀匠傳赴武陵王義爲元凶追兵所殺○義字上南史有舉字

聚書卷四十七考證

唐 散 騎 常 侍 姚 思 廉 機

列傳第四十二

儒林

伏曼容 何佟之 范縝 嚴植之 賀瑒子革 司馬筠 卞華 崔靈恩

孔奐 盧廣 沈峻太史叔明 孔子祛 皇侃

漢氏承秦燔書大弘儒訓太學生徒動以萬數郡國蠶舍悉皆充滿學於山澤者至或就為列肆其盛也如是漢末喪亂其道遂衰魏正始以後仍尚玄虛之學為儒者蓋寡時荀勗摯虞之徒雖刪定新禮改官職未能易俗移風自是中原橫濱衣冠殄盡江左草創日不暇給以迄于宋齊國學時或開置而勸課未博建之不及十年蓋取文具廢之多歷世祀其棄也忽諸鄉里莫或開館公卿罕通經術朝廷大儒獨學而弗肯養眾後生孤陋擁經而無所講習三德六藝其廢久矣高祖有天下深愍之詔求碩學治五禮定六律改斗麻正欒衡天監四年詔曰二漢登賢莫非經術服膺雅道名立行成魏晉浮蕩儒教淪歇風節罔樹抑此之由朕日昃罷朝思聞俊異收士得人實惟疇獎可置五經博士各一人廣開館宇招內後進

於是以平原明山賓吳興沈峻建平嚴植之會稽賀瑒補博士各主一館館有數百生給其餼廩其射策
通明者卽除爲吏十數月間懷經負笈者雲會京師又選遣學生如會稽雲門山受業於廬江何胤分遣
博士祭酒到州郡立學七年又詔曰建國君民立教爲首砥身礪行由乎經術朕肇基明命光宅區宇雖
耕耘雅業傍闢藝文而成器未廣志本猶闕非以鎔範貴遊納諸軌度思欲式敦讓齒自家刑國今聲訓
所漸戎夏同風宜大啟庠敦博延胄子務彼十倫弘此三德使陶鈞遠被微言載表於是皇太子皇子宗
室王侯始就業焉高祖親屈輿駕釋奠於先師先聖申之以謙語勞之以束帛濟濟焉洋洋焉大道之行
也如是其伏曼容何佟之范縝有舊名於世爲時儒者嚴植之賀瑒等首膺茲選今並綴爲儒林傳云
伏曼容字公儀平昌安丘人曾祖滔晉著作郎父胤之宋司空主簿曼容早孤與母兄客居南海少篤學
善老易獨儻好大言常云何晏疑易中九事以吾觀之晏了不學也故知平叔有所短聚徒教授以自業
爲驃騎行參軍宋明帝好周易集朝臣於清暑殿講詔曼容執經曼容素美風采帝恒以方嵇叔夜使吳
人陸探微畫叔夜像以賜之遷司徒參軍袁粲爲丹陽尹請爲江寧令入拜尙書外兵郎昇明末爲輔國
長史南海太守齊初爲通直散騎侍郎永明初爲太子率更令侍皇太子講衛將軍王儉深相交好令與
河內司馬憲吳郡陸澄共撰喪服義旣成又欲與之定禮樂會儉薨遷中書侍郎大司馬諮議參軍出爲

武昌太守建武中入拜中散大夫時明帝不重儒術曼容宅在瓦官寺東施高坐於聽事有賓客輒升高坐爲講說生徒常數十百人梁臺建以曼容舊儒召拜司馬出爲臨海太守天監元年卒官時年八十二爲周易毛詩喪服集解老莊論語義子暉在良吏傳

何佟之字士威廬江潯人豫州刺史惲六世孫也祖劬之宋員外散騎常侍父歆齊奉朝請佟之少好三禮師心獨學彊力專精手不輟卷讀禮論二百篇略皆上口時太尉王儉爲時儒宗雅相推重起家揚州從事仍爲聰明館學士頻遷司徒車騎參軍事尚書祠部郎齊建武中爲鎮北記室參軍侍皇太子講領丹陽邑中正時步兵校尉劉瓛徵士吳苞皆已卒京邑碩儒唯佟之而已佟之明習事數當時國家吉凶禮則皆取決焉名重於世歷步兵校尉國子博士尋遷驃騎諮議參軍轉司馬永元末京師兵亂佟之常集諸生講論孜孜不怠中興初拜驍騎將軍高祖踐阼尊重儒術以佟之爲尚書左丞是時百度草創佟之依禮定議多所裨益天監二年卒官年五十五高祖甚悼惜將贈之官故事左丞無贈官者特詔贈黃門侍郎儒者榮之所著文章禮義百許篇子朝隱朝梅

范縝字子真南鄉舞陰人也晉安北將軍汪六世孫祖瓛之中書郎父濛早卒縝少孤貧事母孝謹年未弱冠聞沛國劉瓛聚衆講說始往從之卓越不羣而勤學瓛甚奇之親爲之冠在瓛門下積年去來歸家

恒芒屨布衣徒行於路蹶門多車馬貴游縵在其門聊無恥愧既長博通經術尤精三禮性質直好危言高論不爲士友所安唯與外弟蕭琛善琛名曰辯每服縵簡詣起家齊靈巒主簿累遷尙書殿中郎承明年中與魏氏和親歲通聘好特簡才學之士以爲行人縵及從弟雲蕭琛琅邪顏幼明河東裴昭明相繼將命皆著名隣國于時竟陵王子良盛招賓客縵亦預焉建武中遷領軍長史出爲宜都太守母憂去職歸居于南州義軍至縵墨經來迎高祖與縵有西邸之舊見之甚悅及建康城平以縵爲晉安太守在郡清約資公祿而已視事四年徵爲尙書左丞縵去選雖親戚無所遺唯餉前尙書令王亮縵仕齊時與亮同臺爲郎舊相友至是亮被擯棄在家縵自迎王師志在權軸旣而所懷未滿亦常怏怏故私相親結以矯時云後竟坐亮徙廣州語在亮傳初縵在齊世嘗侍竟陵王子良子良精信釋教而縵盛稱無佛子夏問曰君不信因果世間何得有富貴何得有貧賤縵荅曰人之生譬如一樹花同發一枝俱開一帶隨風而墮自有拂簾幌墜於茵席之上自有關籬牆落於溷糞之側墜茵席者殿下是也落糞溷者下官是也貴賤雖復殊途因果竟在何處子良不能屈深怪之縵退論其理著神滅論曰或問予云神滅何以知其滅也荅曰神卽形也形卽神也是以形存則神存形謝則神滅也問曰形者無知之稱神者有知之名知與無知卽事有異神之與形理不容一形神相卽非所聞也荅曰形者神之質神者形之用是則形稱

其質神言其用形之與神不得相異也問曰神故非用不得爲異其義安在荅曰名殊而體一也問曰名既已殊體何得一荅曰神之於質猶利之於刀形之於用猶刀之於利利之名非刀也刀之名非利也然而捨利無刀捨刀無利未聞刀沒而利存豈容形亡而神在問曰刀之與利或如來說形之與神其義不然何以言之木之質無知也人之質有知也人既有如木之質而有異木之知豈非木有一人有二邪荅曰異哉言乎人若有如木之質以爲形又有異木之知以爲神則可如來論也今人之質質有知也木之質質無知也人之質非木質也木之質非人質也安有如木之質而復有異木之知哉問曰人之質所以異木質者以其有知耳人而無知與木何異荅曰人無無知之質猶木無有知之形問曰死者之形骸豈非無知之質邪荅曰是無人質問曰若然者人果有如木之質而有異木之知矣荅曰死者如木而無異木之知生者有異木之知而無如木之質也問曰死者之骨骼非生之形骸邪荅曰生形之非死形死形之非生形區已革矣安有生人之形骸而有死人之骨骼哉問曰若生者之形骸非死者之骨骼非死者之骨骼則應不由生者之形骸不由生者之形骸則此骨骼從何而至此邪荅曰是生者之形骸變爲死者之骨骼也問曰生者之形骸雖變爲死者之骨骼豈不從生而有死則知死體猶生體也荅曰如因榮木變爲枯木枯木之質實是榮木之體問曰榮體變爲枯體枯體卽是榮體絲體變爲縷體縷體卽是絲

體有何別焉荅曰若枯卽是榮榮卽是枯應榮時凋零枯時結實也又榮木不應變爲枯木以榮卽枯無所復變也榮枯是一何不先枯後榮要先榮後枯何也綵縷之義亦同此破問曰生形之謝便應豁然都盡何故方愛死形綿歷未已邪荅曰生滅之體要有其次故也夫歛而生者必歛而滅漸而生者必漸而滅歛而生者飄驟是也漸而生者動植是也有歛有漸物之理也問曰形卽是神者手等亦是邪荅曰皆是神之分也問曰若皆是神之分神旣能慮手等亦應能慮也荅曰手等亦應能有痛癢之知而無是非之慮問曰慮爲一爲異荅曰知卽是慮茂則爲知深則爲慮問曰若爾應有二乎荅曰人體惟一神何得二問曰若不得二安有痛癢之知復有是非之慮荅曰如手足雖異總爲一人是非痛癢雖復有異亦總爲一神矣問曰是非之慮不關手足當關何處荅曰是非之意心器所主問曰心器是五藏之心非邪荅曰是也問曰五藏有何殊別而心獨有是非之慮乎荅曰七竅亦復何殊而司用不均問曰慮思無方向以知是心器所主荅曰五藏各有所司無有能慮者是以心爲慮本問曰何不寄在眼等分中荅曰若慮可寄於眼分何故不寄於耳分邪問曰慮體無本故可寄之於眼分眼目有本不假寄於他分也荅曰眼何故有本而慮無本苟無本於我形而可徧寄於異地亦可張甲之情寄王乙之軀李丙之性託趙丁之體然乎哉不然也問曰聖人形猶凡人之形而有凡聖之殊故知形神異矣荅曰不然金之精者能昭穢

者不能昭有能昭之精金寧有不昭之穢質又豈有聖人之神而寄凡人之器亦無凡人之神而託聖人之體是以八采重瞳助華之容龍顏馬口軒皞之狀形表之異也比干之心七竅列角伯約之膽其大若拳此心器之殊也是知聖人定分每絕常區非惟道革羣生乃亦形超萬有凡聖均體所未敢安問曰子云聖人之形必異於凡者敢問陽貨類仲尼項籍似大舜舜項孔陽智革形同其故何邪荅曰珉似玉而非玉雞類鳳而非鳳物誠有之人故宜爾項陽貌似而非實似心器不均雖貌無益問曰凡聖之殊形器不一可也員極理無有二而巳且殊姿湯文異狀神不侔色於此益明矣荅曰聖同於心器形不必同也猶馬殊毛而齊逸玉異色而均美是以晉棘荆和等價連城騅驪俱致千里問曰形神不二既聞之矣形謝神滅理固宜然敢問經云爲之宗廟以鬼饗之何謂也荅曰聖人之教然也所以弭孝子之心而厲偷薄之意神而明之此之謂矣問曰伯有被甲彭生豕見墳素著其事寧是設教而已邪荅曰妖怪茫茫或存或亡疆死者衆不皆爲鬼彭生伯有何獨能然乍爲人豕未必齊鄭之公子也問曰易稱故知鬼神之情狀與天地相似而不違又曰載鬼一車其義云何荅曰有禽焉有獸焉飛走之別也有人焉有鬼焉幽明之別也人滅而爲鬼鬼滅而爲人則未之知也問曰知此神滅有何利用邪荅曰浮屠害政桑門蠹俗風驚霧起馳蕩不休吾哀其弊思拯其溺夫竭財以赴僧破產以趨佛而不恤親戚不憐窮匱者何

良由厚我之情深濟物之意淺是以圭撮涉於貧友恣情動於顏色千鍾委於富僧歡意暢於容髮豈不以僧有多稔之期友無遺秉之報務施闕於周急歸德必於在己又惑以茫昧之言懼以阿鼻之苦誘以虛誕之辭欣以兜率之樂故捨逢掖橫衣廢俎豆列餅鉢家棄其親愛人人絕其嗣續致使兵挫於行間吏空於官府粟罄於惰遊貨殫於泥木所以姦宄弗勝頌聲尙擁惟此之故其流莫已其病無限若陶甄稟於自然森羅均於獨化忽焉自有悅爾而無來也不禦去也不追乘夫天理各安其性小人甘其壘畝君子保其恬素耕而食食不可窮也蠶而衣衣不可盡也下有餘以奉其上上無爲以待其下可以全生可以匡國可以霸君用此道也此論出朝野誼譁子良集僧難之而不能屈纈在南累年追還京既至以爲中書郎國子博士卒官文集十卷子胥字長才傳父學起家太學博士胥有口辯大同中常兼主客郎對接北使遷平西湘東王諮議參軍侍宣城王讀出爲鄱陽內史卒於郡

嚴植之字孝源建平秭歸人也祖欽宋通直散騎常侍植之少善莊老能玄言精解喪服孝經論語及長徧治鄭氏禮周易毛詩左氏春秋性淳孝謹厚不以所長高人少遭父憂因菜食二十三載後得風冷疾乃止齊永明中始起家爲廬陵王國侍郎遷廣漢王國右常侍王誅國人莫敢視植之獨奔哭手營殯殮從跣送其墓所爲起家葬畢乃還當時議之建武中遷員外郎散騎常侍尋爲康樂侯相在縣清白民吏

稱之天監二年板後軍騎兵參軍事高祖詔求通儒治五禮有司奏植之治凶禮四年初置五經博士各開館教授以植之兼五經博士植之館在潮溝生徒常百數植之講五館生必至聽者千餘人六年遷中撫軍記室參軍猶兼博士七年卒於館時年五十二植之自疾後便不受廩俸妻子困乏既卒喪無所寄生徒爲市宅乃得成喪焉植之性仁慈好陰德雖在閭室未嘗怠也少嘗山行見一患者植之問其姓名不能荅載與俱歸爲營醫藥六日而死植之爲棺殮殯之卒不知何許人也嘗緣柵塘行見患人臥塘側植之下車問其故云姓黃氏家本荊州爲人傭賃疾既危篤船主將發棄之于岸植之心惻然載還治之經年而黃氏差請終身充奴僕以報厚恩植之不受遣以資糧遣之其義行多如此撰凶禮儀注四百七十九卷

賀瑒字德璉會稽山陰人也祖道力善三禮仕宋爲尚書三公郎建康令瑒少傳家業齊時沛國劉瓛爲會稽府丞見瑒深器異之嘗與俱造吳郡張融指瑒謂融曰此生神明聰敏將來當爲儒者宗瓛還薦之爲國子生舉明經揚州祭酒俄兼國子助教歷奉朝請太學博士太常丞遭母憂去職天監初復爲太常丞有司舉治賓禮召見說禮義高祖異之詔朝朔望預華林講四年初開五館以瑒兼五經博士別詔爲皇太子定禮撰五經義瑒悉禮舊事時高祖方創定禮樂瑒所建議多見施行七年拜步兵校尉領五經

博士九年遇疾遣醫藥省間卒于館時年五十九所著禮易老莊講疏朝廷博議數百篇賓禮儀注一百四十五卷場於禮尤精館中生徒常百數弟子明經對策至數十人二子革字文明少通三禮及長徧治孝經論語毛詩左傳起家晉安王國侍郎兼太學博士侍湘東王讀敕於永福省爲邵陵湘東武陵三王講禮稍遷湘東王府行參軍轉尚書儀曹郎尋除秣陵令遷國子博士於學講授生徒常數百人出爲西中郎湘東王諮議參軍帶江陵令王初於府置學以革領儒林祭酒講三禮荆楚衣冠聽者甚衆前後再監南平郡爲民吏所德尋加貞威將軍兼平西長史南郡太守革性至孝常恨食祿代耕不及養在荊州歷爲郡縣所得俸秩不及妻孥專擬還鄉造寺以申感恩大同六年卒官時年六十二弟季亦明三禮歷官尚書祠部郎兼中書通事舍人累遷步兵校尉中書黃門郎兼著作

司馬筠字貞素河內温人晉驃騎將軍譙烈王承七世孫祖亮宋司空從事中郎父端齊奉朝請筠孤貧好學師事沛國劉瓛彊力專精深爲瓛所器異旣長博通經術尤明三禮齊建武中起家奉朝請遷王府行參軍天監初爲本州治中除暨陽令有清績入拜尚書祠部郎七年安成太妃陳氏薨江州刺史安成王秀荊州刺史始興王憺並以慈母表解職詔不許還攝本任而太妃在都喪祭無主舍人周捨議曰賀彥先稱慈母之子不服慈母之黨婦又不從夫而服慈姑小功服無從故也庾蔚之云非徒子不從母而

服其黻孫又不從父而服其慈由斯而言慈祖母無服明矣尋門內之哀不容自同於常接父之祥禪子並受弔今二王諸子宜以成服日單衣一日爲位受弔制曰二王在遠諸子宜攝祭事捨又曰禮云編冠玄武子姓之冠則世子衣服宜異於常可著細布衣絹爲領帶三年不聽樂又禮及春秋庶母不世祭蓋謂無王命者耳吳太妃既朝命所加得用安成禮秩則當祔廟五世親盡乃毀陳太妃命數之重雖則不異慈孫既不從服廟食理無傳祀子祭孫止是會經文高祖因是敕禮官議皇子慈母之服篤議宋朝五服制皇子服訓養母禮依庶母慈已宜從小功之制按曾子問曰子游曰喪慈母禮歟孔子曰非禮也古者男子外有傳內有慈母君命所使教子也何服之有鄭玄注云此指謂國君之子也若國君之子不服則王者之子不服可知又喪服經云君子子爲庶母慈已者傳曰君子子者貴人子也鄭玄引內則三母止施於卿大夫以此而推則慈母之服上不在五等之嗣下不逮三士之息儻其服者止卿大夫尋諸侯之子尚無此服況乃施之皇子謂宜依禮刊除以反前代之感高祖以爲不然曰禮言慈母凡有三條一則妾子之無母使妾之無子者養之命爲母子服以三年喪服齊衰章所言慈母是也二則嫡妻之子無母使妾養之慈撫隆至雖均乎慈愛但嫡妻之子妾無爲母之義而恩深事重故服以小功喪服小功章所以不直言慈母而云庶母慈已者明異於三年之慈母也其三則子非無母正是擇賤者視之義同師

保而不無慈愛故亦有慈母之名師保既無其服則此慈亦無服矣內則云擇於諸母與可者使爲子師其次爲慈母其次爲保母此其明文此言擇諸母是擇人而爲此三母非謂擇取兄弟之母也何以知之若是兄弟之母其先有子者則是長妾長妾之禮實有殊如何容次妾生子乃退成保母斯不可也又有多兄弟之人於義或可若始生之子便應三母俱闕邪由是推之內則所言諸母是謂三母非兄弟之母明矣子游所問自是師保之慈非三年小功之慈也故夫子得有此對豈非師保之慈母無服之證乎鄭玄不辯三慈混爲訓釋引彼無服以注慈已後人致謬實此之由經言君子子者此雖起於大夫明大夫猶爾自斯以上彌應不異故傳云君子子者貴人之子也總言曰貴則無所不包經傳互文交相顯發則知慈加之義通乎大夫以上矣宋代此科不乖禮意便加除削良是所疑於是筠等請依制改定嫡妻之子以沒爲父妾所養服之五月貴賤並同以爲承制累遷王府諮議權知左丞事尋除尙書左丞出爲始興內史卒官子壽傳父業明三禮大同中歷官尙書祠部郎出爲曲阿令

卞華字昭丘濟陰宛句人也晉驃騎將軍忠貞公靈六世孫父倫之給事中華幼孤貧好學年十四召補國子生通周易既長徧治五經與平原明山賓會稽賀場同業友善起家齊豫章王國侍郎累遷奉朝請征西行參軍天監初遷臨川王參軍事兼國子助教轉安成王功曹參軍兼五經博士聚徒教授華博涉

有林堯勳紹析理爲當時之冠江左以來鍾律絕學至堯乃通焉遷尙書儀曹郎出爲吳令卒

崔靈恩清河武城人也少篤學從師徧通五經尤精三禮三傳先在北仕爲太常博士天監十三年歸國高祖以其儒術擢拜員外散騎侍郎累遷步兵校尉兼國子博士靈恩聚徒講授聽者常數百人性拙朴無風采及解經析理甚有精致京師舊儒咸稱重之助教孔奐尤好其學靈恩先習左傳服解不爲江東所行及改說杜義每文句常申服以難杜遂著左氏條義以明之時有助教虞僧誕又精杜學因作杜難服以報靈恩世並行焉僧誕會稽餘姚人以左氏教授聽者亦數百人其該通義例當時莫及先是儒者論天互執渾蓋二義論蓋不合於渾論渾不合於蓋靈恩立義以渾蓋爲一焉出爲長沙內史遷除國子博士講衆尤盛出爲明威將軍桂州刺史卒官靈恩集注毛詩二十二卷集注周禮四十卷制三禮義宗四十七卷左氏經傳義二十二卷左氏條例十卷公羊穀梁文句義十卷

孔奐會稽山陰人少師事何胤通五經尤明三禮孝經論語講說並數十徧生徒亦數百人歷官國子助教三爲五經博士遷尙書祠部郎出爲海鹽山陰二縣令奐儒者不長政術在縣無績太清亂卒于家子俶玄頗涉文學官至太學博士奐兄子元素又善三禮有盛名早卒

盧廣范陽涿人自云晉司空從事中郎諶之後也諶沒死冉閔之亂晉中原舊族諶有後焉廣少明經有

儒術天監中歸國初拜員外散騎侍郎出爲始安太守坐事免頃之起爲折衝將軍配千兵北伐還拜步兵校尉兼國子博士徧講五經時北來人儒學者有崔靈恩孫詳蔣顯並聚徒講說而音辭鄙拙惟廣言論清雅不類北人僕射徐勉兼通經術深相賞好尋遷員外散騎常侍博士如故出爲信武桂陽嗣王長史尋陽太守又爲武陵王長史太守如故卒官

沈峻字士嵩吳興武康人家世農夫至峻好學與舅太史叔明師事宗人沈麟士門下積年晝夜自課時或睡寐輒以杖自擊其篤志如此麟士卒後乃出都徧遊講肆遂博通五經尤長三禮初爲王國中尉稍遷侍郎並兼國子助教時吏部郎陸倕與僕射徐勉書薦峻曰五經博士庾季遠須換計公家必欲詳擇其人凡聖賢可講之書必以周官立義則周官一書實爲羣經源本此學不傳多歷年世北人孫詳蔣顯亦經聽習而音革楚夏故學徒不至惟助教沈峻特精此書比日時開講肆羣儒劉岳沈宏沈熊之徒並執經下坐北面受業莫不歎服人無間言第謂宜卽用此人命其專此一學周而復始使聖人正典廢而更興累世絕業傳於學者勉從之奏峻兼五經博士於館講授聽者常數百人出爲華容令遷除員外散騎侍郎復兼五經博士時中書舍人賀琛奉敕撰梁官乃啟峻及孔子祛補西省學士助撰錄書成入兼中書通事舍人出爲武康令卒官子文阿傳父業尤明左氏傳太清中自國子助教爲五經博士傳峻業

者又有吳郡張及會稽孔子雲官皆至五經博士尚書祠部郎太史叔明吳興烏程人吳太史慈後也少善莊老兼治孝經禮記其三玄尤精解當世冠絕每講說聽者常五百餘人歷官國子助教邵陵王綸好其學及出爲江州攜叔明之鎮王遷鄧州又隨府所至輒講授江外人士皆傳其學焉大同十三年卒時年七十三

孔子祛會稽山陰人少孤貧好學耕耘樵採常懷書自隨投閑則誦讀勤苦自勵遂通經術尤明古文尙書初爲長沙嗣王侍郎兼國子助教講尙書四十徧聽者常數百人中書舍人賀琛受敕撰梁官啟子祛爲西省學士助撰錄書成兼司文侍郎不就久之兼主客郎舍人學士如故累遷湘東王國侍郎常侍員外散騎侍郎又雲磨廬江公記室參軍轉兼中書通事舍人尋遷步兵校尉舍人如故高祖撰五經講疏及孔子正言專使子祛檢閱羣書以爲義證事竟敕子祛與右衛朱昇左丞賀琛於士林館遞日執經累遷通直正員郎舍人如故中大同元年卒官時年五十一子祛凡著尙書義二十卷集注尙書三十卷續朱昇集注周易一百卷續何承天集禮論一百五十卷

皇侃吳郡人青州刺史皇象九世孫也侃少好學師事賀瑒精力專門盡通其業尤明三禮孝經論語起家兼國子助教於學講說聽者數百人撰禮記講疏五十卷書成奏上詔付祕閣頃之召入壽光殿講禮

記義高祖善之拜員外散騎侍郎兼助教如故性至孝常日限誦孝經二十遍以擬觀世音經丁母憂解職還鄉里平西邵陵王欽其學厚禮迎之偏既至因感心疾大同十一年卒於夏首時年五十八所撰論語義十卷與禮記義並見重於世學者傳焉

陳吏部尚書姚察曰昔叔孫通講論馬上桓榮精力凶荒既逢平定自致光寵若夫崔伏何巖互有焉曼容佟之講道於齊季不爲時改賀瑒嚴植之之徒遭梁之崇儒重道咸至高官稽古之力諸子各盡之矣范縝墨經傲倖不遂其志宜哉

梁書卷四十八考證

賀瑒傳常恨貪祿代耕不及養○貪南史作貪應從之

司馬筠傳喪服齊衰章所言慈母是也○慈母下南史有如母二字

羅靈恩傳制三禮義宗四十七卷○四十七南史作三十

孔子祛傳常懷書自隨投閒則誦讀○投南史作役

梁書卷四十八考證

唐 散 騎 常 侍 姚 思 廉 撰

列傳第四十三

文學上

到沈 丘遲 劉苞 袁峻 庾於陵 弟肩吾 劉昭 何遜 鍾嶸

周興嗣 吳均

昔司馬遷班固書並為司馬相如傳相如不預漢廷大事蓋取其文章尤著也固又為賈鄒枚路傳亦取其能文傳為范氏後漢書有文苑傳所載之人其詳已甚然經禮樂而緯國家通古今而述美惡非文莫可也是以君臨天下者莫不敦悅其義縉紳之學咸貴尚其道古往今來未之能易高祖聰明文思光宅區寓旁求儒雅詔採異人文章之盛煥乎俱集每所御幸輒命羣臣賦詩其文善者賜以金帛詣闕庭而獻賦頌者或引見焉其在位者則沈約江淹任昉並以文采妙絕當時至若彭城到沈吳興丘遲東海王僧孺吳郡張率等或入直文德通讎壽光皆後來之選也約淹昉僧孺率別以功迹論今綴到沈等文兼學者至太清中人為文學傳云

到沆字茂瀼彭城武原人也曾祖彥之宋將軍父攜齊五兵尙書沆幼聰敏五歲時攜於屏風抄古詩沆請教讀一遍便能諷誦無所遺失既長勤學善屬文工篆隸美風神容止可悅齊建武中起家後軍法曹參軍天監初遷征虜主簿高祖初臨天下收拔賢俊甚愛其才東宮建以爲太子洗馬時文德殿置學士省召高才碩學者待詔其中使校定墳史詔沆通籍焉時高祖譙華光殿命羣臣賦詩獨詔沆爲二百字二刻使成沆於坐立奏其文甚美俄以洗馬管東宮書記散騎省優策文三年詔尙書郎在職清能或人才高妙者爲侍郎以沆爲殿中曹侍郎沆從父兄漑洽並有才名時皆相代爲殿中當世榮之四年遷太子中舍人沆爲人不自伐不論人長短樂安任昉南鄉范雲皆友善其年遷丹陽尹丞以疾不能處職事遷北中郎諮議參軍五年卒官年三十高祖甚傷惜焉詔賜錢二萬布三十疋所著詩賦百餘篇

巨遲字希範吳興烏程人也父靈鞠有才名仕齊官至太中大夫遲八歲便屬文靈鞠常謂氣骨似我黃門郎謝超宗徵士何點並見而異之及長州辟從事舉秀才除太學博士遷大司馬行參軍遭父憂去職服闋除西中郎參軍累遷殿中郎以母憂去職服除復爲殿中郎遷車騎錄事參軍高祖平京邑霸府開引爲驃騎主簿甚被禮遇時勸進梁王及殊禮皆遲文也高祖踐阼拜散騎侍郎俄遷中書侍郎領吳興邑中正待詔文德殿時高祖著連珠詔羣臣繼作者數十人遲文最美天監三年出爲永嘉太守在郡不

稱職爲有司所糾高祖愛其才寢其奏四年中軍將軍臨川王宏北伐遲爲諮議參軍領記室時陳伯之在北與魏軍來距遲以書喻之伯之遂降還拜中書郎遷司徒從事中郎七年卒官時年四十五所著詩賦行於世

劉苞字孝嘗彭城人也祖勛宋司空父愷齊太子中庶子苞四歲而父終及年六七歲見諸父常泣時伯叔父俊繪等並顯貴苞母謂其畏憚怒之苞對曰早孤不及有識聞諸父多相似故心中欲悲無有佻意因而歔歔母亦慟甚初苞父母及兩兄相繼亡沒悉假瘞焉苞年十六始移墓所經營改葬不資諸父未幾皆畢繪常歎服之少好學能屬文起家爲司徒法曹行參軍不就天監初以臨川王妃弟故自征虜主簿仍遷王中軍功曹累遷尙書庫部侍郎丹陽尹丞太子太傅丞尙書殿中侍郎南徐州治中以公事免久之爲太子洗馬掌書記侍講壽光殿自高祖卽位引後進文學之士苞及從兄孝綽從弟孺同郡到漑漑弟洽從弟沆吳郡陸倕張率並以文藻見知多預讌坐雖仕進有前後其賞賜不殊天監十年卒時年三十臨終呼友人南陽劉之遴託以喪事務從儉率苞居官有能名性和而直與人交面折其非退稱其美情無所隱士友咸以此歎惜之

袁峻字孝高陳郡陽夏人魏郎中令渙之八世孫也峻早孤篤志好學家貧無書每從人假借必皆抄寫

自課日五十紙紙數不登則不休息訥言語工文辭義師剋京邑鄱陽王恢東鎮破岡峻隨王知管記事
天監初鄱陽國建以峻爲侍郎從鎮京口王遷鄆州兼都曹參軍高祖雅好辭賦時獻文於南闕者相望
焉其藻麗可觀或見賞擢六年峻乃擬揚雄官箴奏之高祖嘉焉賜束帛除員外散騎侍郎直文德學士
省抄史記漢書各爲二十卷又奉敕與陸倕各製新闕銘辭多不載

庾於陵字子介散騎常侍黔婁之弟也七歲能言立理既長清警博學有才思齊隨王子隆爲荊州召爲
主簿使與謝朓宗夬抄撰羣書子隆爲送故主簿子隆尋爲明帝所害僚吏畏避莫有至者唯

於陵與夬獨留經理喪事始安王遙撫軍引爲行參軍兼記室永元末除東陽遂安令爲民吏所稱

天監初爲建康獄平遷尙書工部郎待詔文德殿出爲湘州別駕遷驃騎錄事參軍兼中書通事舍人俄
領南郡邑中正拜太子洗馬舍人如故舊事東宮官屬通爲清選洗馬掌文翰尤其清者近世用人皆取
甲族有才望時於陵與周捨並擢充職高祖曰官以人而清豈限以甲族時論以爲美俄遷散騎侍郎改
領荊州大中正累遷中書黃門侍郎舍人中正並如故出爲宣毅晉安王長史廣陵太守行府州事以公
事免復起爲通直郎尋除鴻臚卿復領荊州大中正卒官時年四十八文集十卷弟肩吾

肩吾字子慎八歲能賦詩特爲兄於陵所友愛初爲晉安王國常侍仍遷王宣惠府行參軍自是每王徙

鎮肩吾常隨府歷王府中郎雲麾參軍並兼記室參軍中大通三年王爲皇太子兼東宮通事舍人除安西湘東王錄事參軍俄以本官領荊州大中正累遷中錄事諮議參軍太子率更令中庶子初太宗在藩雅好文章士時肩吾與東海徐摛吳郡陸杲彭城劉遵劉孝儀儀弟孝威同被賞接及居東宮又開文德省置學士肩吾子信摛子陵吳郡張長公北地傅弘東海鮑至等充其選齊永明中文士王融謝朓沈約文章始用四聲以爲親變至是轉拘聲韻彌尙麗靡復踰於往時時太子與湘東王書論之曰吾輩亦無所遊賞止事披閱性旣好文時復短詠雖是庸音不能闕筆有慙伎癢更同故態比見京師文體懦鈍殊常競學浮疎爭爲闡緩玄冬修夜思所不得旣殊比興正背風騷若夫六典三禮所施則有地吉凶嘉賓用之則有所未聞吟詠情性反擬內則之篇操筆寫志更摹酒誥之作遲遲春日翻學歸藏湛湛江水遂同大傳吾旣拙於爲文不敢輕有掎摭但以當世之作歷方古之才子遠則楊馬曹王近則潘陸顏謝而觀其遣辭用心了不相似若以今文爲是則古文爲非若昔賢可稱則今體宜棄俱爲盍各則未之敢許又時有效謝康樂裴鴻臚文者亦頗有感焉何者謝客吐言天拔出於自然時有不拘是其糟粕裴氏乃是夏史之才了無篇什之美是爲學謝則不屆其精華但得其冗長師裴則蔑絕其所長惟得其所短謝故巧不可階裴亦質不宜慕故胸馳臆斷之侶好名忘實之類方分肉於仁獸逞卻克於邯鄲入鮑忘吳

效尤致禍決羽謝生豈三千之可及伏膺裴氏懼兩唐之不傳故玉徽金銑反爲拙目所噴巴人下里更合郢中之聽陽春高而不和妙聲絕而不尋竟不精討錙銖覈量文質有異巧心終愧妍手是以握瑜懷玉之士瞻鄭邦而知退章甫翠履之人望閩鄉而歎息詩旣若此筆又如之徒以煙墨不言受其驅染紙札無情任其搖蕩甚矣哉文之橫流一至於此至如近世謝朓沈約之詩任昉陸倕之筆斯實文章之冠冕述作之楷模張士簡之賦周升逸之辯亦成佳手難可復遇文章未墜必有英絕領袖之者非弟而誰每欲論之無可與語思言子建一共商推辯茲清濁使如涇渭論茲月旦類彼汝南朱丹旣定雌黃有別使夫懷鼠知慙濫竽自恥譬斯袁紹畏子將同彼盜牛遙羞王烈相思不見我勞如何太清中侯景寇陷京都及太宗卽位以肩吾爲度支尙書時上流諸蕃並據州拒景矯詔遣肩吾使江州喻當陽公大心大心尋舉州降賊肩吾因逃入建昌界久之方得赴江陵未幾卒文集行於世

劉昭字宣卿平原高唐人晉太尉寔九世孫也祖伯龍居父憂以孝聞宋武帝敕皇太子諸王並往弔慰官至少府卿父彪齊征虜晉安王記室昭幼清警七歲通老莊義旣長勤學善屬文外兄江淹早相稱賞天監初起家奉朝請累遷征北行參軍尙書倉部郎尋除無錫令歷爲宣惠豫章王中軍臨川記室初昭伯父彪集衆家晉書注千寶晉紀爲四十卷至昭又集後漢同異以注范曄書世稱博悉遷通直郎出爲

刻令卒官集注後漢一百八十卷幼童傳十卷文集十卷子緡字言明亦好學通三禮大同中爲尙書祠
部郎尋去職不復仕緡弟緩字含度少知名歷官安西湘東王記室時西府盛集文學緩居其首除通直
郎俄遷鎮南湘東王中錄事復隨府江州卒

何遜字仲言東海剡人也曾祖承天宋御史中丞祖翼員外郎父詢齊太尉中兵參軍遜八歲能賦詩弱
冠州舉秀才南鄉范雲見其對策大相稱賞因結忘年交好自是一文一詠雲輒嗟賞謂所親曰頃觀文
人質則過儒麗則傷俗其能含清濁中今古見之何生矣沈約亦愛其文嘗謂遜曰吾每讀卿詩一日三
復猶不能已其爲名流所稱如此天監中起家奉朝請遷中衛建安王水曹行參軍兼記室王愛文學之
士日與遊宴及遷江州遜猶掌書記還爲安西安成王參軍事兼尙書水部郎母憂去職服闋除仁威廬
陵王記室復隨府江州未幾卒東海王僧孺集其文爲八卷初遜文章與劉孝綽並見重於世世謂之何
劉世祖著論論之云詩多而能者沈約少而能者謝朓何遜時有會稽虞騫工爲五言詩名與遜相埒官
至王國侍郎其後又有會稽孔翁歸濟陽江避並爲南平王大司馬府記室翁歸亦工爲詩避博學有思
理更注論語孝經二人並有文集

鍾嶸字仲偉潁川長社人晉侍中雅七世孫也父昭齊中軍參軍嶸與兄岷弟嶼並好學有思理嶸齊永

明中爲國子生明周易衛軍王儉領祭酒頗賞接之舉本州秀才起家王國侍郎遷撫軍行參軍出爲安國令永元末除司徒行參軍天監初制度雖革而日不暇給嶸乃言曰永元肇亂坐弄天爵勳非卽戎官以賄就揮一金而取九列寄片札以招六校騎都塞市郎將填街服旣纒組尙爲臧獲之事職唯黃散猶躬胥徒之役名實淆紊茲焉莫甚臣愚謂軍官是素族士人自有清貫而因斯受爵一宜削除以懲僥競若吏姓寒人聽極其門品不當因軍遂濫清級若僑雜僞楚應在綏附正宜嚴斷祿力絕其妨正直乞虛號而已謹竭愚忠不恤衆口敢付尙書行之遷中軍臨川王行參軍衡陽王元簡出守會稽引爲監朔記室專掌文翰時居士何胤築室若邪山山發洪水漂拔樹石此室獨存元簡命嶸作瑞室頌以旌表之辭甚典麗遷西中郎晉安王詔室嶸嘗品古今五言詩論其優劣名爲詩評其序曰氣之動物物之感人故搖蕩性情諸舞詠欲以照燭三才輝麗萬有靈祇待之以致饗幽微藉之以昭告動天地感鬼神莫近於詩昔南風之辭卿雲之頌厥義夏矣夏歌曰鬱陶乎予心楚謠云名余曰正則雖詩體未全然略是五言之濫觴也逮漢李陵始著五言之目古詩眇邈人代難詳推其文體固是炎漢之制非衰周之倡也自王楊枚馬之徒辭賦競爽而吟詠靡聞從李都尉訖班婕妤將百年間有婦人焉一人而已詩人之風頓已缺喪東京二百載中唯有班固詠史質木無文致降及建安曹公父子篤好斯文平原兄弟鬱爲文棟

劉楨王粲爲其羽翼次有攀龍託鳳自致於屬車者蓋將百計彬彬之盛大備於時矣爾後陵遲衰微訖於有晉太康中三張二陸兩潘一左勃爾復興踵武前王風流未沫亦文章之中興也永嘉時貴黃老尙虛談于時篇什理過其辭淡乎寡味爰及江表微波尙傳孫綽許詢桓庾諸公皆平典似道德論建安之風盡矣先是郭景純用俊上之才創變其體劉越石仗清剛之氣贊成厥美然彼衆我寡未能動俗逮義熙中謝益壽斐然繼作元嘉初有謝靈運才高辭盛富豔難蹤固已含跨劉郭陵轢潘左故知陳思爲建安之傑公幹仲宣爲輔陸機爲太康之英安仁景陽爲輔謝客爲元嘉之雄顏延年爲輔此皆五言之冠冕文辭之命世夫四言文約意廣取效風騷便可多得每苦文煩而意少故世罕習焉五言居文辭之要是衆作之有滋味者也故云會於流俗豈不以指事遣形窮情寫物最爲詳切者邪故詩有六義爲一曰興二曰賦三曰比文已盡而意有餘興也因物喻志比也直書其事寓言寫物賦也弘斯三義酌而用之幹之以風力潤之以丹采使味之者無極聞之者動心是詩之至也若專用比興則患在意深意深則辭蹶若但用賦體則患在意浮意浮則文散嬉成流移文無止泊有蕪漫之累矣若乃春風春鳥秋月秋蟬夏雲暑雨冬月祁寒斯四候之感諸詩者也嘉會寄詩以親離羣託詩以怨至於楚臣去境漢妾辭宮或骨橫朔野或魂逐飛蓬或負戈外戍或殺氣雄邊塞客衣單霜闥淚盡又士有解珮出朝一去忘反女有

揚蛾入寵再盼傾國凡斯種種感蕩心靈非陳詩何以展其義非長歌何以釋其情故曰詩可以羣可以怨使窮賤易安幽居靡悶莫尚於詩矣故辭人作者罔不愛好今之士俗斯風熾矣裁能勝衣甫就小學必甘心而馳驚焉於是庸音雜體各爲家法至於膏腴子弟恥文不逮終朝點綴分夜呻吟獨觀謂爲警策衆視終淪平鈍次有輕蕩之徒笑曹劉爲古拙謂鮑昭羲皇上人謝朓今古獨步而師鮑昭終不及日中市朝滿學謝朓劣得黃鳥度青枝徒自棄於高聽無涉於文流矣嶸觀王公搢紳之士每博論之餘何嘗不以詩爲口實隨其嗜欲商推不同淄澠並汎朱紫相奪諠譁競起准的無依近彭城劉士章俊賞之士疾其淆亂欲爲當世詩品口陳標榜其文未遂嶸感而作焉昔九品論人七略裁士校以賓實誠多未值至若詩之爲技較爾可知以類推之殆同博奕方今皇帝資生知之上才體沉鬱之幽思文麗日月學究天人昔在貴遊已爲稱首況八紘旣掩風靡雲蒸抱玉者連肩握珠者踵武固以睨漢魏而弗顧吞晉宋於胷中諒非農歌轅議敢致流別嶸之今錄庶周遊於閭里均之於談笑耳頃之卒官阮字長岳官至府參軍建康平著良史傳十卷嶠字季望永嘉郡丞天監十五年敕學士撰徧略嶠亦預焉兄弟並有文集

周興嗣字思纂陳郡項人漢太子太傅堪後也高祖凝晉征西府參軍宜都太守興嗣世居姑孰年十三

遊學京師積十餘載遂博通記傳善屬文嘗步自姑孰投宿逆旅夜有人謂之曰子才學邁世初嘗見識貴臣卒被知英主言終不測所之齊隆昌中侍中謝朓爲吳興太守唯與興嗣談文史而已及罷郡還因大相稱薦本州舉秀才除桂陽郡丞太守王嶸素相賞好禮之甚厚高祖革命興嗣奏休平賦其文甚美高祖嘉之拜安成王國侍郎直華林省其年河南獻舞馬詔興嗣與待詔到沆張率爲賦高祖以興嗣爲工擢員外散騎侍郎進直文德壽光省是時高祖以三橋舊宅爲光宅寺敕興嗣與陸倕各製寺碑及成俱奏高祖用興嗣所製者自是銅表銘柵塘碣北伐檄次韻王羲之書千字並使興嗣爲文每奏高祖輒稱善加賜金帛九年除新安郡丞秩滿復爲員外散騎侍郎佐撰國史十二年遷給事中撰文如故興嗣兩手先患風疽是年又染癘疾左目盲高祖撫其手嗟曰斯人也而有斯疾也手疏治疽方以賜之其見惜如此任昉又愛其才常言曰周興嗣若無疾旬日當至御史中丞十四年除臨川郡丞十七年復爲給事中直西省左衛率周捨奉敕注高祖所製歷代賦敕興嗣助焉普通二年卒所撰皇帝實錄皇德記起居注職儀等百餘卷文集十卷

吳均字叔庠吳興故鄣人也家世寒賤至均好學有俊才沈約嘗見均文頗相稱賞天監初柳惲爲吳興召補主簿日引與賦詩均文體清拔有古氣好事者或數之謂爲吳均體建安王偉爲揚州引兼記室掌

文翰王遷江州補國侍郎兼府城局還除奉朝請先是均表求撰齊春秋書成奏之高祖以其書不實使中書舍人劉之遴詰問數條竟支離無對敕付省焚之坐免職尋有敕召見使撰通史起三皇訖齊代均草本紀世家功已畢唯列傳未就普通元年卒時年五十二均注范曄後漢書九十卷著齊春秋三十卷廟記十卷十二州記十六卷錢唐先賢傳五卷續文釋五卷文集二十卷先是有廣陵高爽濟陽江洪會稽虞騫並工屬文爽齊永明中贈衛軍王儉詩爲儉所賞及領丹陽尹舉爽郡孝廉天監初歷官中軍臨川王參軍出爲晉陽令坐事繫治作鰲魚賦以自況其文甚工後遇赦獲免頃之卒洪爲建陽令坐事死騫官至王國侍郎並有文集

梁書卷四十九考證

到沆傳時高祖謙華光殿○光監本訛元今從南史改正

袁峻傳峻乃擬揚雄官箴奏之○官南史作書

庾肩吾傳肩吾字子慎○子慎南史作慎之

周興嗣傳次韻王羲之書千字並使興嗣爲文○宋史李至傳言千字文乃梁武帝得鍾繇書破碑千餘字命周興嗣次韻而成今以爲王羲之異矣

唐 散騎常侍 姚思廉 撰

列傳第四十四

文學下

劉峻 劉沼 謝幾卿 劉綏 王籍 何思澄 劉杳

謝徵 臧嚴 伏挺 庾仲容 陸雲公 任孝恭 顏協

劉峻字孝標平原平原人父斑宋始興內史峻生朞月母攜還鄉里宋泰始初青州陷魏峻年八歲為人
所略至中山中山富人劉寶愍峻以束帛贖之教以書學魏人聞其江南有戚屬更徙之桑乾峻好學家
貧寄人廡下自課讀書常燎麻炬從夕達旦時或昏睡執其髮既覺復讀終夜不寐其精力如此齊永明
中從桑乾得還自謂所見不博更求異書聞京師有者必往祈借清河崔慰祖謂之書淫時竟陵王子良
博招學士峻因人求為子良國職吏部尚書徐孝嗣抑而不許用為南海王侍郎不就至明帝時蕭遙欣
為豫州為府刑獄禮遇甚厚遙欣尋卒久之不調天監初召入西省與學士賀蹤典校祕書峻兄孝慶時
為青州刺史峻請假省之坐私載禁物為有司所奏免官安成王秀好峻學及遷荊州引為戶曹叅軍給

其書籍使抄錄事類名曰類苑未及成復以疾去因遊東陽紫巖山築室居焉爲山栖志其文甚美高祖
招文學之士有高才者多被引進擢以不次峻率性而動不能隨衆沉浮高祖頗嫌之故不任用乃著辨
命論以寄其懷曰主上嘗與諸名賢言及管輅歎其有奇才而位不達時有在赤墀之下預聞斯議歸以
告余余謂士之窮通無非命也故謹述天旨因言其略云臣觀管輅天才英偉珪璋特秀實海內之髦傑
豈日者卜祝之流而官止少府丞年終四十八天之報施何其寡歟然則高才而無貴仕饜發而居大位
自古所歎焉獨公明而已哉故性命之道窮通之數天闕紛綸莫知其辨仲任蔽其源子長闡其惑至於
鸞冠瓊牖必以懸天有期鼎貴高門則曰唯人所召讒讒譖昨異端俱起蕭遠論其本而不暢其流子玄
語其流而未詳其本嘗試言之曰夫道生萬物則謂之道生而無主謂之自然自然者物見其然不知所
以然同焉皆得不知所以得鼓動陶鑄而不爲功庶類混成而非其力生之無亭毒之心死之豈虔劉之
志墜之淵泉非其怒昇之霄漢非其悅蕩乎大乎萬寶以之化確乎純乎一作而不易化而不易則謂之
命命也者自天之命也定於冥兆終然不變鬼神莫能預聖哲不能謀觸山之力無以抗倒日之誠弗能
感短則不可緩之於寸陰長則不可急之於箭漏至德未能踰上智所不免是以放勳之代浩浩襄陵天
乙之時焦金流石文公寔其尾宣尼絕其糧顏回敗其糞蘭冉耕歌其采苴夷叔斃淑媛之會子與困臧

倉之訴聖賢且猶若此而況庸庸者乎至乃伍員浮屍於江流三閭沉骸於湘渚賈大夫沮志於長沙馮
都尉皓髮於郎署君山鴻漸鍛羽儀於高雲敬通鳳起摧迅翮於風穴此豈才不足而行有遺哉近代有
沛國劉瓛瓛弟璉並一時之秀士也瓛則關西孔子通涉六經循循善誘服膺儒行璉則志烈秋霜心貞
岷玉亭亭高竦不雜風塵皆毓德於衡門並馳聲於天地而官有微於侍郎位不登於執戟相繼徂落宗
祀無饗因斯兩賢以言古則昔之玉質金相英髦秀達皆擯斥於當年韞奇才而莫用候草木以共凋與
麋鹿而同死膏塗平原骨填川谷湮滅而無聞者豈可勝道哉此則宰衡之與皂隸容彭之與殤子猗頓
之與黔婁陽文之與敦洽咸得之於自然不假道於才智故曰死生有命富貴在天其斯之謂矣然命體
周流變化非一或先號後笑或始吉終凶或不召自來或因人以濟交錯紛糾循環倚伏非可以一理徵
非可以一途驗而其道密微寂寥忽恍無形可以見無聲可以聞必御物以效靈亦憑人而成象譬天王
之冕旒任百官以司職而或者覩湯武之龍躍謂龕亂在神功聞孔墨之挺生謂英睿擅奇響視彭韓之
豹變謂鷲猛致人爵見張桓之朱紱謂明經拾青紫豈知有力者運之而趨乎故言而非命有六蔽焉余
請陳其梗槩夫靡顏膩理哆嚙頰頰形之異也朝秀辰終龜鶴千歲年之殊也聞言如響智昏菽麥神之
辨也同知三者定乎造化榮辱之境獨曰由人是知二五而未識於十其蔽一也龍犀日角帝王之哀河

目龜文公侯之相撫鏡知其將刑壓紐顯其膺錄星虹樞電昭聖德之符夜哭聚雲鬱興王之瑞皆兆發於前期渙汗於後葉若謂驅貔虎奮尺劍入紫微升帝道則未達宵冥之情未測神明之數其蔽二也空桑之里變成洪川歷陽之都化爲魚鼈楚師屠漢卒睢河鯁其流秦人坑趙士沸聲若雷震火炎岷岳礫石與琬琰俱焚巖霜夜零蕭艾與芝蘭共盡雖游夏之英才伊顏之殆庶焉能抗之哉其蔽三也或曰明月之珠不能無類夏后之璜不能無考故亭伯死於縣長長卿卒於園令才非不傑也主非不明也而碎結綠之鴻輝殘懸黎之夜色抑尺之量有短哉若然者主父偃公孫弘對策不升第歷說而不入牧豕淄原見棄州部設令忽如過隙溢死霜露其爲詬恥豈崔馬之流乎及至開東閣列五鼎電照風行聲馳海外寧前愚而後智先非而終是將榮悴有定數天命有至極而謬生妍蚩其蔽四也夫虎嘯風馳龍興雲屬故重華立而元凱升辛受生而飛廉進然則天下善人少惡人多闇主衆明君寡而薰蕕不同器梟鸞不接翼是使渾沌橈杓踵武雲臺之上仲容庭堅耕耘巖石之下橫謂廢興在我無繫於天其蔽五也彼戎狄者人面獸心宴安鳩毒以誅殺爲道德以蒸報爲仁義雖大風立於青丘鑿齒奮於華野比于狼戾曾何足踰自金行不競天地版蕩左帶沸骨乘閒電發遂覆瀛洛傾五都居先王之桑梓竊名號於中縣典三皇競其氓黎五帝角其區寓種落繁熾充物神州嗚呼福善禍淫徒虛言耳豈非否泰相傾盈縮遞

運而汨之以人其蔽六也然所謂命者死生爲貴賤爲貧富爲理亂爲禍福爲此十者天之所賦也愚智善惡此四者人之所行也夫神非舜禹心異朱均才絀中庸在於所習是以素絲無恒玄黃代起鮑魚芳蘭入而自變故季路學於仲尼厲風霜之節楚穆謀於潘崇成悖逆之禍而商臣之惡盛業光於後嗣仲由之善不能息其結纓斯則邪正由於人吉凶存乎命或以鬼神害盈皇天輔德故宋公一言法星三徙殷帝自翦千里來雲善惡無徵未洽斯義且于公高門以待封巖母掃墓以望喪此君子所以自彊不息也如使仁而無報奚爲修善立名乎斯徑廷之辭也夫聖人之言顯而晦微而婉幽遠而難聞河漢而不極或立教以進庸惰或言命以窮性靈積善餘慶立教也鳳鳥不至言命也今以其片言辯其要趨何異乎夕死之類而論春秋之變哉且荆昭德音丹雲不卷周宣祈雨珪璧斯馨于叟種德不逮助華之高延年殘獷未甚東陵之酷爲善一爲惡均而禍福異其流廢興殊其迹蕩蕩上帝豈如是乎詩云風雨如晦鷄鳴不已故善人爲善焉有息哉夫食稻梁進芻豢或狐貉襲冰紈觀窈眇之奇儻聽雲和之琴瑟此生人之所急非有求而爲也修道德習仁義敦孝悌立忠貞漸禮樂之腴潤蹈先王之盛則此君子之所急非有求而爲也然則君子居正體道樂天知命明其無可奈何識其不由智力逝而不召來而不距生而不喜死而不感瑤臺夏屋不能說其神土室編蓬未足憂其慮不充詘於富貴不遑遑於所欲豈有史公

董相不遇之文乎論成中山劉沼致書以難之凡再反峻並爲申祈以答之會沼卒不見峻後報者峻乃爲書以序之曰劉侯既有斯難值余有天倫之感竟未之致也尋而此君長逝化爲異物緒言餘論蘊而莫傳或有自其家得而示余者悲其音徽未沫而其人已亡青簡尙新而宿草將列泫然不知涕之無從雖隙駟不留尺波電謝而秋菊春蘭英華靡絕故存其梗槩更酬其旨若使墨翟之言無爽宣室之談有徵冀東平之樹望咸陽而西靡蓋山之泉聞弦歌而赴節但懸劍空壘有恨如何其論文多不載峻又嘗爲自序其略曰余自比馮敬通而有同之者三異之者四何則敬通雄才冠世志剛金石余雖不及之而節亮慷慨此一同也敬通值中興明君而終不試用余逢命世英主亦擯斥當年此二同也敬通有忌妻至於身操井曰余有悍室亦令家道輻軻此三同也敬通當更始之世手握兵符躍馬食肉余自少迄長戚戚無懽此一異也敬通有一子仲文官成名立余禍同伯道永無血胤此二異也敬通膂力方剛老而益壯余有犬馬之疾溘死無時此三異也敬通雖芝殘蕙焚終填溝壑而爲名賢所慕其風流郁烈芬芳久而彌盛余聲塵寂漠世不吾知魂魄一去將同秋草此四異也所以自力爲敘遺之好事云峻居東陽吳會人士多從其學會通二年卒時年六十門人諡曰玄靖先生

劉沼字明信中山魏昌人六代祖與晉驃騎將軍沼幼嘗屬文既長博學仕齊起家奉朝請冠軍行參軍

天監初拜後軍臨川王記室參軍秣陵令卒

謝幾卿陳郡陽夏人曾祖靈運宋臨川內史父超宗齊黃門郎並有重名於前代幾卿幼清辯當世號曰神童後超宗坐事徙越州路出新亭渚幾卿不忍辭訣遂投赴江流左右馳救得不沉溺及居父憂哀毀過禮服闋召補國子生齊文惠太子自臨策試謂祭酒王儉曰幾卿本長玄理今可以經義訪之儉承旨發問幾卿隨事辨對辭無滯者文惠大稱賞焉儉謂人曰謝超宗爲不死矣旣長好學博涉有文采起家豫章王國常侍累遷車騎法曹行參軍相國祭酒出爲寧國令入補尚書殿中郎太尉晉安王主簿天監初除征虜鄱陽王記室尚書三公侍郎尋爲治書侍御史舊郎官轉爲此職者世謂爲南奔幾卿頗失志多陳疾臺事略不復理徙爲散騎侍郎累遷中書郎國子博士尚書左丞幾卿詳悉故實僕射徐勉每有疑滯多詢訪之然性通脫會意便行不拘朝憲嘗預樂遊苑宴不得醉而還因詣道邊酒壚停車褰幔與車前三騶對飲時觀者如堵幾卿處之自若後以在省署夜著犢鼻褌與門生登閣道飲酒酣暈爲有司糾奏坐免官尋起爲國子博士俄除河東太守秩未滿陳疾解尋除太子率更令遷鎮衛南平王長史普通六年詔遣領軍將軍西昌侯蕭淵藻督衆軍北伐幾卿啟求行擢爲軍師長史加威戎將軍軍至渦陽退敗幾卿坐免官居宅在白楊石井朝中交好者載酒從之賓客滿坐時左丞庾仲容亦免歸二人意志

相得並肆情誕縱或乘露車歷遊郊野既醉則執鐸挽歌不屑物議湘東王在荆鎮與書慰勉之幾卿答曰下官自奉違南浦卷迹東郊望日臨風瞻言佇立仰尋惠渥陪奉遊宴藻桂棹於清池席落英於曾岵蘭香兼御羽觴競集側聽餘論沐浴玄流濤波之辯懸河不足譬春藻之辭麗文無以匹莫不相顧動容服心勝口不覺春日爲遙更謂脩夜爲促嘉會難常搏雲易遠言念如昨忽焉素秋恩光不遺善謔遠降因事罷歸豈云栖缺匪商官缺理就一塵田家作苦實符清誨本乏金羈之飾無假玉璽爲資徒以老使形疎疾令心阻沉滯狀篋彌歷七旬夢幻俄頃憂傷在念竟知無益思自祛遣尋理滌意卽以任命爲膏酥寧鏡照形穢以支離代萱樹故得仰慕猷猷永言前哲鬼谷深栖接輿高舉遜名屠肆發迹關市其人緬邈餘流可想若令亡者有知盃不縈悲玄壤悵隔芳塵如其逝者可作必當昭被光景懽同遊豫使夫一介老圃得道虛心末席去日已疎來侍未辱連劍飛鳧擬非其類懷私茂德竊用涕零幾卿雖不持檢操然於家門篤睦兄才卿早卒其子藻幼孤幾卿撫養甚厚及藻成立歷清官公府祭酒主簿皆幾卿獎訓之力也世以此稱之幾卿未及序用病卒文集行於世

劉綢字彥和東莞莒人祖靈真宋司空秀之弟也父尙越騎校尉綢早孤篤志好學家貧不婚娶依沙門僧祐與之居處積十餘年遂博通經論因區別部類錄而序之今定林寺經藏綢所定也天監初起家奉

朝請中軍臨川王宏引兼記室遷車騎倉曹參軍出爲太末令政有清績除仁威南康王記室兼東宮通
事舍人時七廟饗薦已用蔬果而二郊農社猶有犧牲綈乃表言二郊宜與七廟同改詔付尚書議依綈
所陳遷步兵校尉兼舍人如故昭明太子好文學深愛接之初綈撰文心雕龍五十篇論古今文體引而
次之其序曰夫文心者言爲文之用心也昔涓子琴心王孫巧心心哉美矣夫故用之焉古來文章以雕
鑿成體豈取騶奭羣言雕龍也夫宇宙緜邈黎獻紛雜拔萃出類智術而已歲月飄忽性靈不居騰聲飛
實制作而已夫肖貌天地稟性五才擬耳目於日月方聲氣乎風雷其超出萬物亦已靈矣形甚草木之
脆名踰金石之堅是以君子處世樹德建言豈好辯哉不得已也予齒在踰立嘗夜夢執丹漆之禮器隨
仲尼而南行巨而寤迺怡然而喜大哉聖人之難見也迺小子之垂夢歟自生人以來未有如夫子者也
敷讚聖旨莫若注經而馬鄭諸儒弘之已精就有深解未足立家唯文章之用實經典枝條五禮資之以
成六典因之致用君臣所以炳煥軍國所以昭明詳其本源莫非經典而去聖久遠文體解散辭人愛奇
言貴浮詭飾羽尙畫文繡擊輓離本彌甚將遂訛濫蓋周書論辭貴乎體要尼父陳訓惡乎異端辭訓之
異宜體於要於是搨筆和墨乃始論文詳觀近代之論文者多矣至如魏文述典陳思序書應瑒文論陸
機文賦仲治流別弘範翰林各照隅隙鮮觀衢路或臧否當時之才或銓品前脩之文或汎舉雅俗之旨

或撮題篇章之意魏典密而不周陳書辯而無當應翰華而疎略陸賦巧而碎亂流別精而少功翰林淺而寡要又君山公幹之徒吉甫士龍之輩汎議文意往往間出並未能振葉以尋根觀瀾而索源不述先哲之誥無益後生之慮蓋文心之作也本乎道師乎聖體乎經酌乎緯變乎騷文之樞紐亦云極矣若乃論文叙筆則固別區分原始以表末釋名以章義選文以定篇敷理以舉統上篇以上綱領明矣至於割情析表籠圈條貫揭神性圖風勢苞會通闕聲字崇贊於時序褒貶於才略悃悞於知音耿介於程器長懷序志以馭羣篇下篇以下毛目顯矣位理定名彰乎大易之數其爲文用四十九篇而已夫銓敘一文爲易彌綸羣言爲難雖復輕采毛髮深極骨髓或有曲意密源似近而遠辭所不載亦不勝數矣及其品評成文有同乎舊談者非雷同也勢自不可異也有異乎前論者非苟異也理自不可同也同之與異不脣古今擘肌分理唯務折衷案轡文雅之場而環絡藻繪之府亦幾乎備矣但言不盡意聖人所難識在餅管何能矩矱茫茫往代旣洗予聞眇眇來世儻塵彼觀旣成未爲時流所稱綈自重其文欲取定於沈約約時貴盛無由自達乃負其書候約出于之於車前狀若貨鬻者約便命取讀大重之謂爲深得文理常陳諸几案然綈爲文長於佛理京師寺塔及名僧碑誌必請綈製文有敕與慧震沙門於定林寺撰經證功畢遂啟求出家先燔鬢髮以自誓敕許之乃於寺變服改名慧地未暮而卒文集行於世

王籍字文海琅邪臨沂人祖遠宋光祿勳父僧祐齊驍騎將軍籍七歲能屬文及長好學博涉有才氣樂安任昉見而稱之嘗於沈約坐賦詠得燭甚爲約賞齊末爲冠軍行參軍累遷外兵記室天監初除安成王主簿尙書三公郎廷尉正歷餘姚錢塘令並以放免久之除輕車湘東王諮議參軍隨府會稽郡境有雲門天柱山籍嘗遊之或累月不反至若邪溪賦詩其略云蟬噪林逾靜鳥鳴山更幽當時以爲文外獨絕還爲大司馬從事中郎遷中散大夫尤不得志遂徒行市道不擇交遊湘東王爲荊州引爲安西府諮議參軍帶作塘令不理縣事日飲酒人有訟者鞭而遣之少時卒文集行於世子碧亦有文才先籍卒

何思澄字元靜東海郟人父敬叔齊征東錄事參軍餘杭令思澄少勤學工文辭起家爲南康王侍郎累遷安成王左常侍兼太學博士平南安成王行參軍兼記室隨府江州爲遊廬山詩沈約見之大相稱賞自以爲弗逮約郊居宅新構閣齋因命工書人題此詩於壁傅昭常請思澄製釋奠詩辭又典麗除廷尉正天監十五年敕太子詹事徐勉舉學士入華林撰徧略勉舉思澄等五人以應選遷洛書侍御史宋齊以來此職稍輕天監初始重其選車前依尙書二丞給三騶執盛印青囊舊事糾彈官印綬在前故也久之遷秣陵令入兼東宮通事舍人除安西湘東王錄事參軍兼舍人如故時徐勉周捨以才具當朝竝好思澄學常遞日招致之昭明太子薨出爲黟縣令遷除宣惠武陵王中錄事參軍卒官時年五十四文集

十五卷初思澄與宗人遜及子朗俱擅文名時人語曰東海三何子朗最多思澄聞之曰此言誤耳如其不然故當歸遜思澄意謂宜在己也子朗字世明早有才思工清言周捨每與共談服其精理嘗爲敗冢賦擬莊周馬極其文甚工世人語曰人中爽爽何子朗歷官員外散騎侍郎出爲固山令卒時年二十四文集行於世

劉杳字士深平原平原人也祖乘民宋冀州刺史父懷慰齊東陽太守有清績在齊書良政傳杳年數歲徵士明僧紹見之撫而言曰此兒實千里之駒十三丁父憂每哭哀感行路天監初爲太學博士宣惠豫章王行參軍杳少好學博綜羣書沈約在昉以下每有遺忘皆訪問焉嘗於約坐語及宗廟犧樽約云鄭玄答張逸謂爲畫鳳皇尾娑娑然今無復此器則不依古杳曰此言未必可按古者樽彝皆刻木爲鳥獸鑿頂及背以出內酒頃魏世魯郡地中得齊大夫子尾送女器有犧樽作犧牛形晉永嘉賊曹嶷於青州發齊景公冢又得二樽形亦爲牛象二處皆古之遺器知非虛也約大以爲然約又云何承天纂文奇博其書載張仲師及長頸王事此何出杳曰仲師長尺二寸唯出論衡長頸是毗羸王朱建安扶南以南記云古來至今不死約即取二書尋檢一如杳言約郊居宅時新構閣齋杳爲贊二首并以所撰文章呈約約卽命工書人題其贊于壁仍報杳書曰生平愛嗜不在人中林壑之懽多與事奪日暮塗殫此心往矣

猶復少存閑適徵懷清曠結宇東郊匪云止息政復頗寄夙心時得休偃仲長遊居之地休理所述之美望慕空深何可髣髴君愛素情多惠以二贊辭采妍富事義畢舉句韻之間光影相照便覺此地自然十僧故知麗辭之益其事弘多輒當置之閣上坐臥嗟覽別卷諸篇並爲名製又山寺旣爲警策諸賢從時復高奇解頤愈疾義兼乎此遲比叙會更共申析其爲約所賞如此又在任昉坐有人餉昉榕酒而作樞字昉問杳此字是不杳對曰葛洪字苑作木旁者昉又曰酒有千日醉當是虛言杳云桂陽程鄉有千里酒飲之至家而醉亦其例也昉大驚曰吾自當遺忘實不憶此杳云出楊元鳳所撰置郡事元鳳是魏代人此書仍載其賦云三重五品商溪擦里時卽檢楊記言皆不差王僧孺被敕撰譜訪杳血脉所因杳云桓譚新論云太史三代世表旁行邪上並效周譜以此而推當起周代僧孺歎曰可謂得所未聞周捨又問杳尙書官著紫荷橐相傳云挈囊竟何所出杳答曰張安世傳曰持橐簪筆事孝武皇帝數十年韋昭張晏注並云囊囊也近臣簪筆以待顧問范岫撰字書音訓又訪杳焉其博識彊記皆此類也尋佐周捨撰國史出爲臨津令有善績秩滿縣民三百餘人詣闕請留敕許焉杳以疾陳解還除雲麾晉安王府參軍詹事徐勉舉杳及顧協等五人入華林撰徧略書成以本官兼廷尉正又以足疾解因著林庭賦王僧孺見之歎曰鄒居以後無復此作普通元年復除建康正遷尙書駕部郎數月徙署儀曹郎僕射勉以臺

閣文議專委杳焉出爲餘姚令在縣清潔人有饋遺一無所受湘東王發教褒稱之遷除宣惠湘東王記室參軍母憂去職服闋復爲王府記室兼東宮通事會人大通元年遷步兵校尉兼舍人如故昭明太子謂杳曰酒非卿所好而爲酒廚之職政爲不愧古人耳俄有敕代裴子野知著作郎事昭明太子薨新宮建舊人例無停者敕特留杳焉仍注太子徂歸賦稱爲博悉僕射何敬容奏轉杳王府諮議高祖曰劉杳須先經中書仍除中書侍郎尋爲平西湘東王諮議參軍兼舍人知著作如故遷爲尚書左丞大同二年卒官時年五十杳治身清儉無所嗜好爲性不自伐不論人短長及觀釋氏經教常行慈忍天監十七年自居母憂便長斷腥羶持齋蔬食及臨終遺命歛以法服載以露車還葬舊墓隨得一地容棺而已不得設靈筵祭醊其子遵行之杳自少至長多所著述撰要雅五卷楚辭草木疏一卷高士傳二卷東宮新舊記三十卷古今四部書目五卷並行於世

謝徵字玄度陳郡陽夏人高祖景仁宋尚書左僕射祖稚宋司徒主簿父環少與從叔朏俱知名齊竟陵王子良開西邸招文學環亦預焉隆昌中爲明帝驃騎諮議參軍領詔室遷中書郎晉安內史高祖平京邑爲霸府諮議梁臺黃門郎天監初累遷司農卿秘書監左民尚書明威將軍東陽太守高祖用爲侍中

固辭年老求金紫未序會疾卒徵幼聰慧環異之常謂親從曰此兒非常器所憂者壽若天假其年吾無

慎矣既長美風采好學善屬文初爲安西安成王法曹遷尙書金部三公二曹郎豫章王記室兼中書舍人遷除平北諮議參軍兼鴻臚卿舍人如故徵與河東裴子野沛國劉顯同官友善子野嘗爲寒夜直宿賦以贈徵徵爲感友賦以酬之時魏中山王元略還北高祖饒於武德殿賦詩三十韻限三刻成徵二刻便就其辭甚美高祖再覽焉又爲臨汝侯淵猷製放生文亦見賞於世中大通元年以父喪去職續又丁母憂詔起爲貞威將軍遷攝本任服闋除尙書左丞三年昭明太子薨高祖立晉安王綱爲皇太子將出詔唯召尙書左僕射何敬容宣惠將軍孔休源及徵三人與議徵時年位尙輕而任遇已重四年累遷中書郎鴻臚卿舍人如故六年出爲北中郎豫章王長史南蘭陵太守大同二年卒官時年三十七友人琅邪王籍集其文爲二十卷

臧嚴字彥威東莞莒人也曾祖壽宋左光祿祖凝齊尙書右丞父稜後軍參軍嚴幼有孝性居父憂以毀聞孤貧勤學行止書卷不離於手初爲安成王侍郎轉常侍從叔末甄爲江夏郡攜嚴之官於塗作屯遊賦任昉見而稱之又作七算辭亦富麗性孤介於人間未嘗造請僕射徐勉欲識之嚴終不詣遷冠軍行參軍侍湘東王讀累遷王宣惠輕車府參軍兼記室嚴於學多所諳記尤精漢書諷誦略皆上口王嘗自執四部書目以試之嚴自甲至丁卷中各對一事并作者姓名遂無遺失其博洽如此王遷荊州隨府轉

西中郎安西錄事參軍歷監義陽武靈郡累任皆蠻左前郡守常選武人以兵鎮之嚴獨以數門生單車入境羣蠻悅服遂絕寇盜王入爲石頭戍軍事除安右錄事王遷江州爲鎮南諮議參軍卒官文集十卷伏挺字士標父暉爲豫章內史在良吏傳挺幼敏瘠七歲通孝經論語及長有才思好屬文爲五言詩善効謝康樂體父友人樂安任昉深相歎異常曰此子目下無雙齊末州舉秀才對策爲當時第一高祖義師至挺迎謁於新林高祖見之甚悅謂曰顏子引爲征東行參軍時年十八天監初除中軍參軍事宅居在潮溝於宅講論語聽者傾朝遷建康正俄以効免久之入爲尚書儀曹郎遷西中郎記室參軍累爲晉陵武康令罷縣還仍於東郊築室不復仕挺少有盛名又善處當世朝中勢素多與交遊故不能久事隱靜時僕射徐勉以疾假還宅挺致書以觀其意曰昔士德懷顧戀興數日輔嗣思友情勞一句故知深心所係貴賤一也況復恩隆世親義重知己道庇生人德弘覆蓋而朝野懸隔山川邈殊雖咳唾時沾而顏色不觀東山之歎豈云旋復西風可懷孰能無思加以靜居廓處顧影莫酬秋風四起園林易色涼野寂寞寒蟲吟叫懷抱不可直置情慮不能無託時因吟詠動輒盈篇楊生沉鬱且猶覆盎惠十五車彌多踏駁一日聊呈小文不期過賞遲速隆渥累牘翰紙縟字磨誦復無已徒恨許與過當有傷準的昔子建不欲妄讚陳琳恐見嗤哂後代今之過奢餘論將不有累清談挺竄迹草萊事絕聞見藉以謳謠得之與

牧仰承有事砭石仍成簡通娛腸悅耳稍從擯落宴處榮觀務在滌除綺羅絲竹二列頓遣方丈具案三
栢僅存故以道變區中情沖域外操彼絃誦資茲觀損追留侯之却粒念韓卿之辭榮隘想東都屬懷南
岳鑢仰來既有符下風雖云幸甚然則未喻雖復帝道康寧走馬行却由庚得所寅亮有歸悠悠之人屢
氏猶且攘袂浩浩白水寧雙方欲褰裳是知君子拯物義非徇己思與赤松子遊誰其克遂願驅之仁壽
綏此多福雖則不言四時行矣然後黔首有庇薦紳靡奪白駒不在空谷屠羊豫蒙其賚豈不休哉豈不
休哉昔杜真自閉深室郎宗絕迹幽野難矣誠非所希井丹高潔相如慢世尙復遊涉權門雍容鄉邑常
謂此道爲泰每竊慕之方念擁筴延思以陳侍者請至農隙無待邀求挺誠好屬文不會今世不能促節
局步以應流俗事等昌菹謬彼偏嗜是用不羞固陋無憚龍門昔敬通之賞景卿孟公之知仲蔚止乎通
人猶稱盛美況在時宗彌爲未易近以蒲藁勿用箋素多闕聊効東方獻書丞相須得善寫更請潤詞儻
逢子侯比復削牘勉報曰復覽來書累牘兼翰事苞出處言兼語默事義周悉意致深遠發函伸紙倍增
憤歎卿雄州擢秀弱冠升朝穿綜百家佃漁大學觀眸表其韶慧視色見其英朗若魯國之名駒邁雲中
之白鶴及占顯邑試吏映壤將有武城弦歌桐鄉謠詠豈與卓魯斷斷同年而語邪方當見賞良能有加
寵授飾茲簪帶實彼周行而欲遠慕卷舒用愧愚智既知益之爲累爰悟滿則辭多高蹈風塵良所欽揖

況以金商戒節素秋御序蕭條林野無人相樂偃臥墳籍遊浪儒玄物我兼忘寵辱誰滯誠乃歡羨用有殊同今逃聽傍求興懷寤宿白駒空谷幽人引領貧賤爲恥烏獸難羣故當捐此薛蘿出從鷓鴣無乖隱顯不亦休哉吾智乏佐時才慙濟世稟承朝則不敢荒寧力弱途遙愧心非一天下有道堯人何事得因疲病念從閑逸若使車書混合尉候無警作樂制禮紀石封山然後乃返服衡門實爲多幸但夙有風欬遘茲虛眩瘠類士安羸同長孺鐘領沉廢臺閣未理娛耳爛腸因事而息非關欲追松子遠幕留侯若乃天假之年自當靖恭所職擬非倫匹良覺辭費覽復循環爽焉如失清塵獨遠白雲飄蕩依然何極猥降書札示之文翰覽復成誦流連縟紙昔仲宣才敏藉中郎而表譽正平穎悟賴北海以騰聲望古料今吾有慙德儻成卷帙力爲稱首無令獨耀隨掌空使辭人扼腕式閭願見宜事掃門亦有來思赴其懸榻輒若魚網別當以薦城闕之歎曷日無懷所遲萱蘇書不盡意挺後遂出仕尋除南臺治書因事納賄當被推劾挺懼罪遂變服爲道人久之藏匿後遇赦乃出大心寺會邵陵王爲江州搗挺之鎮王好文義深被恩禮挺因此還俗復隨王遷鎮郢州徵入爲京尹挺留夏首久之還京師太清中客遊吳興吳郡侯景亂中卒著邇說十卷文集二十卷子知命先隨挺事邵陵王掌書記亂中王於郢州奔敗知命仍下投侯景常以其父宦途不至深怨朝廷遂盡心事景襲郢州圍巴陵軍中書檄皆其文也及景篡位爲中書會

人專任權寵勢傾內外景敗被執送江陵於獄中幽死誑弟鍾亦有才名先爲邵陵王所引歷爲記室中記室參軍

庾仲容字仲容潁川鄆陵人也晉司空冰六代孫祖徽之宋御史中丞父漪齊邵陵王記室仲容幼孤爲叔父泳所養既長杜絕人事專精篤學晝夜手不輟卷初爲安西法曹行參軍泳時已貴顯吏部尚書徐勉擬泳子晏嬰爲宮僚泳垂泣曰兄子幼孤人才粗可願以晏嬰所忝廼用之勉許焉因轉仲容爲太子舍人遷安成王主簿時平原劉孝標亦爲府佐並以彊學爲王所禮接遷晉安功曹史歷爲永康錢唐武康令治縣並無異績多被劾久之除安成王中記室當出隨府皇太子以舊恩特降餞宴賜詩曰孫生陟陽道吳子朝歌縣未若樊林舉置酒臨華殿時輩榮之遷安西武陵王諮議參軍除尚書左丞坐推糾不直免仲容博學少有盛名頗任氣使酒好危言高論士友以此少之唯與王籍謝幾卿情好相得二人時亦不調遂相追隨誕縱酣飲不復持檢操久之復爲諮議參軍出爲黟縣令及太清亂客遊會稽遇疾卒時年七十四仲容抄諸子書三十卷衆家地理書二十卷列女傳三卷文集二十卷並行於世

陸雲公字子龍吳郡人也祖閑州別駕父完寧遠長史雲公五歲誦論語毛詩九歲讀漢書略能記憶從祖鍾沛國劉顯質問十事雲公對無所失顯歎異之既長好學有才思州舉秀才累遷宣惠武陵王平西

湘東王行參軍雲公先製太伯廟碑吳興太守張纘罷郡經途讀其文歎曰今之蔡伯喈也纘至都掌選
晉之於高祖召兼尙書儀曹郎頃之卽眞入直壽光省以本官知著作郎事俄除著作郎累遷中書黃門
郎並掌著作雲公善奕碁嘗夜侍御坐武冠觸燭火高祖笑謂曰燭燒卿貂高祖將用雲公爲侍中故以
此言戲之也是時天淵池新製鱗魚舟形闊而短高祖暇日常汎此舟在朝唯引太常劉之遴國子祭酒
到漑右衛朱異雲公時年位尙輕亦預焉其恩遇如此太清元年卒時年三十七高祖悼惜之手詔曰給
事黃門侍郎掌著作陸雲公風尙優敏後進之秀奄然歿謝良以惻然可尅日舉哀贖錢五萬布四十四
張纘時爲湘州與雲公叔襄兄晏子書曰都信至承賢兄子賢弟黃門殞折非唯貴門喪寶實有識同悲
痛惋傷惜不能已已賢兄子賢弟神情早著標令弱年經目所覩殆無再問懷橘抱柰稟自天情偶坐列
薪非因外獎學以聚之則一簪能立問以辯之則師心獨寤始踰弱歲辭藝通洽升降多士秀也詩流見
與齒過肩隨禮殊拜絕懷抱相得忘其年義朝遊夕宴一載于斯翫古披文終晨詒暮平生知舊零落稍
盡老夫記意其數幾何至若此生寧可多過賞心樂事所寄伊人弟遷職瀟湘維舟洛汭將離之際彌見
情款夕次帝郊亟淹信宿徘徊握手忍分岐路行役數年羈病侵迫識慮惛恍久絕人世憑几口授素無
其功翰動若飛爾有多愧京洛遊故咸成雲雨唯有此生音塵數嗣形迹之外不爲遠近隔情襟素之中

豈以風霜改節客遊半紀志切首丘日望東歸更敦昔款如何此別永成異世揮袂之初人誰自保但恐
衰謝無復前期不謂華齡方春掩質埋玉之恨撫事多情想引進之情懷抱素篤友于之至兼深家寶奄
有此恤當何可言臨白增悲言以無次雲公從兒才子亦有才名歷官中書郎宣成王友太子中庶子廷
尉卿先雲公卒才子雲公文集並行於世

任孝恭字孝恭臨淮臨淮人也曾祖農夫宋南豫州刺史孝恭幼孤事母以孝聞精力勤學家貧無書常
崎嶇從人假借每讀一徧諷誦略無所遺外祖亡它與高祖有舊高祖聞其有才學召入西省撰史初爲
奉朝請進直壽光省爲司文侍郎俄兼中書通事舍人勅遣製建陵寺刹下銘又啟撰高祖集序文並富
麗自是專掌公家筆翰孝恭爲文敏速受詔立成若不留意每奏高祖輒稱善累賜金帛孝恭少從蕭寺
雲法師讀經論明佛理至是蔬食持戒信受甚篤而性頗自伐以才能尙人於時輩中多有忽略世以此
少之太清二年侯景寇逼孝恭啟募兵隸蕭正德屯南岸及賊至正德舉衆入賊孝恭還赴臺臺門已閉
因奔入東府尋爲賊所攻城陷見害文集行於世

顏協字子和琅邪臨沂人也七代祖含晉侍中國子祭酒西平靖侯父見遠博學有志行初齊和帝之鎮
荊州也以見遠爲錄事參軍及卽位於江陵以爲治書侍御史俄兼中丞高祖受禪見遠乃不食發憤數

日而卒高祖聞之曰我自應天從人何預天下士大夫事而顏見遠乃至於此也協幼孤養於舅氏少以器局見稱博涉羣書工於草隸釋褐湘東王國常侍又兼府記室世祖出鎮荊州轉正記室時吳郡顧協亦在蕃邸與協同名才學相亞府中稱爲二協舅陳郡謝暕卒協以有鞠養恩居喪如伯叔之禮議者重焉又感家門事義不求顯達恆辭徵辟遊於蕃府而已大同五年卒時年四十二世祖甚歎惜之爲懷舊詩以傷之其一章曰弘都多雅度信乃含賓賓鴻漸殊未昇上才淹下秩協所撰晉仙傳五篇日月災異圖兩卷邊火湮滅有二子之儀之推並早知名之推承聖中仕至正員郎中書舍人

陳吏部尚書姚察曰魏文帝稱古之文人鮮能以名節自全何哉夫文者妙發性靈獨拔懷抱易邈等夷必興矜露大則凌慢侯王小則傲蔑朋黨速忌離訛敢自此作若夫屈賈之流斥桓馮之擯放豈獨一世哉蓋恃才之禍也羣士值文明之運摛豔藻之辭無鬱抑之虞不遭向時之患美矣劉氏之論命之徒也命也者聖人罕言歟就而必之非經意也

梁書卷五十考證

劉峻傳敬通鳳起擢迅翮於風穴○穴南本作次

謝幾卿傳尋爲治書侍御史○南史無侍字

何思澄傳父敬叔齊征東錄事參軍餘杭令○南史父敬叔齊長城令有能名

梁書卷五十考證

唐 散 騎 常 侍 姚 思 廉 撰

列傳第四十五

處士

何 點弟 阮孝緒 陶弘景 諸葛璩 沈顛 劉惠斐 范元琰

劉訐 劉歊 庾詵 張孝秀 庾承先

易曰君子遯世無悶獨立不懼孔子稱長沮桀溺隱者也古之隱者或恥聞禪代高讓帝王以萬乘為垢辱之死亡而無悔此則輕生重道希世間出隱之上者也或託仕監門寄臣柱下居易而以求其志處汙而不愧其色此所謂大隱隱於市朝又其次也或裸體佯狂盲瘖絕世棄禮樂以反道忍孝慈而不恤此全身遠害得大雅之道又其次也然同不失語默之致有幽人貞吉矣與夫沒身亂世爭利干時者豈同年而語哉孟子曰今人之於爵祿得之若其生失之若其死淮南子曰人皆鑿於止水不鑿於流澗夫可以揚清激濁抑貪止競其惟隱者乎自古帝王莫不崇尚其道雖唐堯不屈巢許周武不降夷齊以漢高肆慢而長揖黃綺光武按法而折意嚴周自茲以來世有人矣有梁之盛繼紹風猷斯乃道德可宗學藝

可範故以備處士篇云

何點字子皙廬江潯人也祖尚之宋司空爨宜都太守爨素有風疾無故害妻坐法死點年十一幾至滅性及長感家禍欲絕婚宦尚之彊爲之娶琅邪王氏禮畢將親迎點累涕泣求執本志遂得罷容貌方雅博通羣書善談論家本甲族親姻多貴仕點雖不入城府而遨遊人世不簪不帶或駕柴車躡草屨恣心所適致醉而歸士大夫多慕從之時人號爲通隱兄求亦隱居吳郡虎丘山求卒點菜食不飲酒詎于三年要帶滅半宋泰始末徵太子洗馬齊初累徵中書郎太子中庶子並不就與陳郡謝瀹吳國張融會稽孔稚珪爲莫逆友從弟遁以東籬門園居之稚珪爲築室焉園內有卞忠貞冢點植花卉於冢側每飲必舉酒酌之初褚淵王儉爲宰相點謂人曰我作齊書贊云淵旣世族儉亦國華不賴舅氏遑恤國家王儉聞之欲候點知不可見乃止豫章王嶷命駕造點點從後門遁去司徒竟陵王子良欲就見之點時在法輪寺子良乃往請點角巾登席子良欣悅無已遺點嵇叔夜酒杯徐景山酒鐺點少時嘗患渴痢積歲不愈後在吳中石佛寺建講於講所晝寢夢一道人形貌非常授丸一掬夢中服之自此而差時人以爲清德所感性通脫好施與遠近致遺一無所逆隨復散焉嘗行經朱雀門街有自車後盜點衣者見而不言傍有人擒盜與之點乃以衣施盜盜不敢受點命告有司盜懼乃受之催令急去點雅有人倫識鑿多

所甄拔知吳興已遲於幼童稱濟陽江淹於寒素恐如其言點既老又娶會國孔融女融亦隱者也點雖
婚亦不與妻相見築別室以處之人莫喻其意也吳國張融少時免官而爲詩有高尙之言點答詩曰昔
聞東都日不在簡書前雖戲也而融久病之及點後婚融始爲詩贈點曰惜哉何居士薄暮遊荒淫點亦
病之而無以釋也高祖與點有舊及踐阼手詔曰昔因多暇得訪逸軌坐修竹臨清池忘今語古何其樂
也甄別巨圖十有四載人事艱阻亦何可言自應運在天每思相見密邇物色勞甚山阿巖光排九重踐
九等談天人敘故舊有所不臣何傷於高文先以皮弁謁子桓伯況以縠綃見文叔求之往策不無前例
今賜卿鹿皮巾等後數日望能入也點以巾褐引入華林園高祖甚悅賦詩置酒恩禮如舊仍下詔曰前
徵士何點高尙其道志安容膝脫落形骸棲志宵冥朕日昃思治尙想前哲况親得同時而不與爲政曠
臂任切必俟邦良誠望惠然屈居厭替可徵爲侍中辭疾不赴乃復詔曰徵士何點居貞物表縱心塵外
夷坦之風率由自遠往因素志頗申讌言眷彼子陵情兼惟舊昔仲虞邁俗受俸漢朝安道勉志不辭晉
祿此蓋前代盛軌往賢所同可議加資給並出在所日費所須太官別給既人高躋卿故事同垣下天監
三年卒時年六十八詔曰新除侍中何點棲遲衡泌白首不渝奄至殞喪倍懷傷惻可給第一品材一具
賻賵二萬布五十疋喪事所須內監經理又敕點弟胤曰賢兄徵君弱冠拂衣華首一操心遊物表不滯

近跡脫落形骸寄之遠理性情勝致遇興彌高文會酒德撫際逾遠朕膺錄受圖思長聲教朝多君子既貴成雅俗野有外臣宜弘此難進方賴清徽式隆大業昔在布衣情期早著資以仲虞之秩待以子陵之禮聽覽暇日角巾引見窅然汾射茲焉有託一旦萬古良懷震悼卿友于純至親從凋亡偕老之願致使反奪纏綿永恨伊何可任永矣奈何點無子宗人以其從弟耿子遲任爲嗣

庠字子季點之弟也年八歲居憂哀毀若成人既長好學師事沛國劉瓛受易及禮記毛詩又入鍾山定林寺聽內典其業皆通而縱情誕節時人未之知也唯瓛與汝南周顒深器異之起家齊祕書郎遷太子舍人出爲建安太守爲政有恩信民不忍欺每伏臘放囚還家依期而返入爲尚書三公郎不拜遷司徒主簿注易又解禮記於卷背書之謂爲隱義累遷中書郎員外散騎常侍太尉從事中郎司徒右長史給事黃門侍郎太子中庶子領國子博士丹陽邑中正尚書令王儉受詔撰新禮未就而卒又使特進張緒續成之緒又卒屬在司徒竟陵王子良子良以讓庠乃置學士二十人佐庠撰錄永明十年遷侍中領步兵校尉轉爲國子祭酒鬱林嗣位庠爲后族甚見親待累遷左良尚書領驍騎中書令領臨海巴陵王師庠雖貴顯常懷止足建武初已築室郊外號曰小山恒與學徒遊處其內至是遂賣園宅欲入東山未及發聞謝朓罷吳興郡不還恐後之乃拜表辭職不待報輒去明帝大怒使御史中丞袁昂奏收庠尋有詔

許之屑以會稽山多靈異往遊焉居若邪山雲門寺初屑一兄求點並棲遁求先卒至是屑又隱世號點
爲大山屑爲小山亦曰東山永元中徵太常太子詹事並不就高祖霸府建引屑爲軍謀祭酒與書曰想
恒清豫縱情林壑致足懽也旣內絕心戰外勞物役以道養和履候無爽若邪擅美東區山川相屬前世
嘉賞是爲樂土僕推遷簿官自東徂西悟言素對用成睽闕傾首東顧曷日無懷疇昔懽遇曳裙儒肆寶
欲臥遊千載收瀛百氏一行爲吏此事遂乖屬以世道威夷仍離屯故投袂數千剋黜疊禍思得矚卷諳
款寓情古昔夫豈不懷事與願謝君清襟素託棲寄不近中居人世殆同隱淪旣俯拾青組又脫屣朱黻
但理存用捨義貴隨時往職禍萌實爲先覺超然獨善有識欽嗟今者爲邦貧賤咸恥好仁由己幸無凝
滯比別具白此未盡言今遣候承音息矯首還翰慰其引領屑不至高祖踐阼詔爲特進右光祿大夫手
敕曰吾猥當期運膺此樂推而顧己蒙蔽昧於治道雖復劬勞日昃思致隆平而先王遺範尙蘊方策自
舉之用存乎其人以兼世道澆暮爭詐繁起改俗遷風良有未易自非以儒雅弘朝高尙軌物則汨流所
至莫知其限治人之與治身獨善之與兼濟得失去取爲用孰多吾雖不學頗好博古尙想高塵每懷擊
節今世務紛亂憂責是當不得不屈道巖阿共成世美必望深達往懷不吝濡足今遣領軍司馬王果宣
旨諭意遲面在近果至屑單衣鹿巾執經卷下牀跪受詔書就席伏讀屑因謂果曰吾昔於齊朝欲陳兩

三條事一者欲正郊丘二者欲更鑄九鼎三者欲樹雙闕世傳晉室欲立闕王丞相指牛頭山云此天闕也是則未明立闕之意闕者謂之象魏縣象法於其上浹日而收之象者法也魏者當塗而高大貌也鼎者神器有國所先故王孫滿斥言楚子頓盡圖丘國郊舊典不同南郊祀五帝靈威仰之類圓丘祀天皇大帝北極大星是也往代合之郊丘先儒之巨失今梁德告始不宜遂因前謬卿宜詣闕陳之果曰僕之鄙劣豈敢輕議國典此當敬俟叔孫生耳庖曰卿詎不遣傳詔還朝拜表留與我同遊邪果愕然曰古今不聞此例庖曰檀弓兩卷皆言物始自卿而始何必有例果曰今君遂當邈然絕世猶有致身理不庖曰卿但以事見推吾年已五十七月食四斗米不盡何容得有宦情昔荷聖王眄識今又蒙旌賁甚願詣闕謝恩但比腰脚大惡此心不遂耳果還以庖意奏聞有敕給白衣尙書祿庖固辭又敕山陰庫錢月給五萬庖又不受乃敕庖曰頃者學業淪廢儒術將盡閭閻搢紳尠聞好事吾每思引獎其風未移當展興言爲歎本欲屈卿薨出開導後生旣屬廢業此懷未遂延佇之勞載盈夢想理舟虛席須俟來秋所望惠然申其宿抱耳卿門徒中經明行修厥數有幾且欲瞻彼堂堂寘此周行便可具以名聞副其勞望又曰比歲學者殊爲寡少良由無復聚徒故明經斯廢每一念此爲之慨然卿居儒宗加以德素當敕後進有意向者就卿受業想深思誨誘使斯文載興於是遣何子朗孔壽等六人於東山受學太守衡陽王元簡深

加禮敬月中常命駕式園談論終日。瘠以若邪處勢迫隘不容生徒乃遷秦望山山有飛泉西起學會卽
林成援因巖爲堵別爲小閤室寢處其中躬自啟閉僮僕無得至者山側營田二頃講隙從生徒遊之瘠
初遷將築室忽見二人著玄冠容貌甚偉問瘠曰君欲居此邪乃指一處云此中殊吉忽不復見瘠依其
言而止焉尋而山發洪水樹石皆倒拔唯瘠所居室巋然獨存元簡乃命記室參軍鍾嶸作瑞室頌刻石
以旌之及元簡去郡入山與瘠別送至都賜瘠去郡三里因曰僕自棄人事交遊路斷自非降貴山藪豈
容復望城邑此瘠之遊於今絕矣執手涕零何氏過江自晉司空充並葬吳西山瘠家世年皆不承唯祖
尙之至七十二瘠年登祖壽乃移還吳作別山詩一首言甚悽愴至吳居虎丘西寺講經論學徒復隨之
東境守宰經途者莫不畢至瘠常禁殺有虞人逐鹿鹿徑來趨瘠伏而不動又有異鳥如鶴紅色集講堂
馴狎如家禽焉初開善寺藏法師與瘠遇於秦望後還都卒於鍾山其死日瘠在般若寺見一僧授瘠香
奩并函書云呈何居士言訖失所在瘠開函乃是大莊嚴論世中未有又於寺內立明珠柱乃七日七夜
放光太守何遠以狀啟昭明太子欽其德遣舍人何思澄致手令以褒美之中大通三年卒年八十六先
是瘠疾妻江氏夢神人告之曰汝夫壽盡既有至德應獲延期爾當代之妻覺說焉俄得患而卒瘠疾乃
瘳至是瘠夢一神女并八十許人並衣衾行列至前俱拜牀下覺又見之便命營凶具旣而疾動因不自

治庸注百法論十二門論各一卷注周易十卷毛詩經義六卷毛詩隱義十卷禮記隱義二十卷禮答問五十五卷子撰亦不仕廬陵王辟爲主簿不就

阮孝緒字士宗陳留尉氏人也父彥之宋太尉從事中郎孝緒七歲出後從伯胤之胤之母周氏卒有遺財百餘萬應歸孝緒孝緒一無所納盡以歸胤之姊琅邪王晏之母聞者咸嘆異之幼至孝性沉靜雖與兒童遊戲恒以穿池築山爲樂年十三徧通五經十五冠而見其父彥之誠曰三加彌尊人倫之始宜思自勗以庇爾躬答曰願迹松子於瀛海追許由於穹谷庶保促生以免塵累自是屏居一室非定省未嘗出戶家人莫見其面親友因呼爲居士外兄王晏貴顯屢至其門孝緒度之必至顛覆常逃匿不與相見曾食醬美問之云是王家所得便吐殮覆醢及晏誅其親戚咸爲之懼孝緒曰親而不黨何坐之及竟獲免義師圍京城家貧無以饜僮妾竊隣人樵以繼火孝緒知之乃不食更令撤屋而炊所居室唯有一鹿牀竹樹環繞天監初御史中丞任昉尋其兄履之欲造而不敢望而歎曰其室雖邇其人甚遠爲名流所欽尙如此十二年與吳郡范元琰俱徵並不到陳郡袁峻謂之曰往者天地閉賢人隱今世路已清而子猶遁可乎答曰昔周德雖興夷齊不厭薇蕨漢道方盛黃綺無悶山林爲仁由己何關人世況僕非往賢之類邪後於鍾山聽講母王氏忽有疾兄弟欲召之母曰孝緒至性冥通必當自到果心驚而返鄰里嗟

之類列於鍾山顯諸王日念有弟兄弟之類
異之合藥須得生人獲舊傳鍾山所出孝緒躬歷幽險累日不值忽見一鹿前行孝緒感而隨後至一所
遂滅就視果獲此草母得服之遂愈時皆歎其孝感所致時有善筮者張有道謂孝緒曰見子隱跡而心
難明自非考之龜著無以驗也及布卦既揲五爻曰此將爲感應之法非嘉遁之兆孝緒曰安知後爻
不爲上九果成遁卦有道歎曰此謂肥遁無不利象實應德心迹并也孝緒曰雖獲遁卦而上九爻不發
升遐之道便當高謝許生乃著高隱傳上自炎黃終于天監之末斟酌分爲三品凡若干卷又著論云夫
至道之本貴在無爲聖人之跡存乎拯弊弊拯由跡跡用有乖於本本既無爲爲非道之至然不垂其跡
則世無以平不究其本則道實交喪且將存其跡故宜權晦其本老莊但明其本亦宜深抑其跡跡既
可抑數子所以有餘本方見晦尼是故不足非得一之士闕彼明智體之之徒獨懷靈識然聖已極照
反創其跡賢未居宗更冒其本良由跡須拯世非聖不能本實明理在賢可照若能體茲本跡悟彼抑揚
則孔莊之意其過半矣南平元襄王聞其名致書要之不赴孝緒曰非志驕富貴但性畏廟堂若使麀顯
可嗛何以異夫驪騮初建武末清溪宮東門無故自崩大風拔東宮門外楊樹或以問孝緒孝緒曰青溪
皇家舊宅齊爲木行東者木位今東門自壞木其衰矣鄱陽忠烈王妃孝緒之姊王嘗命駕欲就之遊孝
緒鑿垣而逃卒不肯見諸甥歲時饋遺一無所納人或怪之答云非我始願故不受也其恒所供養石像

先有損壞心欲治補經一夜忽然完復眾並異之大同二年卒時年五十八門徒誅其德行謚曰文貞處士所著七錄等書二百五十卷行於世

陶弘景字通明丹陽秣陵人也初母夢青龍自懷而出并見兩天人手執香爐來至其所已而有娠遂產弘景幼有異操年十歲得葛洪神仙傳晝夜研尋便有養生之志謂人曰仰青雲鶴白日不覺爲遠矣及長身長七尺四寸神儀明秀朗目疎眉細形長耳讀書萬餘卷善琴碁工草隸未弱冠齊高帝作相引爲諸王侍讀除奉朝請雖在朱門閉影不交外物唯以披閱爲務朝儀故事多取決焉永明十年上表辭祿詔許之賜以東帛及發公卿祖之於征虜亭供帳甚盛車馬填咽咸云宋齊以來未有斯事朝野榮之於是止于句容之句曲山恒曰此山下是第八洞宮名金壇華陽之天周回一百五十里昔漢有咸陽茅君得道來掌此山故謂之茅山乃中山立館自號華陽隱居始從東陽孫遊岳受符圖經法徧歷名山尋訪仙藥每經澗谷必坐臥其間吟詠盤桓不能已巳時沈約爲東陽郡守高其志節累書要之不至弘景爲人圓通謙謹出處冥會心如明鏡遇物便了言無煩舛有亦輒覺建武中齊宣都王鏗爲明帝所害其夜弘景夢鏗告別因訪其幽冥中事多說祕異因著夢記焉永元初更築三層樓弘景處其上弟子居其中賓客至其下與物遂絕唯一家僮得侍其旁特愛松風每聞其響欣然爲樂有時獨遊泉石望見者以

爲仙人性好著述尙奇異顧惜光景老而彌篤尤明陰陽五行風角星算山川地理方圖產物醫術本草
善帝代年麻又嘗造渾天象云修道所須非止史官是用義師平建康聞議禪代弘景援引圖讖數處皆
成梁字令弟子進之高祖旣早與之遊及卽位後恩禮逾篤書問不絕冠蓋相望天監四年移居積金東
澗善辟穀導引之法年逾八十而有壯容深慕張良之爲人云古賢莫比曾夢佛授其菩提記名爲勝力
菩薩乃詣鄧縣阿育王塔自誓受五大戒後太宗臨南徐州欽其風素召至後堂與談論數日而去太宗
甚敬異之大通初令獻二丹於高祖其一善勝一名成勝並爲佳寶大同二年卒時年八十五顏色不
變屈申如恆詔贈中散大夫諡曰貞白先生仍遣舍人監護喪事弘景遺令薄葬弟子遵而行之

諸葛瓌字幼玖琅邪陽都人世居京口瓌幼事徵士關康之博涉經史復師徵士臧榮緒榮緒著晉書稱
瓌有發摘之功方之壺遂齊建武初南徐州行事江祀薦瓌於明帝曰瓌安貧守道悅禮敦詩未嘗投刺
邦宰曳裙府寺如其簡退可以揚清厲俗請辟爲議曹從事帝許之瓌辭不去陳郡謝朓爲東海太守教
曰昔長孫東組降龍巨之節文舉北韜高通德之稱所以激貪立懦式揚風範處士諸葛瓌高風所漸結
轍前修豈懷珠披褐韜玉待價將幽貞獨往不事王侯者邪聞事親有啜菽之寔就養寡藜蒸之給豈得
獨享萬鍾而忘茲五秉可餉穀百斛天監中太守蕭琛刺史安成王秀鄱陽王恢並禮異焉瓌丁母憂毀

瘠恢累加存問服闋舉秀才不就璩性勤於誨誘後生就學者日至居宅狹陋無以容之太守張友爲起講舍璩處身清正妻子不見喜愠之色旦夕孜孜講誦不輟時人益以此宗之七年高祖敕問太守王份份卽具以實對未及徵用是年卒於家璩所著文章二十卷門人劉暉集而錄之

沈顛字處默吳興武康人也父坦之齊都官郎顛幼清靜有至行慕黃叔度徐孺子之爲人讀書不爲章句著述不尙浮華常獨處一室人罕見其面顛從叔勃貴顯齊世每還吳興賓客填咽顛不至其門勃就之顛送迎不越於閭勃歎息曰吾乃今知貴不如賤俄徵爲南郡王左常侍不就顛內行甚修事母兄最孝友爲鄉里所稱慕永明三年徵著作郎建武二年徵太子舍人俱不赴永元二年又徵通直郎亦不赴顛素不治家產值齊末兵荒與家人并日而食或有饋其梁肉者閉門不受唯以樵採自資怡怡然恆不改其樂天監四年大舉北伐訂民丁吳興太守柳惲以顛從役揚州別駕陸任以書責之惲大慙厚禮而遣之其年卒於家所著文章數十篇

劉慧斐字文宣彭城人也少博學能屬文起家安成王法曹行參軍嘗還都途經尋陽遊於匡山過處士張孝秀相得甚歡遂有終焉之志因不仕居於東林寺又於山北構園一所號曰離垢園時人乃謂爲離垢先生慧斐尤明釋典工篆隸在山手寫佛經二千餘卷常所誦者百餘卷晝夜行道孜孜不怠遠近欽

慕之太宗臨江州遣以几杖諭者云自遠法師沒後將二百年始有張劉之盛矣世祖及武陵王等書問不絕大同二年卒時年五十九

范元瑒字伯珪吳郡錢唐人也祖悅之太學博士徵不至父靈瑜居父憂以毀卒元瑒時童孺哀慕盡禮親黨異之及長好學博通經史兼精佛義然性謙敬不以所長驕人家貧惟以園蔬爲業嘗出行見人盜其菜元瑒遽退走母問其故具以實答母問盜者爲誰答曰向所以退畏其愧恥今啟其名願不泄也於是母子祕之或有涉溝盜其筍者元瑒因伐木爲橋以渡之自是盜者大慙一鄉無復草竊居常不出城市獨坐如對嚴賓見之者莫不改容正色沛國劉瓛深加器異嘗表稱之齊建武二年始徵爲安北參軍事不赴天監九年縣令管慧辨上言義行揚州刺史臨川王宏辟命不至十年王拜表薦焉竟未徵其年卒于家時年七十

劉訐字彥度平原人也父靈真齊武昌太守訐幼稱純孝數歲父母繼卒訐居喪哭泣孺慕幾至滅性赴弔者莫不傷焉後爲伯父所養事伯母及昆姊孝友篤至爲宗族所稱自傷早孤人有誤觸其諱者未嘗不感結流涕長兄絜爲之媵妻尅日成婚訐聞而逃匿事息乃還本州刺史張稷辟爲主簿不就主者檄召訐乃拄檄於樹而逃訐善立言尤精釋典曾與族兄劉歊聽講於鍾山諸寺因共卜築宋熙寺東澗有

終焉之志天監十七年卒於歆舍時年三十一臨終執歆手曰氣絕便歛畢卽埋靈筵一不須立勿設
嚮祀無求繼嗣歆從而行之宗人至友相與刊石立銘諡曰玄貞處士

劉歆字士光舒族兄也祖乘民宋冀州刺史父聞慰齊正員郎世爲二千石皆有清名歆幼有識慧四歲
喪父與羣兒同處獨不戲弄六歲誦論語毛詩意所不解便能問難十一讀莊子逍遙篇曰此可解耳客
因問之隨問而答皆有情理家人每異之及長博學有文才不娶不仕與族弟舒並隱居求志遨遊林澤
以山水書籍相娛而已常欲避人世以母老不忍違離每隨兄嚮杏從宦少時好施務周人之急人或遺
之亦不距也久而歎曰受人者必報不則有愧於人吾固無以報人豈可常有愧乎天監十七年無何而
薨革終論其辭曰死生之事聖人罕言之矣孔子曰精氣爲物遊魂爲變知鬼神之情狀與天地相似而
不違其言約其旨妙其事隱其意深未可以臆斷難得而精覈聊肆狂言請試言之夫形慮合而爲生魂
質離而稱死合則起動離則休寂當其動也人皆知其神及其寂也物莫測其所趣皆知則不言而義顯
莫測則逾辯而理微是以助華曠而莫陳姬孔抑而不說前達往賢互生異見季札云骨肉歸於土魂氣
無不之莊周云生爲徭役死爲休息尋此二說如或相反何者氣無不之神有也死爲休息神無也原憲
云夏后氏用明器示民無知也殷人用祭器示人有知也周人兼用之示民疑也考之記籍驗之前志有

無之辯不可歷言若稽諸內教判乎釋部則諸子之言可尋三代之禮無越何者神爲生本形爲生具死者神離此具而卽非彼具也雖死者不可復反而精靈遞變未嘗滅絕當其離此之日識用廓然故夏后明器示其弗反卽彼之時魂靈知滅故殷人祭器顯其猶存不存則合乎莊周猶存則同乎季札各得一隅無傷厥義設其實也則亦無故周人有兼用之禮尼父發遊魂之唱不其然乎若廢偏攜之論探中途之旨則不仁不智之譏於是乎可息夫形也者無知之質也神也者有知之性也有知不獨存依無知以自立故形之於神逆旅之館耳及其死也神去此而適彼也神已去此館何用存速朽得理也神已適彼祭何所祭祭則失理面姬孔之教不然者其有以乎蓋禮樂之興出於澆薄俎豆綴兆生於俗弊施靈筵陳棺椁設饋奠建丘隴蓋欲令孝子有追思之地耳夫何補於已遷之神乎故上古衣之以薪棄之中野可謂尊盧赫胥皇雄炎帝蹈於失理哉是以子羽沉川漢伯方壙文楚黃壤士安麻索此四子者得理也忘教也若從四子而遊則平生之志得矣然積習生常難卒改革一朝肆志儻不見從今欲翦截煩厚務存儉易進不裸尸退異常俗不傷存者之念有合至人之道孔子云斂首足形還葬而無椁斯亦貧者之禮也余何陋焉且張奐止用幅巾王肅唯盥手足范冉殮畢便葬奚珍無設筵几文度故舟爲椁子廉牛車載柩叔起誠絕墳隴康成使無卜吉此數公者尙或如之況於吾人而尙華泰今欲髣髴景行以爲軌

則備合中庸之道庶免徒費之譏氣絕不須復魂盥洗而歛以一千錢市棺單故裙衫衣巾枕履此外送往之具棺中常物及餘閣之祭一不得有所施世多信李彭之言可謂感矣余以孔釋爲師差無此感歛訖載以露車歸於舊山隨得一地地足爲塋塋足容棺不須塋費不勞封樹勿設祭饗勿置几筵無用茅君之虛座伯夷之杼水其蒸嘗繼嗣言象所絕事止余身無傷世教家人長幼內外姻戚凡厥友朋爰及寓所咸願成余之志幸勿奪之明年疾卒時年三十二歆幼時嘗獨坐空室有一老公至門謂歆曰心力勇猛能精死生但不得久滯一方耳因彈指而去歆旣長精心學佛有道人釋寶誌者時人莫測也遇歆於興皇寺驚起曰隱居學道清淨登佛如此三說歆未死之春有人爲其庭中栽柿歆謂兄子弁曰吾不見此實爾其勿言至秋而亡人以爲知命親故誅其行迹諡曰貞節處士

庾詵字彥寶新野人也幼聰警篤學經史百家無不該綜緯候書射棊算機巧並一時之絕而性託夷簡特愛林泉十畝之宅山池居半蔬食弊衣不治產業嘗乘舟從田舍還載米一百五十石有人寄載三十石旣至宅寄載者曰君三十斛我百五十石詵嘿然不言恣其取足隣人有被誣爲盜者被治劾妄款詵矜之乃以書質錢二萬令門生詐爲其親代之酬備隣人獲免謝詵曰吾矜天下無辜豈期謝也其行多如此類高祖少與詵善雅推重之及起義署爲平西府記室參軍詵不屈平生少所遊狎河東柳惲欲

與之交誼距而不納後湘東王臨荊州板爲鎮西府記室參軍不就普通中詔曰明敷振滯爲政所先旌賢求士夢佇斯急新野庾詵足棲退自事却掃經史文藝多所貫習潁川庾承先學通黃老該涉釋教並不競不營安茲枯槁可以鎮躁敦俗詵可黃門侍郎承先可中書侍郎勒州縣時加敦遺庶能屈志方冀鹽梅詵稱疾不赴晚年以後尤遵釋教宅內立道場環繞禮懺六時不輟誦法華經每日一遍後夜中忽見一道人自稱願公容止甚異呼詵爲上行先生授香而去中大通四年因晝寢忽驚覺曰願公復來不可久住顏色不變言終而卒時年七十八舉室咸聞空中唱上行先生已生彌陁淨域矣高祖聞而下詔曰旌善表行前王所敦新野庾詵荆山珠玉江陵杞梓靜侯南度固有名德獨貞苦節孤芳素履奄隨運往惻愴于懷宜諡貞節處士以顯高烈詵所撰帝麻二十卷易林二十卷續伍端休江陵記一卷晉朝雜事五卷總抄八十卷行於世子曼倩字世華亦早有令譽世祖在荊州辟爲主簿遷中錄事每出世祖常目送之謂劉之遴曰荆南信多君子雖美歸田鳳清屬桓階賞德標奇未過此子後轉諮議參軍所著喪服儀文字體例莊老義疏法算經及七曜麻術并所製文章凡九十五卷子季才有學行承聖中仕至中書侍郎江陵陷隨例入關

張孝秀字文逸南陽宛人也少仕州爲治中從事史遭母憂服闋爲建安王別駕頃之遂去職歸山居于

東林寺有田數十頃部曲數百人率以力田盡供山家遠近歸慕赴之如市孝秀性通率不好浮華常冠
敝皮巾躡蒲履手執并欄皮屨尾服寒食散盛冬能臥於石博涉羣書專精釋典善談論工隸書凡諸藝
能莫不明習普通三年卒時年四十二室中皆聞有非常香氣太宗聞甚傷悼焉與劉慧斐書述其貞白
云

庾承先字子通潁川鄆陵人也少沉靜有志操是非不涉於言喜愠不形於色人莫能窺也弱歲受學於
南陽劉虬彊記敏識出於羣輩玄經釋典靡不該悉九流七略咸所精練郡辟功曹不就乃與道士王僧
鎮同遊衡岳晚以弟疾還鄉里遂居于土臺山鄆陽忠烈王在州欽其風味要與遊處又令講老子遠近
名僧咸來赴集論難鋒起異端競至承先徐相酬答皆得所未聞忠烈王尤加欽重徵州主簿湘東王聞
之亦板爲法曹參軍並不赴中大通三年廬山劉慧斐至荊州承先與之有舊往從之荆陝學徒因請承
先講老子湘東王親命駕臨聽論議終日深相賞接留連月餘日乃還山王親祖道并贈篇什隱者美之
其年卒時年六十

陳吏部尙書姚察曰世之誣處士者多云純盜虛名而無適用蓋有負其實者若諸葛瓌之學術阮孝緒
之節閔其取進也豈難哉終於隱居固亦性而已矣

乾隆四年校刊

梁書卷五十一 列傳

十

梁書卷五十一考證

阮孝緒傳非得一之士闕彼明智體之之徒獨懷鑿識○臣人龍體之疑當作體貳二字見南齊書

梁書卷五十一考證

梁書卷五十二

唐 散 騎 常 侍 姚 思 廉 撰

列傳第四十六

止足

顧憲之 陶季直 蕭眆素

易曰亢之爲言也知進而不知退知存而不知亡知進退存亡而不失其正者其唯聖人乎傳曰知足不辱知止不殆然則不知夫進退不達乎止足殆辱之累朞月而至矣古人之進也以康世濟務也以弘道厲俗也然其進也光寵夷易故愚夫之所乾沒其退也苦節艱貞故庸曹之所忌憚雖禍敗危亡陳乎耳目而輕舉高蹈寡乎前史漢世張良功成身退病臥却粒比於樂毅范蠡至乎顛狽斯爲優矣其後薛廣德及二疏等去就以禮有可稱焉魚豢魏略知足傳方田徐於管胡則其道本異謝靈運晉書止足傳先論晉世文士之避亂者殆非其人唯阮思曠遺榮好遁遠殆辱矣宋書止足傳有羊欣王微咸其流亞齊時沛國劉瓛字子珪辭祿懷道棲遲養志不戚戚於貧賤不耽耽於富貴儒行之高者也梁有天下小人道消賢士大夫相招在位其量力守志則當世罔聞時或有致事告老或有寡志少欲國史書之亦以爲

止足傳云

顧憲之字士思吳郡吳人也祖勗之宋鎮軍將軍湘州刺史憲之未弱冠州辟議曹從事舉秀才累遷太子舍人尚書比部郎撫軍主簿元徽中爲建康令時有盜牛者被主所認盜者亦稱己牛二家辭證等前後令莫能決憲之至覆其狀謂二家曰無爲多言吾得之矣乃令解牛任其所去牛逕還本主宅盜者始伏其辜發姦隨伏多如此類時人號曰神明至於權要請託長吏貪殘據法直繩無所阿縱性又清儉羸力爲政甚得民和故京師飲酒者得醇旨輒號爲顧建康言醕清且美焉遷車騎功曹晉熙王友齊高帝執政以爲驃騎錄事參軍遷太尉西曹掾齊臺建爲中書侍郎齊高帝卽位除衡陽內史先是郡境連歲疾疫死者大半棺木尤貴悉裹以葦席棄之路傍憲之下車分告屬縣求其親黨悉令殮葬其家人絕滅者憲之爲出公祿使綱紀營護之又土俗山民有病輒云先人爲禍皆開冢剖棺水洗枯骨名爲除蠱憲之曉喻爲陳生死之別事不相由風俗遂改時刺史王奐新至唯衡陽獨無訟者乃歎曰顧衡陽之化至矣若九郡率然吾將何事還爲太尉從事中郎出爲東中郎長史行會稽郡事山陰人呂文度有寵於齊武帝於餘姚立邸頗縱橫憲之至郡卽表除之文度後還葬母郡縣爭赴弔憲之不與相聞文度深銜之卒不能傷也遷南中郎巴陵王長史加建威將軍行婺州事時司徒竟陵王於宣城臨成定陵三縣界立

屯封山澤數百里禁民樵採憲之固陳不可言甚切直王啓之曰非君無以聞此德音卽命無禁遷給事黃門侍郎兼尙書吏部郎中宋世其祖覬之嘗爲吏部於庭植嘉樹謂人曰吾爲憲之種耳至是憲之果爲此職出爲征虜長史行南兗州事遭母憂服闋建武中復除給事黃門侍郎領步兵校尉未拜仍遷太子中庶子領吳邑中正出爲寧朔將軍臨川內史未赴改授輔國將軍晉陵太守頃之遇疾陳解還鄉里永元初徵爲廷尉不拜除豫章太守有貞婦萬晞者少孀居無子事舅姑尤孝父母欲奪而嫁之誓死不許憲之賜以束帛表其節義中興二年義師平建康高祖爲揚州牧徵憲之爲別駕從事史比至高祖已受禪憲之風疾漸篤固求還吳天監二年就家授太中大夫憲之雖累經宰郡資無擔石及歸環堵不免飢寒八年卒於家年七十四臨終爲制以勅其子曰夫出生入死理均晝夜生旣不知所從死亦安識所往延陵所云精氣上歸于天骨肉下歸于地魂氣則無所不之良有以也雖復茫昧難徵要若非妄百年之期迅若馳隙吾今豫爲終制瞑目之後念並遵行勿違吾志也莊周澹臺達生者也王孫士安矯俗者也吾進不及達退無所矯常謂中都之制允理愜情衣周於身示不違禮棺周於衣足以蔽臭入棺之物一無所須載以輜車覆以纊布爲使人勿惡也漢明帝天子之尊猶祭以杆水脯糗范史雲烈士之高亦莫以寒水乾飯況吾卑庸之人其可不節衷也喪易靈臚自是親親之情禮奢靈儉差可得由吾意不須

常施靈筵可止設香燈使致哀者有憑耳朔望祥忌可權安小牀暫設几席睡下素饌勿用牲牢蒸嘗之祀貴賤罔替備物難辦多致疎怠祀先人自有舊典不可有闕自吾以下祀止用蔬食時果勿同於上世也示令子孫四時不忘其親耳孔子云雖菜羹瓜祭必齊如也本貴誠敬豈求備物哉所著詩賦銘讚并衡陽郡記數十篇

陶季直丹陽秣陵人也祖愨祖宋廣州刺史父景仁中散大夫季直早慧愨祖甚愛異之愨祖嘗以四函銀列置於前令諸孫各取季直時甫四歲獨不取人問其故季直曰若有賜當先父伯不應度及諸孫是故不取愨祖益奇之五歲喪母哀若成人初母未病令於外染衣卒後家人始贖季直抱之號慟聞者莫不酸感及長好學淡於榮利起家桂陽王國侍郎北中郎鎮西行參軍並不起時人號曰聘君父憂服闋尚書令劉秉領丹陽尹引爲後軍主簿領郡功曹出爲望蔡令頃之以病免時劉秉哀粲以齊高帝權勢日盛將圖之秉素重季直欲與之定策季直以袁劉儒者必致顛殞固辭不赴俄而秉等伏誅齊初爲尚書比部郎時褚淵爲尚書令與季直素善類以爲司空司徒主簿委以府事淵卒尚書令王儉以淵有至行欲諡爲文孝公季直請曰文孝是司馬道子諡恐其人非具美不如文簡儉從之季直又請儉爲淵立碑終始營護甚有吏節時人美之遷太尉記室參軍出爲冠軍司馬東莞太守在郡號爲清和還除散騎

侍郎領左衛司馬轉鎮西諮議參軍齊武帝作相誅鉤異己季直不能阿意明帝頗忌之乃出爲輔國長史北海太守邊職上佐素士卒爲之者或勸季直造門致謝明帝旣見便留之以爲驃騎諮議參軍兼尙書左丞仍遷建安太守政尙清靜百姓便之還爲中書侍郎遷游擊將軍兼廷尉梁臺建遷給事黃門侍郎常稱仕至二千石始願畢矣無爲務人間之事乃辭疾還鄉里天監初就家拜太中大夫高祖曰梁有天下遂不見此人十年卒于家時年七十五季直素清苦絕倫又屏居十餘載及死家徒四壁子孫無以殯斂聞者莫不傷其志焉

蕭眖素蘭陵人也祖思話宋征西儀同三司父惠明吳興太守皆有盛名眖素早孤貧爲叔父惠休所收卹起家爲齊司徒法曹行參軍遷著作佐郎太子舍人尙書三公郎永元末爲太子洗馬梁臺建高祖引爲中尉驃騎記室參軍天監初爲臨川王友復爲太子中舍人丹陽尹丞初拜高祖賜錢八萬眖素一朝散之親友又遷司徒左西屬南徐州治中性靜退少嗜欲好學能清言榮利不關於口喜怒不形於色在人間及居職並任情通率不自矜高天然簡素士人以此咸敬之及在京口便有終焉之志乃於攝山築室會徵爲中書侍郎遂辭不就因還山宅獨居屏事非親戚不得至其籬門妻太尉王儉女久與別居遂無子八年卒親故迹其事行諡曰貞文先生

史臣曰顧憲之陶季直引年者也蕭朮素則宦情鮮焉比夫懷祿耽寵婆娑人世則殊間矣

梁書卷五十三

唐 散 騎 常 侍 姚 思 廉 撰

列傳第四十七

良吏

庾 華 沈 瑀 范 述 曾 丘 仲 孚 孫 謙 伏 暉 何 遠

昔漢宣帝以為政平訟理其惟良二千石乎前史亦云今之郡守古之諸侯也故長吏之職號為親民是以導德齊禮移風易俗咸必由之齊末昏亂政移羣小賦調雲起徭役無度守宰多倚附權門互長貪虐擗克聚斂侵愁細民天下搖動無所厝其手足高祖在田知民疾苦及梁臺建仍下寬大之書昏時雜調咸悉除省於是四海之內始得息肩逮踐皇極躬覽庶事日昃聽政求民之瘼乃命輪軒以省方俗置肺石以達窮民務加隱卹舒其急病元年始去人貲計丁為布身服浣濯之衣御府無文飾宮掖不過綬綵無珠璣錦繡太官撤牢饌每日膳菜蔬飲酒不過三醖以儉先海內每選長吏務簡廉平皆召見御前親勗治道始擢尚書殿中郎到漑為建安內史左民侍郎劉讓為晉安太守漑等居官並以廉潔著又著令小縣有能遷為大縣大縣有能遷為二千石於是山陰令丘仲孚治有異績以為長沙內史武康令何遠

乾隆四年校刊 梁書卷五十三列傳

清公以爲宣城太守剖符爲吏者往往承風焉若新野庾肇諸任職者以經術潤飾吏政或所居流惠或去後見思蓋後來之良吏也綴爲良吏篇云

庾肇字休野新野人也父深之宋應州刺史肇年十歲遭父憂居喪毀瘠爲州黨所稱弱冠爲州迎主簿舉秀才累遷安西主簿尙書殿中郎驃騎功曹史博涉羣書有口辯齊永明中與魏和親以肇兼散騎常侍報使還拜散騎侍郎知東宮管記事鬱林王卽位廢掌中書詔誥出爲荊州別駕仍遷西中郎諮議參軍復爲州別駕前後綱紀皆致富饒肇再爲之清身率下杜絕請託布被蔬食妻子不免飢寒明帝聞而嘉焉手敕褒美州里榮之遷司徒諮議參軍通直散騎常侍高祖平京邑霸府建引爲驃騎功曹參軍遷尙書左丞出爲輔國長史會稽郡丞行郡府事時承凋弊之後百姓凶荒所在穀貴米至數千人多流散羣撫循甚有治理唯守公祿清節逾厲至有經日不舉火太守襄陽王聞而饋之肇謝不受天監元年卒停屍無以殮柩不能歸高祖聞之詔賜絹百匹米五十斛初肇爲西楚望族早歷顯官鄉人樂藹有幹用素與肇不平互相陵競藹事齊豫章王嶷嶷藹仕不得志自步兵校尉求助成歸荊州時肇爲州別駕益忽藹及高祖踐阼藹以西朝勳爲御史中丞肇始得會稽行事既恥之矣會職事微有譴高祖以藹其鄉人也使宣旨誨之肇大憤故發病卒

沈瑀字伯瑜吳興武康人也叔父昶事宋建平王景素景素謀反昶先去之及敗坐繫獄瑀詣臺陳請得免罪由是知名起家州從事奉朝請嘗詣齊尚書右丞殷瀨瀨與語及政事甚器之謂曰觀卿才幹當居吾此職司徒竟陵王子良聞瑀名引爲府參軍領揚州部傳從事時建康令沈徽爭恃勢陵瑀瑀以法繩之衆憚其疆子良甚相知賞雖家事皆以委瑀子良薨瑀復事刺史始安王遙光嘗被使上民丁速而無怨遙光謂同使曰爾何不學沈瑀所爲乃令專知州獄事湖熟縣方山埭高峻冬月公私行侶以爲艱難明帝使瑀行治之瑀乃開四洪斷行客就作三日立辦揚州書佐私行詐稱州使不肯就作瑀鞭之三十書佐歸訴遙光遙光曰沈瑀必不枉鞭汝覆之果有詐明帝復使瑀築赤山塘所費減材官所量數十萬帝益善之永泰元年爲建德令教民一丁種十五株桑四株柿及梨栗女丁半之人咸歡悅頃之成林去官還京師兼行選曹郎隨陳伯之軍至江州會義師圍郢城瑀說伯之迎高祖伯之泣曰余子在都不得出城不能不愛之瑀曰不然人情例例皆思改計若不早圖衆散難合伯之遂舉衆降瑀從在高祖軍中初瑀在竟陵王家素與范雲善齊末嘗就雲宿夢坐屋梁柱上仰見天中字曰范氏宅至是瑀爲高祖說之高祖曰雲得不死此夢可驗及高祖卽位雲深薦瑀自暨陽令擢兼尚書右丞時天下初定陳伯之表瑀催督運轉軍國獲濟高祖以爲能遷尚書駕部郎兼右丞如故瑀薦族人沈僧隆僧照有吏幹高祖並

納之以母憂去職起爲振武將軍餘姚令縣大姓虞氏千餘家請謁如市前後令長莫能絕自瑀到非訟所通其有至者悉立之堦下以法繩之縣南又有豪族數百家子弟縱橫遞相庇蔭厚自封植百姓甚患之瑀召其老者爲石頭倉監少者補縣僮皆號泣道路自是權右屏跡瑀初至官吏皆解衣美服以自彰別瑀怒曰汝等下縣吏何自擬貴人耶悉使著芒屨布侍立終日足有蹉跌輒加榜捶瑀微時嘗自至此鬻瓦器爲富人所辱故因以報焉由是士庶駭怨然瑀廉白自守故得遂行其志後王師北伐徵瑀爲建威將軍督運漕尋兼都水使者頃之遷少府卿出爲安南長史尋陽太守江州刺史曹景宗疾篤瑀行府州事景宗卒仍爲信威蕭穎達長史太守如故瑀性崛彊每忤穎達穎達銜之天監八年因入諮事辭又激厲穎達作色曰朝廷用君作行事耶瑀出謂人曰我死而後已終不能傾側面從是日於路爲盜所殺時年五十九多以爲穎達害焉子續累訟之遇穎達亦尋卒事遂不窮竟續乃布衣蔬食終其身

范述曾字子玄吳郡錢唐人也幼好學從餘杭呂道惠受五經略通章句道惠學徒常有百數獨稱述曾曰此子必爲王者師齊文惠太子竟陵文宣王幼時高帝引述曾爲之師友起家爲宋晉熙王國侍郎齊初至南郡王國郎中令遷尙書主客郎太子步兵校尉帶開陽令述曾爲人審諤在官多所諫爭太子雖不能全用然亦弗之罪也竟陵王深相器重號爲周舍時太子左衛率沈約亦以述曾方汲黯以父母年

老乞還就養乃拜中散大夫明帝卽位除游擊將軍出爲永嘉太守爲政清平不尙威猛民俗便之所部橫陽縣山谷嶮峻爲逋逃所聚前後二千石討捕莫能息述曾下車開示恩信凡諸凶黨羅貢而出編戶屬籍者二百餘家自是商賈流通居民安業在郡勵志清白不受饋遺明帝甚嘉之下詔褒美焉徵爲游擊將軍郡送故舊錢二十餘萬述曾一無所受始之郡不將家屬及還吏無荷擔者民無老少皆出拜辭號哭聞于數十里東昏時拜中散大夫還鄉里高祖踐阼乃輕舟出詣闕仍辭還東高祖詔曰中散大夫范述曾昔在齊世忠直奉主往莅永嘉治身廉約宜加禮秩以厲清操可太中大夫賜絹二十四匹述曾生平得奉祿皆以分施及老遂壁立無所資以天監八年卒時年七十九注易文言著雜詩賦數十篇

丘仲孚字公信吳興烏程人也少好學從祖靈鞠有人倫之鑒常稱爲千里駒也齊永明初選爲國子生舉高第末調還鄉里家貧無以自資乃結羣盜爲之計晝劫掠三吳仲孚聰明有智略羣盜畏而服之所行皆果故亦不發太守徐嗣君補主簿歷揚州從事太學博士于湖令有能名太守呂文顯當時倖臣陵誡屬縣仲孚獨不爲之屈以父喪去職明帝卽位起爲烈武將軍曲阿令值會稽太守王敬則舉兵反乘朝廷不備反問始至而前鋒已屈曲阿仲孚謂吏民曰賊乘勝雖銳而烏合易離今若收船艦鑿長嶺埭瀉瀆水以阻其路得留數日臺軍必至則大事濟矣敬則軍至值瀆涸果頓兵不得進遂敗散仲孚以距

守有功遷山陰令居職甚有聲稱百姓爲之謠曰二傅沈劉不如一丘前世傅琰父子沈憲劉玄明相繼宰山陰並有政績言仲孚皆過之也齊末政亂頗有贓賄爲有司所舉將收之仲孚竊逃逕京師詣闕會赦得不治高祖踐阼復爲山陰令仲孚長於撥煩善適權變吏民敬服號稱神明治爲天下第一起遷車騎長史長沙內史視事未暮徵爲尙書右丞遷左丞仍擢爲衛尉卿恩任甚厚初起雙闕以仲孚領大匠事畢出爲安西長史南郡太守遷雲麾長史江夏太守行郢州州府事遭母憂起攝職坐事除名復起爲司空參軍俄遷豫章內史在郡更勵清節頃之卒時年四十八詔曰豫章內史丘仲孚重試大邦責以後效非直悔吝云亡實亦政績克舉不幸殞喪良以傷惻可贈給事黃門侍郎仲孚喪將還豫章老幼號哭攀送車輪不得前仲孚爲左丞撰皇典二十卷南宮故事百卷又撰尙書具事雜儀行於世焉

孫謙字長遜東莞莒人也少爲親人趙伯符所知謙年十七伯符爲豫州刺史引爲左軍行參軍以治幹稱父憂去職客居歷陽躬耕以養弟妹鄉里稱其敦睦宋江夏王義恭聞之引爲行參軍歷仕大司馬太宰二府出爲句容令清慎彊記縣人號爲神明泰始初事建安王休仁休仁以爲司徒參軍言之明帝擢爲明威將軍巴東建平二郡太守郡居三峽恒以威力鎮之謙將述職敕募千人自隨謙曰蠻夷不賓蓋待之失節耳何煩兵役以爲國費固辭不受至郡布恩惠之化蠻獠懷之競餉金寶謙慰喻而遣一無所

納及掠得生口皆放還家俸秩出吏民者悉原除之郡境翕然威信大著視事二年徵遷爲撫軍中兵參軍元徵初遷梁州刺史辭不赴職遷越騎校尉征北司馬府主簿建平王將稱兵患謙彊直託事遣使京師然後作亂及建平誅遷左軍將軍齊初爲監朔將軍錢唐令治煩以簡獄無繫囚及去官百姓以謙在職不受餉遺追載繖帛以送之謙却不受每去官輒無私宅常借官空車廄居焉永明初爲冠軍長史江夏太守坐被代輒去郡繫尙方頃之免爲中散大夫明帝將廢立欲引謙爲心膂使兼衛尉給甲仗百人謙不願處際會輒散甲士帝雖不罪而弗復任焉出爲南中郎司馬東昏永元元年遷缺二大夫天監六年出爲輔國將軍零陵太守已衰老猶彊力爲政吏民安之先是郡多虎暴謙至絕迹及去官之夜虎卽害居民謙爲郡縣常勤勸課農桑務盡地利收入常多於隣境九年以年老徵爲光祿大夫旣至高祖嘉其清潔甚禮異焉每朝見猶請劇職自效高祖笑曰朕使卿智不使卿力十四年詔曰光祿大夫孫謙清慎有聞白首不怠高年舊齒宜加優秩可給親信二十人并給扶謙自少及老歷二縣五郡所在廉潔居身儉素牀施蘆蔭屏風冬則布被莞席夏日無幃帳而夜臥未嘗有蚊蚋人多異焉年逾九十彊壯如五十者每朝會輒先衆到公門力於仁義行己過人甚遠兄靈慶常病寄於謙謙出行還問起居靈慶曰向飲冷熱不調卽時猶渴謙退遣其妻有彭城劉融者行乞疾篤無所歸友人輿送謙舍謙開廳事以待之

及融死以禮殯葬之衆咸服其行義十五年卒官時年九十二詔賻錢三萬布五十四高祖爲舉哀甚悼惜之謙從子廉便辟巧宦齊時已歷大縣尙書右丞天監初沈約范雲嘗朝用事廉傾意奉之及中書舍人黃睦之等亦尤所結附凡貴要每食廉必日進滋旨皆手自煎調不辭勤劇遂得爲列卿御史中丞晉陵吳興太守時廣陵高爽有險薄才客於廉廉委以文記爽嘗有求不稱意乃爲履謎以喻廉曰刺鼻不知噉蹠面不知噉齧齒作步數持此得勝人譏其不計恥辱以此取名位也

伏暉字玄耀曼容之子也幼傳父業能言玄理與樂安任昉彭城劉曼俱知名起家齊奉朝請仍兼太學博士尋除東陽郡丞秩滿爲鄞令時曼容已致仕故類以外職處暉令其得養焉齊末始爲尙書都官郎仍爲衛軍記室參軍高祖踐阼遷國子博士父憂去職服闋爲車騎諮議參軍累遷司空長史中書侍郎前軍將軍兼五經博士與吏部尙書徐勉中書侍郎周捨總知五禮事出爲永陽內史在郡清潔治務安靜郡民何貞秀等一百五十四人詣州言狀湘州刺史以聞詔勘有十五事爲吏民所懷高祖善之徵爲東陽太守在郡清恪如永陽時民賦稅不登者輒以太守田米助之郡多麻苧家人乃至無以爲繩其屬志如此屬縣始新遂安海寧並同時生爲立祠徵爲國子博士領長水校尉時始興內史何遠累著清績高祖詔擢爲黃門侍郎俄遷信武將軍監吳郡暉自以名輩素在遠前爲吏俱稱廉白遠累見擢暉遷階

而已意望不滿多託疾居家尋求假到東陽迎妹喪因留會稽築宅自表解高祖詔以爲豫章內史暉乃出拜治書御史虞瞻奏曰臣聞失忠與信一心之道以虧貌是情非兩觀之誅宜及未有陵犯名教要冒君親而可緯俗經邦者也風聞豫章內史伏暉去歲啟假以迎妹喪爲解因停會稽不去入東之始貨宅賣車以此而推則是本無還意暉歷典二邦少免貪濁此自爲政之本豈得稱功常謂人才品望居何遠之右而遠以清公見擢名位轉隆暉深誣怨形於辭色與居歎咤寤寐失圖天高聽卑無私不照去年十二月二十一日詔曰國子博士領長水校尉伏暉爲政廉平宜加將養勿使志望致虧士風可豫章內史豈有人臣奉如此之詔而不亡魂破膽歸罪有司擢髮抽腸少自論謝而循奉傲然了無異色暉識見所到足達此旨而冒寵不辭忝斯苟得故以士流解體行路沸騰辨跡求心無一可恕竊以暉踉蹌落魄三十餘年皇運勃興咸與維始除舊布新濯之江漢一紀之間三世隆顯曾不能少懷感激仰答萬分反覆拙謀成茲巧罪不忠不敬於斯已及請以暉大不敬論以事詳法應棄市刑輒收所近獄洗結以法從事如法所稱暉卽主臣謹案豫章內史臣伏暉含疵表行藉悖成心語嘿一違資敬兼盡幸屬昌時擢以不次溪壑可盈志欲無滿要君東走豈曰止足之歸負志解巾異乎激處之致甘此脂膏孰非荼苦佩茲龜組豈殊繅紱宣明風憲肅正簡書臣等參議請以見事免暉所居官凡諸位任一皆削除有詔勿治暉遂

得就郡視事三年徵爲給事黃門侍郎領國子博士未及起普通元年卒於郡時年五十九尙書右僕射徐勉爲之墓誌其一章曰東區南服愛結民胥相望伏闕繼軌奏書或臥其轍或扳其車或圖其像或式其閭思耿借寇曷以尙諸初暉父曼容與樂安任瑤皆暉於齊太尉王儉瑤子昉及暉並見知頃之昉才遇稍盛齊末昉已爲司徒右長史暉猶滯於參軍事及其終也名位略相侔性儉素車服羸惡外雖退靜內不免心競故見譏於時能推薦後來常若不及少年士子或以此依之

何遠字義方東海鄆人也父慧炬齊尙書郎遠釋褐江夏王國侍郎轉奉朝請永元中江夏王寶玄於京口爲護軍將軍崔慧景所奉入圍宮城遠豫其事事敗乃亡抵長沙宣武王王深保匿焉遠求得桂陽王融保藏之旣而發覺收捕者至遠逾垣以免融及遠家人皆見執融遂遇禍遠家屬繫尙方遠亡渡江使其故人高江產共聚衆欲迎高祖義師東昏黨聞之使捕遠等衆復潰散遠因降魏入壽陽見刺史王肅欲同義舉肅不能用乃求迎高祖肅許之遣兵援送得達高祖高祖見遠謂張弘策曰何遠美丈夫而能破家報舊德未易人也板輔國將軍隨軍東下旣破朱雀軍以爲建康令高祖踐阼爲步兵校尉以奉迎勳封廣興男邑三百戶遷建武將軍後軍鄱陽王恢錄事參軍遠與恢素善在府盡其志力知無不爲恢亦推心仗之恩寄甚密頃之遷武昌太守遠本倜儻尙輕俠至是乃折節爲吏杜絕交遊饋遺秋毫無所

受武昌俗皆汲江水盛夏遠懸水溫每以錢買民井寒水不取錢者則撻水還之其侈事率多如此跡雖似僞而能委曲用意焉車服尤弊素器物無銅漆江左多水族甚賤遠每食不過乾魚數片而已然性剛嚴吏民多以細事受鞭罰者遂爲人所訟徵下廷尉被劾數十條當時士大夫坐法皆不受立遠度已無憾就立三七日不款猶以私藏禁仗除名後起爲鎮南將軍武康令愈厲廉節除淫祀正身率職民甚稱之太守王彬巡屬縣諸縣盛供帳以待焉至武康遠獨設糗水而已彬去遠送至境進斗酒隻鵝爲別彬戲曰卿禮有過陸納將不爲古人所笑乎高祖聞其能擢爲宣城太守自縣爲近畿大郡近代未之有也郡經寇抄遠盡心綏理復著名迹期年遷樹功將軍始興內史時泉陵侯淵朗爲桂州緣道剽掠入始興界草木無所犯遠在官好開途巷修葺牆屋民居市里城隍廢庫所過若營家焉田秩俸錢並無所取歲暮擇民尤窮者充其租調以此爲常然其聽訟猶人不能過絕而性果斷民不敢非畏而惜之所至皆生爲立祠表言治狀高祖每優詔答焉天監十六年詔曰何遠前在武康已著廉平復莅二邦彌盡清白政先治道惠留民愛雖古之良二千石無以過也宜升內榮以顯外績可給事黃門侍郎遠卽還仍爲仁威長史頃之出爲信武將軍監吳郡在吳頗有酒失遷東陽太守遠處職疾疆富如仇讎視貧細如子弟特爲豪右所畏憚在東陽歲餘復爲受罰者所謗坐免歸遠耿介無私曲居民間絕請謁不造詣與貴賤書

疏抗禮如一其所會遇未嘗以顏色干人以此多爲俗士所惡其清公實爲天下第一居數郡見可欲終不變其心妻子飢寒如下貧者及去東陽歸家經年歲口不言榮辱士類益以此多之其輕財好義周人之急言不虛妄蓋天性也每戲語人云卿能得我一妄語則謝卿以一縑衆共同之不能記也後復起爲征西諮議參軍中撫司馬普通二年卒時年五十二高祖厚贈賜之

陳吏部尙書姚察曰前史有循吏何哉世使然也漢武役繁姦起循平不能故有苛酷誅戮以勝之亦多怨濫矣梁興破觚爲圓斲雕爲樸教民以孝悌勸之以農桑於是桀黠化爲由余輕薄變爲忠厚淳風已治民自知禁堯舜之民比屋可封信矣若夫酷吏於梁無取焉

唐 散 騎 常 侍 姚 思 廉 撰

列傳第四十八

諸夷

海南諸國 東夷 西北諸戎

海南諸國大抵在交州南及西南大海洲上相去近者三千里遠者二三萬里其西與西域諸國接漢元鼎中遣伏波將軍路博德開百越置日南郡其徼外諸國自武帝以來皆朝貢後漢桓帝世大秦天竺皆由此道遣使貢獻及吳孫權時遣宣化從事朱應中郎康泰通焉其所經及傳聞則有百數十國因立記傳晉代通中國者蓋渺故不載史官及宋齊至者有十餘國始爲之傳自梁革運其泰正朔脩貢職航海歲至踰於前代矣今採其風俗粗著者綴爲海南傳云

林邑國者本漢日南郡象林縣古越裳之界也伏波將軍馬援開漢南境置此縣其地縱廣可六百里城去海百二十里去日南界四百餘里北接九德郡其南界水步道二百餘里有西國夷亦稱王馬援植兩銅柱表漢界處也其國有金山石皆赤色其中生金金夜則出飛狀如螢火又出瑇瑁貝齒吉貝沉香

吉貝者樹名也其華成時如鵝毳抽其緒紡之以作布潔白與紵布不殊亦染成五色織爲斑布也沉水者土人斫斷之積以歲年朽爛而心節獨在置水中則沉故名曰沉香次不沉不浮者曰窳香也漢末大亂功曹區達殺縣令自立爲王傳數世其後王無嗣立外甥范熊熊死子逸嗣晉成帝咸康三年逸死奴文篡立文本日南西捲縣夷帥范稚家奴常牧牛於山澗得鱧魚二頭化而爲鐵因以鑄刀鑄成文向石而呪曰若斫石破者文當王此國因舉刀斫石如斷芻藁文心獨異之范稚常使之商賈至林邑因教林邑王作宮室及兵車器械王寵任之後乃譏王諸子各奔餘國及王死無嗣文僞於隣國迓王子置毒於漿中而殺之遂脅國人自立舉兵攻旁小國皆吞滅之有衆四五萬人時交州刺史姜莊使所親韓戢謝稚前後監日南郡並貪殘諸國患之穆帝永和三年臺遣夏侯覽爲太守侵刻尤甚林邑先無田土食日南地肥沃常欲略有之至是因民之怨遂舉兵襲日南殺覽以其屍祭天留日南三年乃還林邑交州刺史朱藩後遣督護劉雄戍日南文復屠滅之進寇九德郡殘害吏民遣使告藩願以日南北境橫山爲界藩不許又遣督護陶綏李衢討之文歸林邑尋復屯日南五年文死子佛立猶屯日南征西將軍桓温遣督護滕峻九真太守灌窳帥交廣州兵討之佛嬰城固守窳令峻盛兵於前窳帥勁卒七百人自後踰壘而入佛衆驚潰奔走窳追至林邑佛乃請降哀帝昇平初復爲寇暴刺史温放之討破之安帝隆安三年

佛孫須達復寇日南執太守吳源又進寇九德執太守曹炳交趾太守杜瑗還都護鄧逸等擊破之卽以瑗爲刺史義熙三年須達復寇日南殺長史瑗遣海邏督護阮斐討破之斬獲甚衆九年須達復寇九真行郡事杜慧期與戰斬其息交龍王甄知及其將范健等生俘須達息邾能及虜獲百餘人自瑗卒後林邑無歲不寇日南九德諸郡殺蕩甚多交州遂致虛弱須達死子敵真立其弟敵鎧攜母出奔敵真追恨不能容其母弟捨國而之天竺禪位於其甥國相藏麟固諫不從其甥旣立而殺藏麟藏麟子又攻殺之而立敵鎧同母異父之弟曰文敵文敵後爲扶南王子當根純所殺大臣范諸農平其亂而自立爲王諸農死子陽邁立宋永初二年遣使貢獻以陽邁爲林邑王陽邁死子咄立篡其父復曰陽邁其國俗居處爲閩名曰子闌門戶皆北向書樹葉爲紙男女皆以橫幅吉貝繞腰以下謂之干漫亦曰都縵穿耳貫小銀貴者著草屣賤者跣行自林邑扶南以南諸國皆然也其王著法服加瓔珞如佛像之飾出則乘象吹螺擊鼓單吉貝繖以吉貝爲幡旗國不設刑法有罪者使象踏殺之其大姓號婆羅門嫁娶必用八月女先求男由賤男而貴女也同姓還相婚姻使婆羅門引婿見婦握手相付咒曰吉利吉利以爲成禮死者焚之中野謂之火葬其寡婦孤居散髮至老國王事尼乾道鑄金銀人像六十圍元嘉初陽邁侵暴日南九德諸郡交州刺史杜弘文建牙欲討之聞有代乃止八年又寇九德郡入四會浦口交州刺史阮彌之

遣隊主相道生帥兵赴討攻區粟城不剋乃引還爾後頻年遣使貢獻而寇盜不已二十三年使交州刺史檀和之振武將軍宗懋伐之和之遣司馬蕭景憲爲前鋒陽邁聞之懼欲輸金一萬斤銀十萬斤還所略日南民戶其大臣薈僧達諫止之乃遣大帥范扶龍戍其北界區粟城景憲攻城剋之斬扶龍首獲金銀雜物不可勝計乘勝逕進卽剋林邑陽邁父子並挺身逃奔獲其珍異皆是未名之寶又銷其金人得黃金數十萬斤和之後病死見胡神爲崇孝武建元大明中林邑王范神成累遣長史奉表貢獻明帝泰豫元年又遣使獻方物齊永明中范文贊累遣使貢獻天監九年文贊子天凱奉獻白猴詔曰林邑王范天凱介在海表乃心款至達脩職貢良有可嘉宜班爵號被以榮澤可持節督緣海諸軍事威南將軍林邑王十年十三年天凱累遣使獻方物俄而病死子弼毳跋摩立奉表貢獻普通七年王高式勝鑿遣使獻方物詔以爲持節督緣海諸軍事綏南將軍林邑王大通元年又遣使貢獻中大通二年行林邑王高式律陀羅跋摩遣使貢獻詔以爲持節督緣海諸軍事綏南將軍林邑王六年又遣使獻方物

扶南國在日南郡之南海西大灣中去日南可七千里在林邑西南三千餘里城去海五百里有大江廣十里西北流東入於海其國輪廣三千餘里土地澇下而平博氣候風俗大較與林邑同出金銀銅錫沉香象牙孔翠五色鸚鵡其南界三千餘里有頓遜國在海崎上地方千里城去海十里有五王並羈屬

扶南頓遜之東界通交州其西界接天竺安息徼外諸國往還交市所以然者頓遜廻入海中千餘里漲海無崖岸船舶未曾得逕過也其市東西交會日有萬餘人珍物寶貨無所不有又有酒樹似安石榴采其花汁停瓮中數日成酒頓遜之外大海洲中又有毗騫國去扶南八千里傳其王身長丈二頭長三尺自古來不死莫知其年王神聖國中人善惡及將來事王皆知之是以無敢欺者南方號曰長頸王國俗有室屋衣服噉粳米其人言語小異扶南有山出金露生石上無所限也國法刑罪人並於王前噉其肉國內不受估客有往者亦殺而噉之是以商旅不敢至王常樓居不血食不事鬼神其子孫生死如常人唯王不死扶南王數遣使與書相報答常遣扶南王純金五十人食器形如圓盤又如瓦塼名爲多羅受五升又如椀者受一升王亦能作天竺書書可三千言說其宿命所由與佛經相似並論善事又傳扶南東界卽大漲海海中有大洲洲上有諸薄國國東有馬五洲復東行漲海千餘里至自然大洲其上有樹生火中洲左近人剝取其皮紡績作布極得數尺以爲手巾與焦麻無異而色微青黑若小垢洿則投火中復更精潔或作燈炷用之不知盡扶南國俗本裸文身被髮不制衣裳以女人爲王號曰柳葉年少壯健有似男子其南有徼國有事鬼神者字混滇夢神賜之弓乘賈人舶入海混填晨起卽詣廟於神樹下得弓便依夢乘船入海遂入扶南外邑柳葉人衆見舶至欲取之混填卽張弓射其舶穿度一面矢及

侍者柳葉大懼舉衆降混填混填乃教柳葉穿布貫頭形不復露遂治其國納柳葉爲妻生子分王七邑
其後王混盤況以詐力閒諸邑令相疑阻因舉兵攻并之乃遣子孫中分治諸邑號曰小王盤況年九十
餘乃死立中子盤盤以國事委其大將范蔓盤立三年死國人共舉蔓爲王蔓勇健有權略復以兵威
攻伐旁國咸服屬之自號扶南大王乃治作大船窮漲海攻屈都昆九稚典孫等十餘國開地五六千里
次當伐金隣國蔓遇疾遣太子金生代行蔓姊子旃旃時爲二千人將因篡蔓自立遣人詐金生而殺之蔓
死時有乳下兒名長在民間至年二十乃結國中壯士襲殺旃旃大將范尋又殺長而自立更繕治國內
起觀閣遊戲之朝旦中晡三四見客民人以焦蔗龜鳥爲禮國法無牢獄有罪者先齋戒三日乃燒斧極
赤令訟者捧行七步又以金銀雞卵投沸湯中令採取之若無實者手卽焦爛有理者則不又於城溝中
養鱷魚門外圈猛獸有罪者輒以餵猛獸及鱷魚魚獸不食爲無罪三日乃放之鱷大者長二丈餘狀如
鼉有四足喙長六七尺兩邊有齒利如刀劍常食魚遇得麋鹿及人亦噉之蒼梧以南及外國皆有之吳
時遣中郎康泰宣化從事朱應使於尋國國人猶裸唯婦人著貫頭泰應謂曰國中寶佳但人褻露可怪
耳尋始令國內男子著橫幅橫幅今千縷也大家乃截錦爲之貧者乃用布晉武帝太康中尋始遣使貢
獻穆帝升平元年王竺旃檀奉表獻馴象詔曰此物勞費不少駐令勿送其後王儵陳如本天竺婆羅門

也有神語曰應王扶南僑陳如心悅南至盤盤扶南人聞之舉國欣戴迎而立焉復改制用天竺法橋陳如死後王持黎陀跋摩宋文帝世奉表獻方物齊永明中王闍邪跋摩遣使貢獻天監二年跋摩復遣使送珊瑚佛像并獻方物詔曰扶南王僑陳如闍邪跋摩介居海表世纂南服厥誠遠著重譯獻琛宜蒙酬納班以榮號可安南將軍扶南王今其國人皆醜黑拳髮所居不穿井數十家共一池引汲之俗事天神天神以銅爲像二面者四手四面者八手手各有所持或小兒或鳥獸或日月其王出入乘象嬪侍亦然王坐則偏踞翹膝垂左膝至地以白疊敷前設金盆香鑪於其上國俗居喪則剃除鬚髮死者有四葬水葬則投之江流火葬則焚爲灰燼土葬則瘞埋之烏葬則棄之中野人性貪吝無禮義男女恣其奔隨十年十三年跋摩累遣使貢獻其年死庶子留陀跋摩殺其嫡弟自立十六年遣使竺當抱老奉表貢獻十八年復遣使送天竺旃檀瑞像婆羅樹葉并獻火齊珠鬱金蘇合等香普通元年中大通二年大同元年累遣使獻方物五年復遣使獻生犀又言其國有佛髮長一丈二尺詔遣沙門釋雲寶隨使往迎之先是三年八月高祖改造阿育王寺塔出舊塔下舍利及佛爪髮髮青紺色衆僧以手伸之隨手長短放之則旋屈爲蠶形案僧伽經云佛髮青而細猶如藕莖絲佛三昧經云我昔在宮沐頭以尺量髮長一丈二尺放已右旋還成蠶文則與高祖所得同也阿育王卽鐵輪王王闍浮提一天下佛滅度後一日一夜役

鬼神造八萬四千塔此卽其一也吳時有尼居其地爲小精舍孫綝尋毀除之塔亦同泯吳平後諸道人復於舊處建立焉晉中宗初渡江更脩飾之至簡文咸安中使沙門安法師程造小塔未及成而亡弟子僧顯繼而修立至孝武太元九年上金相輪及承露其後西河離石縣有胡人劉薩何遇疾暴亡而心下猶暖其家未敢便殯經十日更蘇說云有兩吏見錄向西北行不測遠近至十八地獄隨報重輕受諸楚毒見觀世音語云汝緣未盡若得活可作沙門洛下齊城丹陽會稽並有阿育王塔可往禮拜若壽終則不墮地獄語竟如墮高巖忽然醒寤因此出家名慧達遊行禮塔次至丹陽未知塔處乃登越城四望見長千里有異氣色因就禮拜果是育王塔所屢放光明由是定知必有舍利乃集衆就掘之入一丈得三石碑並長六尺中一碑有鐵函函中有銀函函中又有金函盛三舍利及爪髮各一枚髮長數尺卽遷舍利近北對簡文所造塔西造一層塔十六年又使沙門僧尙伽爲三層卽高祖所開者也初穿土四尺得龍窟及昔人所捨金銀鑽釵釵鑷等諸雜寶物可深九尺許方至石磔磔下有石函函內有鐵壺以盛銀坩坩內有金鏤罍盛三舍利如粟粒大圓正光潔函內又有琉璃碗內得四舍利及髮爪爪有四枚並爲沉香色至其月二十七日高祖又到寺禮拜設無尋大會大赦天下是日以金鉢盛水泛舍利其最小者隱鉢不出高祖禮數十拜舍利乃於鉢內放光旋回久之乃當鉢中而止高祖問大僧正慧念今日見不

可思議事不慧念蒼曰法身常住湛然不動高祖曰弟子欲請一舍利還臺供養至九月五日又於寺設無尋大會遣皇太子王侯朝貴等奉迎是日風景明和京師傾屬觀者百數十萬人所設金銀供具等物並留寺供養并施錢一千萬爲寺基業至四年九月十五日高祖又至寺設無尋大會暨二刹各以金罌次玉罌重盛舍利及爪髮內七寶塔中又以石函盛寶塔分入兩刹下及王侯妃主百姓富室所捨金銀鑽劍等珍寶充積十一年十一月二日寺僧又請高祖於寺發般若經題爾夕二塔俱放光明敕鎮東將軍邵陵王綸製寺大功德碑文先是二年改造會稽鄞縣塔開舊塔出舍利遣光宅寺釋敬脫等四僧及舍人孫照暨迎還臺高祖禮拜竟卽送還縣入新塔下此縣塔亦是劉薩何所得也晉咸和中丹陽尹高惔行至張侯橋見浦中五色光長數尺不知何怪乃令人於光處掇視之得金像未有光趺惔乃下車載像還至長干巷首牛不肯進惔乃令馭人任牛所之牛徑牽車至寺惔因留像付寺僧每至中夜常放光明又聞空中有金石之響經一歲捕魚人張係世於海口忽見有銅花趺浮出水上係世取送縣縣以送臺乃施像足宛然合會簡文咸安元年交州合浦人董宗之採珠沒水於底得佛光豔交州押送臺以施像又合焉自咸和中得像至咸安初歷三十餘年光趺始具初高惔得像後西域胡僧五人來詣惔曰昔於天竺得阿育王造像來至鄴下值胡亂埋像於河邊今尋覓失所五人嘗一夜俱夢見像曰已出江東

爲高悞所得悞乃送此五僧至寺見像噓歔涕泣像便放光照燭殿宇又瓦官寺慧邃欲模寫像形寺主僧尙慮虧損金色謂邃曰若能令像放光回身西向乃可相許慧邃便懇到拜請其夜像卽轉坐放光回身西向明旦便許模之像跌先有外國書莫有識者後有三藏邨求跋摩識之云是阿育王爲第四女所造也及大同中出舊塔舍利敕市寺側數百家宅地以廣寺域造諸堂殿并瑞像周回閣等窮於輪奐焉其圖諸經變並吳人張繇運手繇丹青之工一時冠絕

盤盤國宋文帝元嘉孝武孝建大明中並遣使貢獻大通元年其王使使奉表曰揚州閭浮提震旦天子萬善莊嚴一切恭敬猶如天淨無雲明耀滿目天子身心清淨亦復如是道俗濟濟並蒙聖王光化濟度一切永作舟航臣聞之慶善我等至誠敬禮常勝天子足下稽首問訊今奉薄獻願垂哀受中大通元年五月累遣使貢牙像及塔并獻沉檀等香數十種六年八月復使送菩提國舍利及畫塔并獻菩提樹葉詹糖等香

丹丹國中大通二年其王遣使奉表曰伏承聖主至德仁治信重三寶佛法興顯衆僧殷集法事日盛威嚴整肅朝望國執慈愍蒼生八方六合莫不歸服化隣諸天非可言喻不任慶善若躉奉見尊足謹奉送牙像及塔各二軀并獻火齊珠吉貝雜香藥等大同元年復遣使獻金銀瑠璃雜寶香藥等物

于隄利國在南海洲上其俗與林邑扶南略同出斑布吉貝檳榔檳榔特精好爲諸國之極宋孝武世王釋婆羅那憐隨遣長史竺留隨獻金銀寶器天監元年其王瞿曇脩跋隨羅以四月八日夢見一僧謂之曰中國今有聖主十年之後佛法大興汝若遣使貢奉敬禮則土地豐樂商旅百倍若不信我則境土不得自安脩跋隨羅初未能信既而又夢此僧曰汝若不信我當與汝往觀之乃於夢中來至中國拜覲天子既覺心異之隨羅本工畫乃寫夢中所見高祖容質飾以丹青仍遣使并畫工奉表獻玉盤等物使人既至模寫高祖形以還其國比本畫則符同焉因盛以寶函日加禮敬後跋隨死子毗邪跋摩立十七年遣長史毗員跋摩奉表曰常勝天子陛下諸佛世尊常樂安樂大通三達爲世間尊是名如來應供正覺遺形舍利造諸塔像莊嚴國土如須彌山邑居聚落次第羅滿城郭館宇如切利天宮具足四兵能伏怨敵國土安樂無諸患難人民和善受化正法慶無不通猶處雪山流注雪水八味清淨百川洋溢周回屈曲順趨大海一切衆生咸得受用於諸國土殊勝第一是名震旦大梁揚郡天子仁膺四海德合天心雖人是天降生護世功德寶藏救世大悲爲我尊生威儀具足是故至誠敬禮天子足下稽首問訊奉獻金芙蓉雜香藥等願垂納受普通元年復遣使獻方物

狼牙脩國在南海中其界東西三十日行南北二十日行去廣州二萬四千里土氣物產與扶南略同偏

多纓沉婆律香等其俗男女皆袒而被髮以吉貝爲干縵其王及貴臣乃加雲霞布覆脚以金繩爲絡帶金銀貫耳女子則被布以瓔珞繞身其國累塼爲城重門樓閣王出乘象有幡旄旗鼓罩白蓋兵衛甚設國人說立國以來四百餘年後嗣衰弱王族有賢者國人歸之王聞知乃加囚執其鏢無故自斷王以爲神因不敢害乃斥逐出境遂奔天竺天竺妻以長女俄而狼牙王死大臣迎還爲王二十餘年死子婆伽達多立天監十四年遣使阿撤多奉表曰大吉天子足下離淫怒癡哀愍衆生慈心無量端嚴相好身光明朗如水月中月普照十方肩間白毫其白如雪其色照曜亦如月光諸天善神之所供養以垂正法寶梵行衆增莊嚴都邑城閣高峻如乾陁山樓觀羅列道途平正人民熾盛快樂安穩著種種衣猶如天服於一切國爲極尊勝天王愍念羣生民人安樂慈心深廣律儀清淨正法化治供養三寶名稱宣揚布滿世界百姓樂見如月初生譬如梵王世界之主人天一切莫不歸依敬禮大吉天子足下猶如現前忝承先業慶嘉無量今遣使問訊大意欲自往復畏大海風波不達今奉薄獻願大家曲垂領納

婆利國在廣州東南海中洲上去廣州二月日行國界東西五十日行南北二十日行有一百三十六聚土氣暑熱如中國之盛夏穀一歲再熟草木膏榮海出文螺紫貝有石名蚌貝羅初採之柔軟及刻削爲物乾之遂大堅韞其國人披吉貝如屨及爲都縵王乃用斑絲布以瓔珞繞身頭著金冠高尺餘形如弁

綴以七寶之飾帶金裝劍偏坐金高坐以銀蹬支足侍女皆爲金花雜寶之飾或持白毳拂及孔雀扇王
出以象駕輿輿以雜香爲之上施羽蓋珠簾其導從吹螺擊鼓王姓憍陳如自古未通中國問其先及年
數不能記焉而言白淨王夫人卽其國女也天監十六年遣使奉表曰伏承聖王倚重三寶興立塔寺校
飾莊嚴周徧國土四衢平坦清淨無穢臺殿羅列狀若天宮壯麗微妙世無與等聖主出時四兵具足羽
儀導從布滿左右都人士女麗服光飾市廛豐富充積珍寶王法清整無相侵奪學徒皆至三乘競集數
說正法雲布雨潤四海流通交會萬國長江眇漫清冷深廣有生咸資莫能消穢陰陽和暢災厲不作大
梁揚都聖王無等臨覆上國有大慈悲子育萬民平等忍辱怨親無二加以周窮無所藏積靡不照燭如
日之明無不受樂猶如淨月宰輔賢良羣臣貞信盡忠奉上心無異想伏惟皇帝是我真佛臣是婆利國
主今敬稽首禮聖王足下惟願大王知我此心此心久矣非適今也山海阻遠無緣自達今故遣使獻金
席等表此丹誠普通三年其王頻伽復遣使珠貝智貢白鸚鵡青蟲兜整瑠璃器吉貝螺杯雜香藥等數
十種

中天竺國在大月支東南數千里地方三萬里一名身毒漢世張騫使大夏見卍竹杖蜀布國人云市之
身毒身毒卽天竺蓋傳譯音字不同其實一也從月支高附以西南至西海東至槃越列國數十每國置

王其名雖異皆身毒也漢時羈屬月支其俗土著與月支同而卑濕暑熱民弱畏戰弱於月支國臨大江名新陶源出崑崙分爲五江總名曰恒水其水甘美下有真鹽色正白如水精土俗出犀象貂鼯瑇瑁火齊金銀鐵金縷織成金皮屬細摩白疊好裘毳毼火齊狀如雲母色如紫金有光耀別之則薄如蟬翼積之則如紗縠之重沓也其西與大秦安息交市海中多大秦珍物珊瑚琥珀金碧珠璣琅玕鬱金蘇合蘇合是合諸香汁煎之非自然一物也又云大秦人採蘇合先筭其汁以爲香膏乃賣其滓與諸國買人是

以展轉來達中國不大香也鬱金獨出屬賓國薛色正黃而細與芙蓉華裏被蓮者相似國人先取以上佛寺積日香稿乃蕪去之賈人從寺中徵顧以轉賣與佗國也漢桓帝延熹九年大秦王安敦遣使自日南徼外來獻漢世唯一通焉其國人行賈往往至扶南日南交趾其南徼諸國人少有到大秦者孫權黃武五年有大秦賈人字秦論來到交趾交趾太守吳邈遣送詣權權問方士謠俗論具以事對時諸葛恪討丹陽獲黝歛短人論見之曰大秦希見此人權以男女各十人差吏會稽劉咸送論咸於道物故論乃徑還本國漢和帝時天竺數遣使貢獻後西域反叛遂絕至桓帝延熹二年四年頻從日南徼外來獻魏晉世絕不復通唯吳時扶南王范旃遣親人蘇物使其國從扶南發投拘利口循海大灣中正西北入歷灣邊數國可一年餘到天竺江口逆水行七千里乃至焉天竺王驚曰海濱極遠猶有此人卽呼令觀視

國內仍差陳宋等二人以月支馬四匹報稱遺物等還積四年方至其時吳遣中郎康泰使扶南及見陳宋等具問天竺土俗云佛道所興國也人民敦厯土地饒沃其王號茂論所都城郭水泉分流繞于渠壑下注大江其宮殿皆雕文鏤刻街曲市里屋舍樓觀鍾鼓音樂服飾香華水陸通流百賈交會奇玩珍瓏恣心所欲左右嘉維舍衛葉波等十六大國去天竺或二三百里共尊奉之以爲在天地之中也天監初其王屈多遣長史竺羅達奉表曰伏聞彼國據江傍海山川周固衆妙悉備莊嚴國土猶如化城宮殿莊飾街巷平坦人民充滿歡娛安樂大王出遊四兵隨從聖明仁愛不害衆生國中臣民循行正法大王仁聖化之以道慈悲羣生無所遺棄常修淨戒式導不及無上法船沉弱以濟百官氓庶受樂無恐諸天護持萬神侍從天魔降服莫不歸仰王身端嚴如日初出仁澤普潤猶如大雲於彼震且最爲殊勝臣之所住國土首羅天守護令國安樂王王相承未曾斷絕國中皆七寶形像衆妙莊嚴臣自脩檢如化王法臣名屈多弈世王種惟願大王聖體和平今以此國羣臣民庶山川珍重一切歸屬五體投地歸誠大王使人竺達多由來忠信是故今遣大王若有所須珍奇異物悉當奉送此之境土便是大王之國王之法令善道悉當承用願二國信使往來不絕此信返還願賜一使具宣聖命備勅所宜款至之誠望不空返所白如允願加採納今奉獻琉璃唾壺雜香吉貝等物

師子國天竺旁國也其地和適無冬夏之異五穀隨人所種不須時節其國舊無人民止有鬼神及龍居之諸國商估來共市易鬼神不見其形但出珍寶顯其所堪價商人依價取之諸國人聞其土樂因此競至或有停住者遂成大國晉義熙初始遣獻玉像經十載乃至像高四尺二寸玉色潔潤形製殊特殆非人工此像歷晉宋世在瓦官寺寺先有徵士戴安道手製佛像五軀及顧長康維摩畫圖世人謂爲三絕至齊東昏遂毀玉像前截臂次取身爲嬖妾潘貴妃作釵釧宋元嘉六年十二年其王刹利摩訶遣使貢獻大通元年後王伽葉伽羅訶梨邪使奉表曰謹白大梁明主雖山海殊隔而音信時通伏承皇帝道德高遠覆載同於天地明照齊乎日月四海之表無有不從方國諸王莫不奉獻以表慕義之誠或泛海三年陸行千日畏威懷德無遠不至我先王以來唯以脩德爲本不嚴而治奉事正法道天下欣人爲善慶若己身欲與大梁共弘三寶以度難化信還伏聽告敕今奉薄獻願垂納受

東夷之國朝鮮爲大得箕子之化其器物猶有禮樂云魏時朝鮮以東馬韓辰韓之屬世通中國自晉過江泛海東使有高句驪百濟而宋齊間常通職貢梁興又有加焉扶桑國在昔未聞也普通中有道人稱自彼而至其言元本尤悉故并錄焉

高句驪者其先出自東明東明本北夷驩離王之子離王出行其侍兒於後任娠離王還欲殺之侍兒曰

前見天上有氣如大雞子來降我因以有娠王囚之後遂生男王置之豕牢豕以口氣噓之不死王以爲神乃聽收養長而善射王忌其猛復欲殺之東明乃奔走南至淹滯水以弓擊水魚鼈皆浮爲橋東明乘之得渡至夫餘而王焉其後支別爲句驪種也其國漢之玄菟郡也在遼東之東去遼東千里漢魏世南與朝鮮穢貊東與沃沮北與夫餘接漢武帝元封四年滅朝鮮置玄菟郡以高句驪爲縣以屬之句驪地方可二千里中有遼山遼水所出其王都於丸郡之下多大山深谷無原澤百姓依之以居食澗水雖土著無良田故其俗節食好治宮室於所居之左立大屋祭鬼神又祠零星社稷人性凶急喜寇抄其官有相加對盧沛者古鄒加主簿優台使者卑衣先人尊卑各有等級言語諸事多與夫餘同其性氣衣服有異本有五族有消奴部絕奴部慎奴部薩奴部桂婁部本消奴部爲王微弱桂婁部代之漢時賜衣幘朝服鼓吹常從玄菟郡受之後稍驕不復詣郡但於東界築小城以受之至今猶名此城爲幘溝婁溝婁者句驪名城也其置官有對盧則不置沛者有沛者則不置對盧其俗喜歌舞國中邑落男女每夜羣聚歌戲其人潔清自喜善藏釀跪拜申一脚行步皆走以十月祭天大會名曰東明其公會衣服皆錦繡金銀以自飾大加主簿頭所著似幘而無後其小加著折風形如弁其國無牢獄有罪者則會諸加評議殺之沒入妻子其俗好淫男女多相奔誘已嫁娶便稍作送終之衣其死葬有椁無棺好厚葬金銀財幣盡於

送死積石爲封列植松栢兄死妻嫂其馬皆小便登山國人尙氣力便弓矢刀矛有鎧甲習戰鬪沃沮東
穢皆屬焉王莽初發高驪兵以伐胡不欲行彊迫遣之皆亡出塞爲寇盜州郡歸咎於句驪侯嗣嚴尤誘
而斬之王莽大悅更名高句驪爲下句驪當此時爲侯矣光武八年高句驪王遣使朝貢始稱王至殤安
之間其王名宮數寇遼東玄菟太守蔡風討之不能禁宮死子伯固立順和之間復數犯遼東寇抄靈帝
建寧二年玄菟太守耿臨討之斬首虜數百級伯固乃降屬遼東公孫度之雄海東也伯固與之通好伯
固死子伊夷摸立伊夷摸自伯固時已數寇遼東又受亡胡五百餘戶建安中公孫康出軍擊之破其國
焚燒邑落降胡亦叛伊夷摸伊夷摸更作新國其後伊夷摸復擊玄菟玄菟與遼東合擊大破之伊夷摸
死子位宮立位宮有勇力便鞍馬善射獵魏景初二年遣太傅司馬宣王率衆討公孫淵位宮遣主簿大
加將兵千人助軍正始三年位宮寇西安嘉平五年幽州刺史母丘儉將萬人出玄菟討位宮位宮將步
騎二萬人逆軍大戰於沸流位宮敗走儉軍追至峴懸車東馬登丸都山屠其所都斬首虜萬餘級位宮
單將妻息遠竄六年儉復討之位宮輕將諸加奔沃沮儉使將軍王頌追之絕沃沮千餘里到肅慎南界
刻石紀功又到丸都山銘不耐城而還其後復通中夏晉永嘉亂鮮卑慕容廆據昌黎大棘城元帝授平
州刺史句驪王乙弗利頻寇遼東廆不能制弗利死子劉代立康帝建元元年慕容廆子晃率兵伐之劉

與戰大敗軍馬奔走晁乘勝追至丸都焚其宮室掠男子五萬餘口以歸孝武太元十年句驪攻遼東玄菟郡後燕慕容垂遣弟農伐句驪復二郡垂死子寶立以句驪王安爲平州牧封遼東帶方二國王安始置長史司馬參軍官後略有遼東郡至孫高璉晉安帝義熙中始奉表通貢職歷宋齊並授爵位年百餘歲死子雲齊隆昌中以爲使持節散騎常侍都督營平二州征東大將軍樂浪公高祖卽位進雲車騎大將軍天監七年詔曰高驪王樂浪郡公雲乃誠款著貢驛相尋宜隆秩命式弘朝典可撫東大將軍開府儀同三司持節常侍都督王並如故十一年十五年累遣使貢獻十七年雲死子安立普通元年詔安纂襲封爵持節督營平二州諸軍事遼東將軍七年安卒子延立遣使貢獻詔以延襲爵中大通四年六年大同元年七年累奉表獻方物太清二年延卒詔以其子襲延爵位

百濟者其先東夷有三韓國一曰馬韓二曰辰韓三曰弁韓弁韓辰韓各十二國馬韓有五十四國大國萬餘家小國數千家總十餘萬戶百濟卽其一也後漸疆大兼諸小國其國本與句驪在遼東之東晉世句驪旣略有遼東百濟亦據有遼西晉平二郡地矣自置百濟郡晉太元中王須義熙中王餘映宋元嘉中王餘毗並遣獻生口餘毗死立子慶慶死子牟都立都死立子牟太齊永明中除大都督百濟諸軍事鎮東大將軍百濟王天監元年進太號征東將軍尋爲高句驪所破衰弱者累年遷居南韓地普通二年

王餘隆始復遣使奉表稱累破句驪今始與通好而百濟更爲疆國其年高祖詔曰行都督百濟諸軍事鎮東大將軍百濟王餘隆守藩海外遠脩貢職廼誠款到朕有嘉焉宜率舊章授茲榮命可使持節都督百濟諸軍事寧東大將軍百濟王五年隆死詔復以其子明爲持節督百濟諸軍事綬東將軍百濟王號所治城曰固麻謂邑曰檐魯如中國之言郡縣也其國有二十二檐魯皆以子弟宗族分據之其人形長衣服淨潔其國近倭頗有文身者今言語服章略與高麗同行不張拱拜不申足則異呼帽曰冠襦曰複衫袴曰禪其言參諸夏亦秦韓之遺俗云中大通六年大同七年累遣使獻方物并請涅盤等經義毛詩博士并工匠畫師等敕並給之太清三年不知京師寇賊猶遣使貢獻既至見城闕荒毀並號慟涕泣侯景怒囚執之及景平方得還國

新羅者其先本辰韓種也辰韓亦曰秦韓相去萬里傳言秦世亡人避役來適馬韓馬韓亦割其東居之以秦人故名之曰秦韓其言語名物有似中國人名國爲邦弓爲弧賊爲寇行酒爲行觴相呼皆爲徒不與馬韓同又辰韓王常用馬韓人作之世相係辰韓不得自立爲王明其流移之人故也恆爲馬韓所制辰韓始有大國稍分爲十二新羅則其一也其國在百濟東南五千餘里其地東濱大海南北與句驪百濟接魏時曰新盧宋時曰新羅或曰斯羅其國小不能自通使聘普通二年王名募泰始使使隨百濟

牽馱方物其俗呼城曰健牟羅其邑在內曰喙評在外曰邑勒亦中國之言郡縣也國有六喙評五十二邑勒土地肥美宜植五穀多桑麻作縑布服牛乘馬男女有別其官名有子賁旱支齊旱支謁旱支壹告支奇貝旱支其冠曰遺子禮襦曰尉解袴曰柯半靴曰洗其拜及行與高驪相類無文字刻木爲信語言符百濟而後通焉

倭者自云太伯之後俗皆文身去帶方萬二千餘里大抵在會稽之東相去絕遠從帶方至倭循海水行歷韓國乍東乍南七千餘里始度一海海闊千餘里名瀚海至一支國又度一海千餘里名未盧國又東南陸行五百里至伊都國又東南行百里至奴國又東行百里至不彌國又南水行二十日至投馬國又南水行十日陸行一月日至祁馬臺國卽倭王所居其官有伊支馬次曰彌馬獲支次曰奴往靺民種禾稻紵麻蠶桑織績有薑桂橘椒蘇出黑雉真珠青玉有獸如牛名山鼠又有大蛇吞此獸蛇皮堅不可斫其上有孔乍開乍閉時或有光射之中蛇則死矣物產略與儋耳朱崖同地溫暖風俗不淫男女皆露紵富貴者以錦繡雜采爲帽似中國胡公頭食飲用籩豆其死有棺無槨封土作冢人性皆嗜酒俗不知正歲多壽考多至八九十或至百歲其俗女多男少貴者至四五妻賤者猶兩三妻婦人無媼妬無盜竊少靜訟若犯法輕者沒其妻子重則滅其宗族漢靈帝光和中倭國亂相攻伐歷年乃共立一女子卑彌呼

爲王彌呼無夫婿挾鬼道能惑衆故國人立之有男弟佐治國自爲王少有見者以婢千人自侍唯使一男子出入傳教令所處宮室常有兵守衛至魏景初三年公孫淵誅後卑彌呼始遣使朝貢魏以爲親魏王假金印紫綬正始中卑彌呼死更立男王國中不服更相誅殺復立卑彌呼宗女臺與爲王其後復立男王並受中國爵命晉安帝時有倭王贊贊死立弟彌彌死立子濟濟死立子興興死立弟武齊建元中除武持節督新羅任那伽羅秦韓幕韓六國諸軍事鎮東大將軍高祖卽位進武號征東將軍其南有侏儒國人長三四尺又南黑齒國裸國去倭四千餘里船行可一年至又西南萬里有海人身黑眼白裸而醜其肉美行者或射而食之

文身國在倭國東北七千餘里人體有文如獸其額上有三文文直者貴文小者賤土俗歡樂物豐而賤行客不齋糧有屋宇無城郭其王所居飾以金銀珍麗繞屋爲塹廣一丈實以水銀雨則流于水銀之上市用珍寶犯輕罪者則鞭杖犯死罪則置猛獸食之有枉則猛獸避而不食經宿則赦之

大漢國在文身國東五千餘里無兵戈不攻戰風俗並與文身國同而言語異

扶桑國者齊永元元年其國有沙門慧深來至荊州說云扶桑在大漢國東二萬餘里地在中國之東其土多扶桑木故以爲名扶桑葉似桐而初生如筍國人食之實如梨而赤續其皮爲布以爲衣亦以爲綿

作板屋無城郭有文字以扶桑皮爲紙無兵甲不攻戰其國法有南北獄若犯輕者入南獄重罪者入北獄有赦則赦南獄不赦北獄在北獄者男女相配生男八歲爲奴生女九歲爲婢犯罪之身至死不出貴人有罪國乃大會坐罪人於坑對之宴飲分訣若死別焉以灰繞之其一重則一身屏退二重則及子孫三重則及七世名國王爲乙祁貴人第一者爲大對盧第二者爲小對盧第三者爲納咄沙國王行有鼓角導從其衣色隨年改易甲乙年青丙丁年赤戊己年黃庚辛年白壬癸年黑有牛角甚長以角載物至勝二十斛車有馬車牛車鹿車國人養鹿如中國畜牛以乳爲酪爲桑梨經年不壞多蒲桃其地無鐵有銅不貴金銀市無租估其婚姻婿往女家門外作屋晨夕灑掃經年而女不悅卽驅之相悅乃成婚婚禮大抵與中國同親喪七日不食祖父母喪五日不食兄弟伯叔姑姊妹三日不食設靈爲神像朝夕拜奠不制縷經嗣王立三年不視國事其俗舊無佛法宋大明二年罽賓國嘗有比丘五人游行至其國流通佛法經像教令出家風俗遂改慧深又云扶桑東千餘里有女國容貌端正色甚潔白身體有毛髮長委地至二三月競入水則任娠六七月產子女人胸前無乳項後生毛根白毛中有汁以乳子一百日能行三四年則成人矣見人驚避偏畏丈夫食鹹草如禽獸鹹草葉似邪蒿而氣香味鹹天監六年有晉安人渡海爲風所飄至一島登岸有人居止女則如中國而言語不可曉男則人身而狗頭其聲如吠其食有

小豆其衣如布築土爲牆其形圓其戶如竇云

西北諸戎漢世張騫始發西域之迹甘英遂臨西海或遣侍子或奉貢獻于時雖窮兵極武僅而克捷比之前代其略遠矣魏時三方鼎峙日事干戈晉氏平吳以後少獲寧息徒置戍己之官諸國亦未賓從也繼以中原喪亂胡人遞起西域與江東隔礙重譯不交呂光之涉龜茲亦猶蠻夷之伐蠻夷非中國之意也自是諸國分并勝負強弱難得詳載明珠翠羽雖仍於後宮蒲梢龍文希入於外署有梁受命其奉正朔而朝闕庭者則仇池宕昌高昌鄧至河南龜茲于闐滑諸國焉今綴其風俗爲西北戎傳云

河南王者其先出自鮮卑慕容氏初慕容奕洛干有二子庶長曰吐谷渾嫡曰鹿洛干卒鹿嗣位吐谷渾避之西徙鹿追留之而牛馬皆西走不肯還因遂徙上隴度枹罕出涼州西南至赤水而居之其地則張掖之南隴西之西在河之南故以爲號其界東至壘川西隣于闐北接高昌東北通秦嶺方千餘里蓋古之流沙地焉乏草木少水潦四時恒有冰雪唯六七月雨雹甚盛若晴則風飄沙礫常蔽光景其地有麥無數有青海方數百里放牝馬其側輒生駒土人謂之龍種故其國多善馬有屋宇雜以百子帳卽穹廬也著小袖袍小口袴大頭長裙帽女子披髮爲辮其後吐谷渾孫葉延頗識書記自謂曾祖奕洛干始封昌黎公吾蓋公孫之子也禮以王父字爲國氏因姓吐谷渾亦爲國號至其末孫阿材始受中國官爵弟

子慕延宋元嘉末又自號河南王慕延死從弟拾寅立乃用書契起城池築宮殿其小王並立宅國中有佛法拾寅死子度易侯立易侯死子休留代立齊永明中以代爲使持節都督西秦河沙三州鎮西將軍護羌校尉西秦河二州刺史梁興進代爲征西將軍代死子休運籌襲爵位天監十三年遣使獻金裝馬腦鍾二口又表於益州立九層佛寺詔許焉十五年又遣使獻赤舞龍駒及方物其使或歲再三至或再歲一至其地與益州鄰常通商賈民慕其利多往從之教其書記爲之辭譯稍桀黠矣普通元年又秦獻方物籌死子呵羅真立大通三年詔以爲寧西將軍護羌校尉西秦河二州刺史真死子佛輔襲爵位其世子又遣使獻白龍駒於皇太子

高昌國闕氏爲主其後爲河西王沮渠茂虔弟無諱襲破之其王闕爽奔于芮芮無諱據之稱王一世而滅國人又立麴氏爲王名嘉元魏授車騎將軍司空都督秦州諸軍事秦州刺史金城郡開國公在位二十四年卒諡曰昭武王子子堅使持節驃騎大將軍散騎常侍都督瓜州諸軍事瓜州刺史河西郡開國公儀同三司高昌王嗣位其國蓋車師之故地也南接河南東連燉煌西次龜茲北鄰敕勒置四十六鎮交河田地高寧臨川橫截柳婆洿林新興由寧始昌篤進白刀等皆其鎮名官有四鎮將軍及雜號將軍長史司馬門下校郎中兵校郎通事舍人通事令史諮議校尉主簿國人言語與中國略同有五經歷

代史諸子集面貌類高驪髮垂之於背著長身小袖袍縵褶袴女子頭髮辮而不垂著錦繡瓔珞環釧
姻有六禮其地高燥築土爲城架木爲屋土覆其上寒暑與益州相似備植九穀人多噉麩及羊牛肉出
良馬蒲陶酒石鹽多草木草實如蠶蠶中絲如細纒名爲白疊子國人多取織以爲布布甚軟白交市用
焉有朝烏者旦旦集王殿前爲行列不畏人日出然後散去大同中子堅遣使獻鳴鹽枕蒲陶良馬氍毹
等物

滑國者車師之別種也漢永建元年八滑從班勇擊北虜有功勇上八滑爲後部親漢侯自魏晉以來不
通中國至天監十五年其王厭帶栗栗始遣使獻方物普通元年又遣使獻黃師子白貂裘波斯錦等
物七年又奉表貢獻元魏之居桑乾也滑猶爲小國屬芮芮後稍疆大征其旁國波斯盤盤罽賓焉耆龜
茲疎勒姑墨于闐旬盤等國開地千餘里土地溫暖多山川樹木有五穀國人以麩及羊肉爲糧其獸有
師子兩脚駱駝野驢有角人皆善射著小袖長身袍用金玉爲帶女人被裘頭上刻木爲角長六尺以金
銀飾之少女子兄弟共妻無城郭氈屋爲居東向開戶其王坐金牀隨太歲轉與妻並坐接客無文字以
木爲契與旁國通則使旁國胡爲胡書羊皮爲紙無職官事天神火神每日則出戶祀神而後食其跪一
拜而止葬以木爲槨父母死其子截一耳葬訖卽吉其言語待河南人譯然後通

周古柯國滑旁小國也普通元年使使隨滑來獻方物呵跋檀國亦滑旁小國也凡滑旁之國衣服容貌皆與滑同普通元年使使隨滑使來獻方物胡蜜丹國亦滑旁小國也普通元年使使隨滑使來獻方物白題國王姓支名史稽殺其先蓋匈奴之別種胡也漢灌嬰與匈奴戰斬白題騎一人今在滑國東去滑六日行西極波斯土地出粟麥瓜果食物略與滑同普通三年遣使獻方物

龜茲者西域之舊國也後漢光武時其王名弘爲莎車王賢所殺滅其族賢使其子則羅爲龜茲王國人又殺則羅匈奴立龜茲貴人身毒爲王由是屬匈奴然龜茲在漢世常爲大國所都曰延城魏文帝初卽位遣使貢獻晉太康中遣子入侍太元七年秦主苻堅遣將呂光伐西域至龜茲龜茲王帛純載寶出奔光入其城城有三重外城與長安城等室屋壯麗飾以琅玕金玉光立帛純弟震爲王而歸自此與中國絕不通普通二年王尼瑞摩珠那勝遣使奉表貢獻

于闐國西域之屬也後漢建武末王俞爲莎車王賢所破徙爲驪歸王以其弟君得爲于闐王暴虐百姓患之永平中其種人都末殺君得大人休莫霸又殺都末自立爲王霸死兄子廣得立後擊虜莎車王賢以歸殺之遂爲疆國西北諸小國皆服從其地多水潦沙石氣溫宜稻麥蒲桃有水出玉名曰玉河國人善鑄銅器其治曰西山城有屋室市井菓蔬菜蔬與中國等尤敬佛法王所居室加以朱畫王冠金幘如

今胡公帽與妻並坐接客國中婦人皆辮髮衣裘袴其人恭相見則跪其跪則一膝至地書則以木爲筆札以玉爲印國人得書戴於首而後開札魏文帝時王山習獻名馬天監九年遣使獻方物十三年又獻波羅婆步鄣十八年又獻瑠璃罌大同七年又獻外國刻玉佛

渴盤陁國于闐西小國也西鄰滑國南接罽賓國北連沙勒國所治在山谷中城周迴十餘里國有十二城風俗與于闐相類衣吉貝布著長身小袖袍小口袴地宜小麥資以爲糧多牛馬駱駝羊等出好氈金玉王姓葛沙氏中大同元年遣使獻方物

末國漢世且末國也勝兵萬餘戶北與丁零東與白題西與波斯接土人剪髮著氈帽小袖衣爲衫則開頸而縫前多牛羊驢驘其王安末深盤普通五年遣使來貢獻

波斯國其先有波斯匿王者子孫以王父字爲氏因爲國號國有城周迴三十二里城高四丈皆有樓觀城內屋宇數百千間城外佛寺二三百所西去城十五里有土山山非過高其勢連接甚遠中有鷺鳥噉羊土人極以爲患國中有優鉢曇花鮮華可愛出龍駒馬鹹池生珊瑚樹長一二尺亦有琥珀馬腦真珠攻珣等國內不以爲珍市買用金銀婚姻法下聘訖女婿將數十人迎婦婿著金線錦袍師子錦袴戴天冠婦亦如之婦兄弟便來捉手付度夫婦之禮於茲永畢國東與滑國西及南俱與婆羅門國北與汎憐

國接中大通二年遣使獻佛牙

宕昌國在河南之東南益州之西北隴西之西羌種也宋孝武世其王梁瓚忽始獻方物天監四年王梁彌博來獻甘草當歸詔以爲使持節都督河涼二州諸軍事安西將軍東羌校尉河涼二州刺史隴西公宕昌王佩以金章彌博死子彌泰立大同十年復授以父爵位其衣服風俗與河南略同

鄧至國居西涼州界羌別種也世號持節平北將軍西涼州刺史宋文帝時王象屈就遣使獻馬天監元年詔以鄧至王象舒彭爲督西涼州諸軍事號安北將軍五年舒彭遣使獻黃者四百斤馬四匹其俗呼帽曰突何其衣服與宕昌同

武興國本仇池楊難當自立爲秦王宋文帝遣裴方明討之難當奔魏其兄子文德又聚衆於盧宋因授以爵位魏又攻之文德奔漢中從弟僧嗣又自立復戍於盧卒文德弟文度立以弟文洪爲白水太守屯武興宋世以爲武都王武興之國自於此矣難當族弟廣香又攻殺文度自立爲陰平王於盧鎮主卒子晃立晃死子崇祖立崇祖死子孟孫立齊永明中魏氏南梁州刺史仇池公楊靈珍據泥切山歸款齊世以靈珍爲北梁州刺史仇池公文洪死以族人集始爲北秦州刺史武都王天監初以集始爲使持節都督秦雍二州諸軍事輔國將軍平羌校尉北秦州刺史武都王靈珍爲冠軍將軍孟孫爲假節督沙州刺

史陰平王集始死子紹先襲爵位二年以靈珍爲持節督隴右諸軍事左將軍北梁州刺史仇池王十年孟孫死詔贈安沙將軍北雍州刺史子定襲封爵紹先死子智慧立大同元年剋復漢中智慧遵使上表求率四千戶歸國詔許焉卽以爲東益州其國東連秦嶺西接宕昌去宕昌八百里南去漢中四百里北去岐州三百里東去長安九百里本有十萬戶世世分滅其大姓有符氏姜氏言語與中國同著烏皐突騎帽長身小袖袍小口袴皮鞞地植九穀婚姻備六禮知書疏種桑麻出紬絹精布漆蠟椒等山出銅鐵芮芮國蓋匈奴別種魏晉世匈奴分爲數百千部各有名號芮芮其一部也自元魏南遷因擅其故地無城郭隨水草畜牧以穹廬爲居辮髮衣錦小袖袍小口袴深雍鞞其地苦寒七月流澌亘河宋昇明中遣王洪軌使焉引之共伐魏齊建元元年洪軌始至其國國王率三十萬騎出燕然山東南三千餘里魏人閉關不敢戰後稍侵弱永明中爲丁零所破更爲小國而南移其居天監中始破丁零復其舊土始築城郭名曰木末城十四年遣使獻烏貂裘普通元年又遣使獻方物是後數歲一至焉大同七年又獻馬一匹金一斤其國能以術祭天而致風雪前對皎日後則泥濘橫流故其戰敗莫能追及或於中夏爲之則曠而不雨問其故以暝云

史臣曰海南東夷西北戎諸國地窮邊裔各有疆域若山奇海異怪類殊種前古未聞往讎不記故知九

州之外八荒之表辯方物土莫究其極高祖以德懷之故朝貢歲至美矣

乾隆四年校刊

梁書卷五十四列傳

十六

樂書卷五十四

梁書卷五十四考證

海南諸國傳叙自武帝以來皆朝貢○朝貢南本作獻見

林邑國傳陽邁死子咄立篡其父復曰陽邁○篡疑作纂然考南史亦同此

扶南國傳十六年又使沙門僧佉伽爲三層○伽南史作加

中天竺國傳積日香稿○稿應作稿

滑國傳自魏晉以來不通中國○監本來字下缺三字今增入

樂書卷五十四考證

梁書卷五十五

唐 散 騎 常 侍 姚 思 廉 撰

列傳第四十九

豫章王綜 武陵王紀 臨賀王正德 河東王譽

豫章王綜字世謙高祖第二子也天監三年封豫章郡王邑二千戶五年出爲使持節都督南徐州諸軍事仁威將軍南徐州刺史尋進號北中郎將十年遷都督郢司霍三州諸軍事雲磨將軍郢州刺史十三年遷安右將軍領石頭戍軍事十五年遷西中郎將兼護軍將軍又遷安前將軍丹陽尹十六年復爲北中郎將南徐州刺史普通二年入爲侍中鎮右將軍置佐史初其母吳淑媛自齊東昏宮得幸於高祖七月而生綜宮中多疑之者及淑媛寵衰怨望遂陳疑似之說故綜懷之旣長有才學善屬文高祖御諸子以禮朝見不甚數綜恒怨不見知每出藩淑媛恒隨之鎮至年十五六尙嫖祖嬙戲於前晝夜無別內外咸有穢議綜在徐州政刑酷暴又有勇力手制奔馬常微行夜出無有期度每高祖有敕疏至輒忿恚形於顏色羣臣莫敢言者恒於別室祀齊氏七廟又微服至曲阿拜齊明帝陵然猶無以自信聞俗說以生者血瀝死者骨滲卽爲父子綜乃私發齊東昏墓出骨瀝臂血試之并殺一男取其骨試之皆有驗自此

常懷異志四年出爲使持節都督南兗徐青冀五州諸軍事平北將軍南兗州刺史給鼓吹一部聞齊建安王蕭寶寅在魏遂使人入北與之相知謂爲叔父許舉鎮歸之會大舉北伐六年魏將元法僧以彭城降高祖乃令綜都督衆軍鎮于彭城與魏將安豐王元延明相持高祖以連兵既久慮有釁生敕綜退軍綜懼南歸則無因復與寶寅相見乃與數騎夜奔于延明魏以爲侍中太尉高平公丹陽王邑七千戶錢三百萬布絹三千匹雜彩千匹馬五十匹羊五百口奴婢一百人綜乃改名續字德文追爲齊東昏服斬衰於是有司奏削爵土絕屬籍改其姓爲悖氏俄有詔復之封其子直爲永新侯邑千戶大通二年蕭寶寅在魏據長安反綜自洛陽北遁將赴之爲津吏所執魏人殺之時年四十九初綜既不得志嘗作聽鍾鳴悲落葉辭以申其志大略曰聽鍾鳴當知在帝城參差定難數歷亂百愁生去聲懸窈窕來響急徘徊誰憐傳漏子辛苦建章臺聽鍾鳴聽聽非一所懷瑾握瑜空擲去攀松折桂誰相許昔朋舊愛各東西譬如落葉不更齊漂漂孤鴈何所栖依依別鶴夜半啼聽鍾鳴聽此何窮極二十有餘年淹留在京城窺明鏡罷容色雲悲海思徒拚抑其悲落葉云悲落葉連翩下重疊落且飛從橫去不歸悲落葉落葉悲人生譬如此零落不可持悲落葉落葉何時還凡昔共根本無復一相關當時見者莫不悲之

武陵王紀字世詢高祖第八子也少勤學有文才屬辭不好輕華甚有骨氣天監十三年封爲武陵郡王

邑二千戶歷位靈遠將軍琅邪彭城二郡太守輕車將軍丹陽尹出爲會稽太守尋以其郡爲東揚州仍爲刺史加使持節東中郎將徵爲侍中領石頭戍軍事出爲宣惠將軍江州刺史徵爲使持節宣惠將軍都督揚南徐二州諸軍事揚州刺史尋改授持節都督益梁等十三州諸軍事安西將軍益州刺史加鼓吹一部大同十一年授散騎常侍征西大將軍開府儀同三司初天監中震太陽門成字曰紹宗梁位唯武王解者以爲武王者武陵王也於是朝野屬意焉及太清中侯景亂紀不赴援高祖崩後紀乃僭號於蜀改年曰天正立子圓照爲皇太子圓正爲西陽王圓滿竟陵王圓普南譙王圓禰宜都王以西梓潼二郡太守永豐侯搆爲征西大將軍益州刺史封秦郡王司馬王僧略直兵參軍徐曄並固諫紀以爲貳於己皆殺之永豐侯搆歎曰王不免矣夫善人國之基也今反誅之不亡何待又謂所親曰昔桓玄年號大亨識者謂之二月了而玄之敗實在仲春今年曰天正在文爲一止其能久乎太清五年夏四月紀帥軍東下至巴郡以討侯景爲名將圖荆陝聞西魏侵蜀遣其將南梁州刺史譙淹迴軍赴援五月日西魏將尉遲帥衆逼涪水潼州刺史楊乾運以城降之迴分軍據守卽趨成都丁丑紀次于西陵舳艫翳川旌甲曜日軍容甚盛世祖命護軍將軍陸法和於峽口夾岸築二壘鎮江以斷之時陸納未平蜀軍復逼物情懼擾世祖憂焉法和告急旬日相繼世祖乃拔任約於獄以爲晉安王司馬撤禁兵以配之并遣宣

猛將軍劉葵共約西赴六月約築連城攻絕鐵鑊世祖復於獄拔謝答仁爲步兵校尉配衆一旅上赴法
和世祖與紀書曰皇帝敬問假黃鉞太尉武陵王自九黎侵軼三苗寇擾天長喪亂鴆醜馮陵虔劉象魏
委離王室朕枕戈東望泣血西浮殞愛子於二方無諸侯之八百身被屬甲手貫流矢俄而風樹之酷萬
恨始纏霜露之悲百憂繼集扣心飲膽志不圖全直以宗社綴旒鯨鯢未翦嘗瞻待巨翼行天罰獨運四
聰坐揮八柄雖復結壇待將塞帷納士拒赤壁之兵無謀於魯肅燒烏巢之米不訪於荀攸才智將殫金
貝殆竭傍無寸助險阻備嘗遂得斬長狄於駒門挫蚩尤於楓木怨恥旣雪天下無塵經營四方專資一
力方與岳牧同茲清靜隆暑炎赫弟比何如文武具僚當有勞弊今遣散騎常侍光州刺史鄭安忠指宣
往懷仍令喻意於紀許其還蜀專制岷方紀不從命報書如家人禮庚申紀將侯叡率衆緣山將規進取
任納謝答仁與戰破之旣而陸納平諸軍並西赴世祖又與紀書曰甚苦大智季月煩暑流金爍石聚蚊
成雷封狐千里以茲玉體辛苦行陣乃眷西顧我勞如何自撫醜憑陵羯胡叛換吾年爲一日之長屬有
平亂之功膺此樂推事歸營壁儻遣使乎良所遲也如曰不然於此投筆友于兄弟分形共氣兄肥弟瘦
無復相代之期讓棗推梁長罷懽愉之日上林靜拱聞四鳥之哀鳴宣室披圖嗟萬始之長逝心平愛矣
書不盡言大智紀之別字也紀遣所署度支尙書樂泰業至于江陵論和緝之計依前喻還蜀世祖知紀

必破遂拒而不許丙戌巴興人符昇徐子初等斬紀破口城主公孫晃降于衆軍王琳宋遵任約謝咨仁等因進攻侯劼陷其三壘於是兩岸十餘城遂俱降將軍樊猛獲紀及其第三子圓滿俱殺之於破口時年四十六有司奏請絕其屬籍世祖許之賜姓饗饗氏初紀將僭號妖怪非一其最異者內寢栢殿柱繞節生花其莖四十有六羸靡可愛狀似荷花識者曰王敦杖花非佳事也紀年號天正與蕭棟暗合僉曰天字二人也正字一止也棟紀僭號各一年而滅

臨賀王正德字公和臨川靖惠王第三子也少羸險不拘禮節初高祖未有男養之爲子及高祖踐極便希儲貳後立昭明太子封正德爲西豐侯邑五百戶自此怨望恒懷不軌脾晚宮辰顛幸災變普通六年以黃門侍郎爲輕車將軍置佐史頃之遂逃奔于魏有司奏削封爵七年又自魏逃歸高祖不之過也復其封爵仍除征虜將軍中大通四年爲信武將軍吳郡太守徵爲侍中撫軍將軍置佐史封臨賀郡王邑二千戶又加左衛將軍滿凶暴日甚招聚亡命侯景知其有姦心乃密令誘說厚相要結遣正德書曰今天子年尊姦臣亂國憲章錯謬政令顛倒以景觀之計日必敗況大王屬當儲貳中被廢辱天下義士竊所痛心在景愚忠能無忿慨今四海業業歸心大王大王豈得顧此私情棄茲億兆景雖不武實思自奮願王允副蒼生鑒斯誠欵正德覽書大喜曰侯景意暗與我同此天贊也遂許之及景至江正德潛運空

勅詐稱迎荻以濟景焉朝廷未知其謀猶遣正德守朱雀航景至正德乃引軍與景俱進景推正德爲天子改年爲正平元年景爲丞相臺城沒復太清之號降正德爲大司馬正德有怨言景聞之慮其爲變矯詔殺之

河東王譽字重孫昭明太子第二子也普通二年封枝江縣公大通三年改封河東郡王邑二千戶除監遠將軍石頭戍軍事出爲郢邪彭城二郡太守還除侍中輕車將軍置佐史出爲南中郎將湘州刺史未幾侯景寇京邑譽率軍入援至青草湖臺城沒有詔班師譽還湘鎮時世祖軍于武城新除雍州刺史張纘密報世祖曰河東起兵岳陽聚米共爲不逞將襲江陵世祖甚懼因步道間遣遺詔議周弘直至譽所督其糧衆譽曰各自軍府何忽隸人前後使三反譽並不從世祖大怒乃遣世子方等征之反爲譽所敗死又令信州刺史鮑泉討譽并與書陳示禍福許其遷善譽不答修浚城池爲拒守之計謂鮑泉曰敗軍之將勢豈語勇欲前卽前無所多說泉軍于石柵寺譽帥衆逆擊之不利而還泉進軍于橘洲譽又盡銳攻之不剋會已暮士卒疲弊泉因出擊大敗之斬首三千級溺死者萬餘人譽於是焚長沙鄩邑驅居民於城內鮑泉度軍圍之譽幼而驍勇兼有膽氣能撫循士卒甚得衆心及被圍旣久雖外內斷絕而備守猶固後世祖又遣領軍將軍王僧辯代鮑泉攻譽僧辯築土山以臨城內日夕苦攻矢石如雨城中將士

死傷者大半譽窘急乃潛裝海船將潰圍而出會其麾下將慕容華引僧辯入城譽顧左右皆散遂被執
謂守者曰勿殺我得一見七官申此讒賊死亦無恨主者曰奉命不許遂斬之傳首荆鎮世祖反其首以
葬焉初譽之將敗也私引鏡照面不見其頭又見長人蓋屋兩手據地瞰其齋又見白狗大如驢從城而
出不知所在譽甚惡之俄而城陷

史臣曰蕭綜蕭正德並悖逆猖狂自致夷滅宜矣太清之寇蕭紀據庸蜀之資遂不勤王赴難申臣子之
節及賊景誅翦方始起兵師出無名成其釁禍嗚呼身當管蔡之罰蓋自貽哉

梁書卷五十五

梁書卷五十六

唐 散 騎 常 侍 姚 思 廉 撰

列傳第五十一

侯景

侯景字萬景朔方人或云鴈門人少而不羈見憚鄉里及長驍勇有旅力善騎射以選爲北鎮戍兵稍立功効魏孝昌元年有懷朔鎮兵鮮于脩禮於定州作亂攻沒郡縣又有柔玄鎮兵吐斤洛周率其黨與復寇幽冀與脩禮相合衆十餘萬後脩禮見殺部下潰散懷朔鎮將葛榮因收集之攻殺吐斤洛周盡有其衆謂之葛賊四年魏明帝殂其后胡氏臨朝天柱將軍爾朱榮自晉陽入弑胡氏并誅其親屬景始以私衆見榮榮甚奇景卽委以軍事會葛賊南逼榮自討命景先驅至河內擊大破之生擒葛榮以功擢爲定州刺史大行臺封濮陽郡公景自是威名遂著頃之齊神武帝爲魏相又入洛誅爾朱氏景復以衆降之仍爲神武用景性殘忍酷虐馭軍嚴整然破掠所得財寶皆班賜將士故咸爲之用所向多捷總攬兵權與神武相亞魏以爲司徒南道行臺擁衆十萬專制河南及神武疾篤謂子澄曰侯景狡猾多計反覆難知我死後必不爲汝用乃爲書召景景知之慮及於禍太清元年乃遣其行臺郎中丁和來上表請降

曰臣聞股肱體合則四海和平上下猜貳則封疆幅裂故周邵同德越常之貢來臻飛惡離心諸侯所以
背叛此蓋成敗之所由古今如畫一者也臣昔與魏丞相高王並肩戮力共平災釁扶危戴主匡弼社稷
中興以後無役不從天平及此有事先出攻城每陷野戰必殄筋力消於鞍甲忠貞竭於寸心乘藉機運
位階鼎輔宜應誓死罄節仰報時恩隕首流腸溢焉罔貳何言翰墨一旦論此臣所恨義非死所壯士弗
爲臣不愛命但恐死之無益耳而丞相既遭疾患政出子澄澄天性險忌觸類猜嫉諂諛迭進共相搆毀
而部分未周累信賜召不顧社稷之安危惟恐私門之不植甘言厚幣規滅忠梗其父若殞將何賜容懼
讒畏戮拒而不返遂觀兵汝潁擁旆周韓乃與豫州刺史高成廣州刺史郎椿襄州刺史李密兗州刺史
邢子才南兗州刺史石長宣齊州刺史許季良東豫州刺史元征洛州刺史朱渾願揚州刺史樂恂北
荊州刺史梅季昌北揚州刺史元神和等皆河南牧伯大州帥長各陰結私圖尅相影會秣馬潛戈待時
卽發函谷以東瓊已以西咸願歸誠聖朝息肩有道戮力同心死無二志惟有青徐數州僅須折簡一驛
走來不勞經略且臣與高氏釁隙已成臨患賜徵前已不赴縱其平復終無合理黃河以南臣之所職易
同反掌附化不難羣臣願仰聽臣而唱若齊宋一平徐事燕趙伏惟陛下天網宏開方同書軌聞茲寸歎
惟應霽然丁和既至高祖召羣臣廷議尙書僕射謝舉及百辟等議皆云納侯景非宜高祖不從是議而

納景及齊神武卒其子澄嗣是爲文襄帝高祖乃下詔封景河南大將軍使持節董督河南南北諸軍事
入行臺承制輒行如鄧禹故事給鼓吹一部齊文襄遣大將軍慕容紹宗圍景於長社景請西魏爲援西
魏遣其五城王元慶等率兵救之紹宗乃退景復請兵於司州刺史羊鴉仁鴉仁遣長史鄧鴻率兵至汝
水元慶軍又夜遁於是據懸瓠項城求遣刺史以鎮之詔以羊鴉仁爲豫司二州刺史移鎮懸瓠西陽太
守羊思建爲殷州刺史鎮項城魏旣新喪元帥景又舉河南內附齊文襄慮景與西南合從方爲己患乃
以書喻景曰蓋聞位爲大寶守之未易仁誠重任終之實難或殺身成名或去食存信比性命於鴻毛等
節義於熊掌夫然者舉不失德動無過事進不見惡退無謗言先王與司徒契闊夷險孤子相於偏所眷
屬纒纒矜期綢繆寤語義貫終始情存歲寒司徒自少及長從微至著共相成生非無恩德旣爵冠通侯
位標上等門容駟馬室饗萬鍾財利潤於鄉黨榮華被於親戚意氣相傾人倫所重感於知己義在忘軀
眷爲國士者乃立漆身之節饋以壺殮者便致扶輪之效若然尙不能已況其重於此乎幸以故舊之議
欲持子孫相託方爲秦晉之匹共成劉范之親假使日往月來時移世易門無強蔭家有幼孤猶加璧不
遺分宅相濟無忘先德以恤後人況聞負杖行歌便已狼顧犬噬於名無所成於義無所取不蹈忠臣之
跡自陷叛人之地力不足以自強勢不足以自保率烏合之衆爲累卵之危西求救於黑秦南請援於蕭

氏以狐疑之心爲首鼠之事入則秦人不容歸則吳人不信當今相視未見其可不知終久持此安歸相
推本心必不應爾當是不逞之人曲爲口端之說遂懷市虎之疑乃致投杼之惑耳比來舉止事已可見
人相疑誤想自覺知合門大小並付司寇近者聊命偏師前驅致討南兗揚州應時尅復卽欲乘機長驅
懸瓠屬以炎暑欲爲後圖方憑國靈襲行天罰器械精新士馬疆盛內外感德上下齊心三令五申可蹈
湯火若使旗鼓相望埃塵相接勢如沃雪事等注螢夫明者去危就安智者轉禍爲福竄使我負人不使
人負我當開從善之門決改先迷之路今刷心盪意除嫌去惡想猶致疑未便見信若能卷甲來朝垂鑿
還闕者當授豫州刺史卽使終君之世所部文武更不追攝進得保其祿位退則不喪功名君門眷屬可
以無恙寵妻愛子亦送相還仍爲通家卒成親好所不食言有如皎日君旣不能東封函谷南向稱孤受
制於人威名頓盡空使兄弟子姪足首異門垂髮戴白同之塗炭聞者酸鼻見者寒心矧伊骨肉能無愧
也孤子今日不應方遣此書但見蔡遵道云司徒本無歸西之心深有悔禍之意聞西兵將至遣遵道向
嶠中參其多少則與其同力多則更爲其備又云房長史在彼之日司徒嘗欲遣書啟將改過自新已
差李龍仁垂欲發遣聞房已遠遂復停發未知遵道此言爲虛爲實但旣有所聞不容不相盡告吉凶之
理想自圖之景報書曰蓋聞立身揚名者義也在躬所寶者生也苟事當其義則節士不愛其軀刑罰斯

舛則君子寶重其命昔微子發狂而去殷陳平懷智而背楚者良有以也僕鄉曲布衣本乖藝用初逢天
柱賜忝帷幄之謀晚遇永熙委以干戈之任出身爲國綿歷二紀犯危履難豈避風霜遂得躬被袞衣口
餐玉食富貴當年光榮身世何爲一旦舉旌旆援桴鼓而北面相抗者何哉寔以畏懼危亡恐招禍害捐
軀非義身名兩滅故耳何者往年之暮尊王遘疾神不祐善祈禱莫瘳遂使嬖幸擅威權聞寺肆詭惑上
下相猜心腹離貳僕妻子在宅無事見圍段康之謀莫知所以盧潛入軍未審何故翼翼小心常懷戰慄
有覲面目盍不自疑及廻師長社希自陳狀簡書未達斧鉞已臨旣旌旗相對咫尺不送飛書每奏兼申
鄙情而羣卒恃雄眇然不顧運戟推鋒專欲屠滅築圍堰水三板僅存舉目相看命懸晷刻不忍死亡出
戰城下禽獸惡死人倫好生送地拘秦非樂爲也但尊王平昔見與比肩共獎帝室雖形勢參差寒暑小
異丞相司徒鴈行而已福祿官榮自是天爵勞而後受理不相干欲求吞炭何其謬也然竊人之財猶謂
爲盜祿去公室相爲不取今魏德雖衰天命未改祈恩私第何足闕言賜示不能東封函谷受制於人當
似教僕賢祭仲而襲季氏無主之國在禮未聞動而不法何以取訓竊以分財養幼事歸令終捨宅存孤
誰云隙末復言僕衆不足以自強危如累卵然紂有億兆夷人卒降十亂桀之百寇終自無後潁川之戰
卽是殷監輕重由人非鼎在德苟能忠信雖弱必彊殷憂啟聖處危何苦況今梁道豈熙招攜以禮被我

獸文縻之好爵方欲苑五岳而池四海掃夷穢以拯黎元東羈甌越西通汧隴吳楚剽勁帶甲千羣吳兵
驥馬控弦十萬兼僕所部義勇如林奮義取威不期而發大風一振枯幹必摧凝霜整落秋蒂自殞此而
爲弱誰足稱疆又見誣兩端受疑二國斟酌物情一何至此昔陳平背楚歸漢則王百里出虞入秦斯霸
蓋昏明由主用捨在時奉禮而行神其庇也書稱士馬精新尅日齊舉誇張形勝指期盪滅竊以寒颯白
露節候乃同秋風揚塵馬首何異徒知北方之力爭未識西南之合從苟欲徇意於前途不覺坑穽在其
側若云去危令歸正朔轉禍以脫網羅彼旣嗤僕之愚迷此亦笑君之晦昧今已引二邦揚旌北討熊豹
齊奮尅復中原荆襄廣穎已屬關右項城懸瓠亦奉南朝幸自取之何勞恩賜然權變不一理有萬途爲
君計者莫若割地兩和二分鼎峙燕衛晉趙足相奉祿齊曹宋魯悉歸大梁使僕得輸力南朝北敦姻好
東帛交行戎車不動僕立當世之功君卒祖禰之業各保疆界躬享歲時百姓乂寧四民安堵孰若驅農
夫於隴畝抗勅敵於三方避干戈於首尾當鋒鏑於心腹縱太公爲將不能獲存歸之高明何以尅濟復
尋來書云僕妻子悉拘司寇以之見要庶其可及當是見疑褊心未識大趣何者昔王陵附漢母在不歸
太上囚楚乞羹自若矧伊妻子而可介意脫謂誅之有益欲止不能殺之無損徒復坑戮家累在君何關
僕也而遵道所傳頗亦非謬但在縲紲恐不備盡故重陳辭更論欵曲所望良圖時惠報旨然昔與盟主

事等琴瑟譏人間之翻爲讐敵撫弦擲矢不覺傷懷裂帛還書知何能述十二月景率軍圍譙城不下逼攻城父拔之又遣其行臺左丞王偉左良郎中王則詣闕獻策求諸元子弟立爲魏主輔以北伐許之詔遣太子舍人元貞爲咸陽王須渡江許卽僞位乘輿副御以資給之齊文襄又遣慕容紹宗追景景退入渦陽馬尙有數千匹甲卒數萬人車萬餘輛相持於渦北景軍食盡士卒並北人不樂南渡其將暴顯等各率所部降於紹宗景軍潰散乃與腹心數騎自峽石濟淮稍收散卒得馬步八百人奔壽春監州韋驥納之景啟求貶削優詔不許仍以爲豫州牧本官如故景旣據壽春遂懷反叛屬城居民悉召募爲軍士輒停賣市估及田租百姓子女悉以配將卒又啟求錦萬匹爲軍人袍領軍朱异議以御府錦署止充頒賞遠近不容以供邊城戎服請送青布以給之景得布悉用爲袍衫因尙青色又以臺所給仗多不能精啟請東冶鍛工欲更營造敕並給之景自渦陽敗後多所徵求朝廷含弘未嘗拒絕先是豫州刺史貞陽侯淵明督衆軍圍彭城兵敗沒于魏至是遣使還述魏人請追前好二年二月高祖又與魏連和景聞之懼馳啟固諫高祖不從爾後表疏跋扈言辭不遜鄱陽王範鎮合肥及司州刺史羊鴉仁俱累啟稱景有異志領軍朱异曰侯景數百叛虜何能爲役並抑不奏聞而逾加賞賜所以姦謀益果又知臨賀王正德怨望朝廷密令要結正德許爲內啟八月景遂發兵反攻馬頭木柵執太守劉神茂戍主曹瓊等於是詔

鄧州刺史鄧陽王範爲南道都督北徐州刺史封山侯正表爲北道都督司州刺史柳仲禮爲西道都督
通直散騎常侍裴之高爲東道都督同討景濟自歷陽又令開府儀同三司丹陽尹邵陵王綸持節董督
衆軍十月景留其中軍王顯貴守壽春城出軍僞向合肥遂襲譙州助防董紹先開城降之執刺史豐城
侯秦高祖聞之遣太子家令王質率兵三千巡江邊防景進攻歷陽歷陽太守莊鐵遣弟均率數百人夜
斫景營不克均戰沒鐵又降之蕭正德先遣大船數十艘僞稱載荻實裝濟景至京口將渡慮王質爲
梗俄而質無故退景聞之尙未信也乃密遣覘之謂使者曰質若審退可折江東樹枝爲驗覘人如言而
返景大喜曰吾事辦矣乃自採石濟馬數百匹兵千人京師不之覺景卽分襲姑孰執淮南太守文成侯
暹遂至慈湖於是詔以揚州刺史宣城王大器爲都督城內諸軍事都官尙書羊侃爲軍師將軍以副焉
南浦侯推守東府城西豐公大春守石頭城輕車長史謝禧守白下既而景至朱雀航蕭正德先屯丹陽
郡至是率所部與景合建康令庾信率兵千餘人屯航北見景至航命徹航始除一船遂棄軍走南塘遊
軍復閉航渡景皇太子以所乘馬授王質配精兵三千使授庾信質至領軍府與賊遇未陣便奔走景乘
勝至闕下西豐公大春棄石頭城走景遣其儀同千子悅據之謝禧亦棄白下城走景於是百道攻城持
火炬燒大司馬東西華諸門城中倉卒未有其備乃鑿門樓下水沃火久之方滅賊又斫東掖門將開羊

侃鑿門扇刺殺數人賊乃退又登東宮牆射城內至夜太宗募人出燒東宮東宮臺殿遂盡景又燒城西馬廐士林館太府寺明日景又作木驢數百攻城城上飛石擲之所值皆碎破景苦攻不尅傷損甚多乃止攻築長圍以絕內外敢求誅中領軍朱异太子右衛率陸贄少府卿徐麟制局監周石珍等城內亦射賞格出外有能斬景首授以景位并錢一億萬布絹各萬匹女樂二部十一月景立蕭正德爲帝卽僞位於儀賢堂改年曰正平初童謠有正平之言故立號以應之景自爲相國天柱將軍正德以女妻之景又攻東府城設百尺樓車鉤城堞盡落城遂陷景使其儀同盧暉略率數千人持長刀夾城門悉驅城內文武裸身而出賊交兵殺之死者二千餘人南浦侯推是日遇害景使正德子見理儀同盧暉略守東府城景又於城東西各起一土山以臨城內城內亦作兩山以應之王公以下皆負土初景至便望克定京師號令甚明不犯百姓旣攻城不下人心離阻又恐援軍總集衆必潰散乃縱兵殺掠交屍塞路富室豪家恣意剝子女妻妾悉入軍營及築土山不限貴賤晝夜不息亂加毆捶疲羸者因殺之以填山號哭之聲響動天地百姓不敢藏隱並出從之旬日之間衆至數萬景儀同范桃棒密遣使送款乞降會事泄見殺至是邵陵王綸率西豐公大春新塗將軍永安侯確超武將軍南安鄉侯駿前譙州刺史趙百超武州刺史蕭弄璋步兵校尉尹思合等馬步二萬發自京口直據鍾山景黨大駭具船舟咸欲逃散分遣萬

餘人距綸綸大破之斬首千餘級旦日景復陳兵覆舟山北綸亦列陣以待之景不進相持會日暮景引軍還南安侯駿率數十騎挑之景迴軍與戰駿退時趙伯超陳於玄武湖北見駿急不赴乃率軍前走衆軍因亂遂敗續綸奔京口賊盡獲輜重器甲斬首數百級生俘千餘人獲西豐公大春綸司馬莊巨惠遙直閣將軍胡子約廣陵令霍雋等來送城下狗之逼云已擒邵陵王儁獨云王小小失利已全軍還京口城中但堅守援軍尋至賊以刀毆之儁言辭顏色如舊景義而釋之是日鄱陽世子嗣裴之高至後渚結營于蔡洲景分軍屯南岸十二月景造諸攻具及飛樓撞車登城車登堞車階道車火車並高數丈一車至二十輪陳於闕前百道攻城並用焉以火車焚城東南隅大樓賊因火勢以攻城城上縱火悉焚其攻具賊乃退又築土山以逼城城內作地道以引其土山賊又不能立焚其攻具還入于柵材官將軍宋巖降賊因爲立計引玄武湖水灌臺城城外水起數尺闕前御街並爲洪波矣又燒南岸民居營寺莫不咸盡司州刺史柳仲禮衡州刺史韋粲南陵太守陳文徹宣猛將軍李孝欽等皆來赴援鄱陽世子嗣裴之高又濟江仲禮營朱雀航南裴之高營南苑韋粲營青塘陳文徹李孝欽屯丹陽郡鄱陽世子嗣營小航南並緣淮造柵及曉景方覺乃登禪靈寺門樓望之見韋粲營壘未合先渡兵擊之粲拒戰敗績景斬粲首徇于城下柳仲禮聞粲敗不遑貫甲與數十騎馳赴之遇賊交戰斬首數百投水死者千餘人仲禮深

入馬陷泥亦被重創自是賊不敢濟岸邵陵王綸與臨成公大連等自東道集于南岸荊州刺史湘東王
繹遣世子方等兼司馬吳曩天門太守樊文皎下赴京師營于湘子岸前高州刺史李遷仕前司州刺史
羊鴉仁又率兵繼至既而鄱陽世子嗣永安侯確羊鴉仁李遷仕樊文皎率衆渡淮攻賊東府城前柵破
之遂結營于青溪水東景遣其儀同宋子仙頓南平王第緣水西立柵相拒景食稍盡至是米斛數十萬
人相食者十五六初援兵至北岸百姓扶老攜幼以候王師纔得過淮便競剝掠賊黨有欲自拔者聞之
咸止賊之始至城中纔得固守平蕩之事期望援軍既而四方雲合衆號百萬連營相持已月餘日城中
疾疫死者大半景自歲首以來乞和朝廷未之許至是事急乃聽焉請割江右四州之地并求宣城王大
器出送然後解圍濟江仍許遣其儀同于子悅左丞王偉入城爲質中領軍傅岐議以宣城王嫡嗣之重
不容許之乃請石城公大欵出送詔許焉遂於西華門外設壇遣尙書僕射王克兼侍中上甲鄉侯韶兼
散騎常侍蕭瑳與于子悅王偉等登壇共盟左衛將軍柳津出西華門下景出其柵門與津遙相對刑牲
歃血南兖州刺史南康嗣王會理前青冀二州刺史湘潭侯退西昌侯世子或率衆三萬至于馬邛州景
慮北軍自白下而上斷其江路請悉勒聚南岸敕乃遣北軍進江潭苑景啟稱永安侯趙威方頻隔柵見
詭臣云天子自與汝盟我終當逐汝乞召入城卽當進發敕並召之景又啟云西岸信至高澄已得壽春

鍾離便無處安足權借廣陵譙州須得壽春鍾離卽以奉還朝廷初彭城劉邈說景曰大將軍頓兵已久攻城不拔今援衆雲集未易而破如聞軍糧不支一月運漕路絕野無所掠嬰兒掌上信在於今未若乞和全師而返此計之上者景然其言故請和後知援軍號令不一終無勤王之効又聞城中死疾轉多必當有應之者景謀臣王偉又說曰王以人臣舉兵背叛圍守宮闕已盈十旬逼辱妃主凌穢宗廟今日持此何處容身願王且觀其變景然之乃抗表曰臣聞書不盡言言不盡意然則意非言不宣言非筆不盡臣所以含憤蓄積不能默已者也竊惟陛下睿智在躬多才多藝昔因世季龍翔漢沔夷凶剪亂克雪家怨然後踵武前王光宅江表憲章文武祖述堯舜兼屬魏國凌遲外無勍敵故能西取華陵北封淮泗結好高氏輪軒相屬疆場無虞十有餘載躬覽萬機劬勞治道刊正周孔之遺文訓釋真如之秘奧享年長久本枝盤石人君藝業莫之與京臣所以踊躍一隅望南風而歎息也豈圖名與實爽聞見不同臣自委質策名前後事跡從來表奏已具之矣不勝憤懣復爲陛下陳之陛下與高氏通和歲踰一紀舟車往復相望道路必將分災卹患同休等戚寧可納臣一介之服貪臣汝穎之地便絕好河北檄誓高澄聘使未歸陷之虎口揚兵擊鼓侵逼彭宋夫敵國相伐聞喪則止匹夫之交託孤寄命豈有萬乘之主見利忘義若此者哉其失一也臣與高澄既有仇憾義不同國歸身有道陛下授以上將任以專征歌鍾女樂車

服弓矢臣受命不辭實思報效方欲挂旆嵩華縣旌冀趙劉夷蕩滌一匡宇內陛下朝服濟江告成東岳使大梁與軒黃等盛臣與伊呂比功垂裕後昆流名竹帛此實生平之志也而陛下欲分其功不能賜任使臣擊河北欲自舉徐方遣庸懦之貞陽任驕貪之胡趙裁見旗鼓爲散魚潰慕容紹宗乘勝席卷渦陽諸鎮靡不棄甲疾雷不及掩耳散地不可固全使臣狼狽失據妻子爲戮斯實陛下負臣之深其失二也韋黯之守壽陽衆無一旅慕容凶銳欲飲馬長江非臣退保淮南其勢未之可測旣而逃遁邊境獲盜令臣作牧此州以爲蕃捍方欲收合餘燼勞來安集勵兵秣馬尅申後戰封韓山之屍雪渦陽之恥陛下喪其精魄無復守氣便信貞陽謬啟復請通和臣頻陳執疑閉不聽讞覆若此童子猶且羞之況在人君二三其德其失三也夫畏懦逗留軍有常法子玉小敗見誅於楚王恢失律受戮于漢貞陽精甲數萬器械山積慕容輕兵衆無百乘不能抗拒身受囚執以帝之猶子而面縛敵庭實宜絕其屬籍以聲征鼓陛下曾無追責恰其苟存欲以微臣規相貿易人君之法當如是哉其失四也懸瓠大藩古稱汝潁臣舉州內附羊鴉仁固不肯入旣入之後無故棄之陛下曾無嫌責使還居北司鴉仁棄之旣不爲罪臣得之不以爲功其失五也臣渦陽退衄非戰之罪實由陛下君臣相與見誤乃還壽春曾無悔色祇奉朝廷掩惡揚善鴉仁自知棄州切齒歎恨內懷慙懼遂敢臣欲反欲反當有形迹何所徵驗誣陷頓爾陛下曾無辯究

默而信納豈有誣人莫大之罪而可並肩事主者乎其失六也趙伯超拔自無能任居方伯惟漁獵百姓多蓄士馬非欲爲國立功直是自爲富貴行貨權幸微買聲名朱异之徒積受金貝遂使咸稱胡趙比昔關張誣掩天聽謂爲真實韓山之役女妓自隨裁聞敵鼓與妾俱逝不待貞陽故筭輪莫返論其此罪應誅九族而納賄中人還處州任伯超無罪臣功何論賞罰無章何以爲國其失七也臣御下素嚴無所侵物關市征稅咸悉停原壽陽之民頗懷優復裴之悌等助戍在彼憚臣檢制遂無故遁歸又啟臣欲反陛下不責違命離局方受其浸潤之譖處臣如此使何地自安其失八也臣雖才謝古人實頗更事撫民率衆自幼至長少來運動多無遺策及歸身有道罄竭忠規每有陳奏恒被抑遏朱异專斷軍旅周石珍總尸兵仗陸驗徐麟典司穀帛皆明言求貸非令不行境外虛實定計於舍人之省舉將出師責奏於主者之命臣無賄於中故恒被抑折其失九也鄱陽之鎮合肥與臣鄰接臣推以皇枝每相祇敬而嗣王庸怯虛見備御臣有使命必加彈射或聲言臣反或啟臣織介招攜當須以禮忠烈何以堪於此哉其失十也其餘條目不可具陳進退惟谷頻有表疏言直辭強有忤龍鱗遂發嚴詔便見討襲重華純孝猶逃凶父之杖趙盾忠賢不討殺君之賊臣何親何罪而能坐受殲夷韓信雄桀亡項霸漢末爲女子所烹方悔蒯通之說臣每覽書傳心常笑之豈容遵彼覆車而快陛下佞臣之手是以興晉陽之甲亂長江而直濟願

得升赤墀踐文石口陳枉直指畫臧否誅君側之惡臣清國朝之糝政然後還守藩翰以保忠節實臣之至願也三月朔巨城內以景違盟舉烽鼓譟於是羊鴉仁柳敬禮鄱陽世子嗣進軍於東府城北柵壘未立爲景將宋子仙所襲敗績赴淮死者數千人賊送首級於闕下景又遣于子悅至更請和遣御史中丞沈浚至景所景無去意浚固責之景大怒既決石闕前水百道攻城晝夜不息城遂陷於是悉鹵掠乘輿服玩後宮嬪妾收王侯朝士送永福省撤二宮侍衛使王偉守武德殿于子悅屯太極東堂矯詔大赦天下自爲大都督督申外諸軍事錄尙書其侍中使持節大丞相王如故初城中積屍不暇埋瘞又有已死而未斂或將死而未絕景悉聚而燒之臭氣聞十餘里尙書外兵郎鮑正疾篤賊曳出焚之宛轉火中久而方絕於是援兵並散景矯詔曰日者姦臣擅命幾危社稷賴丞相英發入輔朕躬征鎮牧守可各復本任降蕭正德爲侍中大司馬百官皆復其職景遣董紹先率兵襲廣陵南兗州刺史南康嗣王會理以城降之景以紹先爲南兗州刺史初北兗州刺史定襄侯祇與湘潭侯退及前潼州刺史郭鳳同起兵將赴援至是鳳謀以淮陰應景祇等力不能制並奔于魏景以蕭弄璋爲北兗州刺史州民發兵拒之景遣龐公巨子英直閣將軍羊海率衆赴援海斬子英率其軍降于魏魏遂據其淮陰景又遣儀同于子悅張大黑率兵入吳吳郡太守袁君正迎降子悅等既至破掠吳中多自調發逼掠女子毒虐百姓吳人莫不怨

憤於是各立城柵拒守是月景移屯西洲遣儀同任約爲南道行臺鎮姑孰五月高祖崩于文德殿初臺城旣陷景先遣王偉陳慶入謁高祖高祖曰景今安在卿可召來時高祖坐文德殿景乃入朝以甲士五百人自衛帶劍升殿拜訖高祖問曰卿在戎日久無乃爲勞景默然又問卿何州人而敢至此乎景又不能對從者代對及出謂廂公王僧貴曰吾常據鞍對敵矢刃交下而意氣安緩了無怖心今日見蕭公使人自懼豈非天威難犯吾不可再見之高祖雖外跡已屈而意猶忿憤時有事奏聞多所譴却景深敬憚亦不敢逼景遣軍人直殿省內高祖問制局監周石珍曰是何物人對曰丞相高祖乃謬曰何物丞相對曰是侯丞相高祖怒曰是名景何謂丞相是後每所徵求多不稱旨至於御膳亦被裁抑遂憂憤感疾而崩景乃密不發喪權殯于昭陽殿自外文武咸莫知之二十餘日升梓宮於太極前殿迎皇太子卽皇帝位於是矯詔赦北人爲奴婢者冀收其力用焉又遣儀同來亮率兵攻宣城宣城內史楊華誘亮斬之景復遣其將李賢明討華華以郡降景遣儀同宋子仙等率衆東次錢塘新城戍戴僧易據縣拒之是月景遣中軍侯子鑿入吳軍收于子悅張大黑還京誅之時東揚州刺史臨成公大連據州吳興太守張嶷據郡自南陵以上皆各據守景制命所行惟吳郡以西南陵以北而已六月景以儀同郭元建爲尙書僕射北道行臺總江北諸軍事鎮新秦郡人陸績戴文舉等起兵萬餘人殺景太守蘇單于推前淮南太守文

成侯靈爲王以拒景宋子仙聞而擊之緝等棄城走景乃分吳郡海鹽胥浦二縣爲武原郡至是景殺蕭
正德於永福省封元羅爲西秦王元景龍爲陳留王諸元子弟封王者十餘人以柳敬禮爲使持節大都
督隸大丞相參戎事景遣其中軍侯子鑒監行臺劉神茂等軍東討破吳興執太守張曠父子送京師景
並殺之景以宋子仙爲司徒任約爲領軍將軍爾朱季伯叱羅子通彭儁董紹先張化仁于慶魯伯和紇
奚斤史安和時靈護劉歸義並爲開府儀同三司是月鄱陽嗣王範率兵次柵口江州刺史尋陽王大心
嬰之西上景出頓始孰範將裴之悌夏侯威生以衆降景十一月宋子仙攻錢塘戴僧易降景以錢塘爲
臨江郡富陽爲富春郡以王偉元羅並爲儀同三司十二月宋子仙趙伯超劉神茂進攻會稽東揚州刺
史臨成公大連棄城走遣劉神茂追擒之景以裴之悌爲使持節平西將軍合州刺史以夏侯威生爲使
持節平北將軍南豫州刺史是月百濟使至見城邑丘墟於端門外號泣行路見者莫不灑淚景聞之大
怒送小莊嚴寺禁止不聽出入大寶元年正月景矯詔自加班劍四十人給前後部羽葆鼓大置左右長
史從事中郎四人前江都令祖皓起兵於廣陵斬景刺史董紹先推前太子舍人蕭勳爲刺史又結魏人
爲援馳檄遠近將以討景景聞之大懼卽日率侯子鑒等出自京口水陸並集皓嬰城拒守景攻城陷之
景車裂皓以徇城中無少長皆斬之以侯子鑒監南兗州事是月景召宋子仙還京口四月景以元忠處

爲東道行臺鎮錢塘以侯子鑿爲南兗州刺史文成侯寧於吳西鄉起兵旬日之間衆至一萬卒以西上
景廂公孟振侯子榮擊破之斬寧傳首於景七月景以秦郡爲西兗州陽平郡爲北兗州任約廬暉略攻
晉熙郡殺鄧陽世子嗣景以王偉爲中書監任約進軍襲江州江州刺史尋陽王大心降之世祖時聞江
州失守遣衛軍將軍徐文盛率衆軍下武昌拒約景又矯詔自進位爲相國封太山等二十郡爲漢王入
朝不趨讚拜不名劍履上殿如蕭何故事景以柳敬禮爲護軍將軍姜詢義爲相國左長史徐洪爲左司
馬陸約爲右長史沈衆爲右司馬是月景率舟師上皖口十月盜殺武林侯諮於廣莫門諮常出入太宗
臥內景黨不能平故害人景又矯詔曰蓋縣象在天四時取則於辰斗羣生育地萬物仰照於大明是以
垂拱當辰則八紘共轉負圖正位則九域同歸故乃雲名水號之君龍官人爵之后莫不啟符河洛封禪
岱宗奔走四夷來朝萬國逖聽虞夏厥道彌新爰及商周未之或改逮幽厲不競戎馬生郊惠懷失御胡
塵犯蹕遂使豺狼肆毒侵穴伊瀍獫狁孔熾巢栖咸洛自晉鼎東遷多歷年代周原不復歲實永久雖宋
祖經略中息遠圖齊號和親空勞冠蓋我大梁膺符作帝出震登皇浹寓歸仁綿區飲化開疆闢土跨瀚
海以揚鑠來庭入覲等塗山而比轍玄龜出洛白雉歸豐鳥塞同文胡天共軌不謂高澄跋扈度劉魏邦
屬動華夷不供王職遂乃狼顧北侵馬首南向值天厭昏僞醜徒數盡龍豹應期風雲會節相國漢王上

德英姿蓋惟天授雄謨勇略出自懷抱珠魚表應辰昴叶暉剖析六韜鏘銖四履騰文豹變鳳集虬翔奮翼來儀負圖而降爰初秉律實先啟行奉茲廟算克除黨醜直以鼎湖上征六龍宴駕于戈暫止九伐未申而惡稔貫盈元凶殞斃弟洋繼逆續長亂階異彼洋音同茲薦食偷竊僞號心希舉斧豐水君臣奉圖乞援關河百姓泣血請師咸願承奉國靈思覩王化朕以寡昧纂戎下武庶拯堯黎冀康禹跡且夫車服以庸名因事著周師克殷鷹揚創自尙父漢征戎狄明友實始度遼況乃神規窺算眇乎難測大功懋績事絕言象安可以習彼常名保茲守固宇宙大將軍都督六合諸軍事餘悉如故以詔文呈太宗太宗驚曰將軍乃有宇宙之號乎齊遣其將辛術圍陽平景行臺郭元建率兵赴援術退徐文盛入資磯任約率水軍逆戰文盛大破之仍進軍大舉口時景屯於皖口京師虛弱南康王會理及北兗州司馬成欽等將襲之建安侯賁知其謀以告景景遣收會理與其弟祈陽侯通理柳敬禮成欽等並害之十二月景矯詔封賁爲竟陵王賞發南康之謀也是月張彪起義於會稽攻破上虞景太守蔡臺樂討之不能禁至是彪又破諸暨永興等諸縣景遣儀同田遷趙伯超謝答仁等東伐彪二年正月彪遣別將寇錢塘富春田遷進軍與戰破之景以王克爲太師宋子仙爲太保元羅爲太傅郭元建爲太尉張化仁爲司徒任約爲司空于慶爲太子太師時靈護爲太子太保紇奚斤爲太子太傅王偉爲尙書左僕射索超世爲

尙書右僕射北兗州刺史蕭邕謀降魏事泄景誅之是月世祖遣巴州刺史王珣等率衆下武昌助徐文盛任約以西臺益兵告急於景三月景自率衆二萬西上援約四月景次西陽徐文盛率水軍邀戰大破之景訪知郢州無備兵少又遣宋子仙率輕騎三百襲陷之執刺史方諸行事鮑泉盡獲武昌軍人家口徐文盛等聞之大潰奔歸江陵景乘勝西上初世祖遣領軍王僧辯率衆東下代徐文盛軍次巴陵會景至僧辯因堅壁拒之景設長圍築土山晝夜攻擊不克軍中疾疫死傷大半世祖遣平北將軍胡僧祐率兵二千人救巴陵景聞遣任約以精卒數千逆擊僧祐僧祐與居士陸法和退據赤亭以待之約至與戰大破之生擒約景聞之夜遁以丁和爲郢州刺史留宋子仙時靈護等助和守以張化仁閻洪慶守魯山城景還京師王僧辯乃率衆東下次漢口攻魯山及郢城皆陷之自是衆軍所至皆捷景乃廢太宗幽於承福省作詔草成逼太宗寫之至先皇念神器之重思社稷之固獻猷嗚咽不能自止是日景迎豫章王棟卽皇帝位升太極前殿大赦天下改元爲天正元年有回風自承福省吹其文物皆倒折見者莫不驚駭初景旣平京邑便有篡奪之志以四方須定且未自立旣巴陵失律江郢喪師猛將外殲雄心內沮便欲僞僭大號遂其姦心其謀臣王偉云自古移鼎必須廢立故景從之其太尉郭元建聞之自秦郡馳還諫景曰四方之師所以不至者政爲二宮萬福若遂行弑逆結怨海內事幾一去雖悔無及王偉固執不

從景乃矯棟詔追尊昭明太子爲昭明皇帝豫章安王爲安皇帝金華敬妃爲敬皇后豫章國太妃王氏爲皇太后妃張氏爲皇后以劉神茂爲司空徐洪爲平南將軍秦晃之王暉李賢明徐徐珍國宋長寶尹思合並爲儀同三司景以哀太子妃賜郭元建元建曰豈有皇太子妃而降爲人妾竟不與相見十月壬寅夜景遣其衛尉彭儁王修纂奉酒於太宗曰丞相以陛下處憂旣久故令臣等奉進一觴太宗知其將弒乃大酣飲酒旣醉還寢修纂以把盛土加於腹因崩焉斂用法服以薄棺密瘞於城北酒庫初太宗久見幽繫朝士莫得接覲慮禍將及常不自安惟舍人殷不害後稍得入太宗指所居殿謂之曰廳涓當死此下又曰吾昨夜夢吞土卿試爲思之不害曰昔重耳饋塊卒反晉國陛下所夢將符是乎太宗曰儻幽冥有徵冀斯言不妄耳至是見弒實以土焉是月景司空東道行臺劉神茂儀同尹思合劉歸義王暉雲磨將軍桑乾王元頽等據東陽歸順仍遣元頽及別將李占趙惠朗下據建德江口尹思合收景新安太守元義奪其兵張彪攻永嘉永嘉太守秦遠降彪十一月景以趙伯超爲東道行臺鎮錢塘遣儀同田遷謝答仁等將兵東征神茂景矯蕭棟詔自加九錫之禮置丞相以下百官陳備物於庭忽有野鳥翔於景上赤足丹背形似山鵲賊徒悉駭競射之不能中景以劉勸威霸朱安王爲開府儀同三司索九昇爲護軍將軍南兖州刺史侯子鑒獻白獐建康獲白鼠以獻蕭棟歸之于景景以郭元建爲南兖州刺史太

尉北行臺如故景又矯蕭棟詔追崇其祖爲大將軍考爲丞相自加冕十有二旒建天子旌旗出警入蹕乘金根車駕六馬備五時副車置旄頭雲罕樂儻八佾鍾虡宮懸之樂一如舊儀景又矯蕭棟詔禪位於己於是南郊柴燎于天升壇受禪文物並依舊儀以轎車牀載鼓吹橐駝負犧牲輦上置筌蹄垂脚坐景所帶劍水精標無故墮落手自拾之將登壇有兔自前而走俄失所在又白虹貫日景還升太極前殿大赦改元爲太始元年封蕭棟爲淮陰王幽于監省僞有司奏改警蹕爲永蹕避景名也改梁律爲漢律改左民尚書爲殿中尚書五兵尚書爲七兵尚書直殿主帥爲直寢景三公之官動置十數儀同尤多或匹馬孤行自執羈絆其左僕射王偉請立七廟景曰何謂爲七廟偉曰天子祭七世祖考故置七廟并請七世之諱敕太常具祭祀之禮景曰前世吾不復憶惟阿爺名標衆聞咸竊笑之景黨有知景祖名周者自外悉是王偉制其名位以漢司徒侯霸爲始祖晉徵士侯瑾爲七世祖於是追尊其祖周爲大丞相父標爲元皇帝十二月謝答仁李慶等至建德攻元頽李占柵大破之執頽占送景景截其手足狗之經日乃死景二年正月朔臨軒朝會景自巳挫劒軍兵略盡恐齊人乘釁與西師掎角乃遣郭元建率步軍趣小峴侯子鑿率舟師向濡須驢兵肥水以示武威子鑿至合肥攻羅城剋之郭元建侯子鑿俄聞王師既近燒合肥百姓邑居引軍退子鑿保姑孰元建還廣陵時謝答仁攻劉神茂神茂別將王華麗通並據外

營降答仁劉歸義尹思合等懼各棄城走神茂孤危復降答仁王僧辯軍至蕪湖蕪湖城主宵遁景遣史安和宋長貴等率兵二千助子鑒守姑孰追田遷等還京師是月景黨郭長獻馬駒生角三月景往姑孰巡視壘柵又誡子鑒曰西人善水戰不可與爭鋒往年任約敗績良爲此也若得馬步一交必當可破汝但堅壁以觀其變子鑒乃捨舟登岸閉營不出僧辯等遂停軍十餘日賊黨大喜告景曰西師懼吾之強必欲遁逸不擊將失之景復命子鑒爲水戰之備子鑒乃率步騎萬餘人渡洲并引水軍俱進僧辯逆擊大破之子鑒僅以身免景聞子鑒敗大懼涕下覆面引衾以臥良久方起歎曰誤殺乃公僧辯進軍次張公洲景以盧暉略守石頭紇奚斤守捍國城悉逼百姓及軍士家累入臺城內僧辯焚景水柵入淮至禪靈寺渚景大驚乃緣淮立柵自石頭至朱雀航僧辯及諸將遂於石頭城西步上連營立柵至于落星墩景大恐自率侯子鑒于慶史安和王僧貴等於石頭東北立柵拒守使王偉索超世呂季略守臺城宋長貴守延祚寺遣掘王僧辯父墓剖棺焚屍王僧辯等進營於石頭城北景列陣挑戰僧辯率衆軍奮擊大破之侯子鑒史安和王僧貴各棄柵走盧暉略紇奚斤並以城降景旣退敗不入宮歛其散兵屯于闕下遂將逃竄王偉攬轡諫曰自古豈有叛天子今宮中衛士尙足一戰寧可便走棄此欲何所之景曰我在北打賀拔勝破葛榮揚名河朔與高一種人今來南渡大江取臺城如返掌打邵陵王於北山破柳仲

禮於南岸皆乃所親見今日之事恐是天亡乃好守城我當復一決耳仰觀石闕逡巡歎息久之乃以皮囊盛二子挂馬鞍與其儀同田遷范希榮等百餘騎東奔王偉委臺城竄逸侯子鑒等奔廣陵王僧辯遣侯瑱率軍追景至晉陵劫太守徐承東奔吳郡進次嘉興趙伯超據錢塘拒之景退還吳郡達松江而侯瑒軍掩至景眾未陣皆舉幡乞降景不能制乃與腹心數十人單舸走推墮二子於水自漚瀆入海至壺豆洲前太子舍人羊鯤殺之送屍于王僧辯傳首西臺曝屍於建康市百姓爭取屠膾食焚骨揚灰曾羅其禍者乃以灰和酒飲之及景首至江陵世祖命梟之於市然後煮而漆之付武庫景長不滿七尺而眉目疎秀性猜忍好殺戮刑人或先斬手足割舌劓鼻經日方死曾於石頭立大春碓有犯法者皆擣殺之其慘虐如此自篡立後時著白紗帽而尚披青袍或以牙梳插髻牀上常設胡牀及筌蹄著靴垂脚踏坐或匹馬遊戲於宮內及華林園彈射鳥鳥謀臣王偉不許輕出於是鬱悒更成失志所居殿常有鸛鷓鳥鳴景惡之每使人窮山野討捕焉普通中童謠曰青絲白馬壽陽來後景果乘白馬兵皆青衣所乘馬每戰將勝輒躡躡嘶鳴意氣駿逸其奔剄必低頭不前初中大同中高祖嘗夜夢中原牧守皆以地來降舉朝稱慶寤甚悅之巨見中書舍人朱异說所夢异曰此豈宇內方一天道前見其徵乎高祖曰吾爲人少夢昨夜感此良足慰懷及太清二年景果歸附高祖欣然自悅謂與神通乃議納之而意猶未決會夜

出視事至武德閣獨言我家國猶若金甌無一傷缺今便受地詎是事宜脫致紛紜非可悔也朱昇接聲而對曰聖明御宇上應蒼玄北土遺黎誰不慕仰爲無機會未達其心今侯景據河南十餘州分魏土之半輸誠送款遠歸聖朝豈非天誘其衷人獎其計原心審事殊有可嘉今若拒而不容恐絕後來之望此誠易見願陛下無疑高祖深納異言又信前夢乃定議納景及貞陽覆敗邊鎮恒擾高祖固已憂之曰吾今段如此勿作晉家事乎先是丹陽陶弘景隱於華陽山博學多識嘗爲詩曰夷甫任散誕平叔坐談空不意昭陽殿化作單于宮大同末人士競談玄理不習武事至是景果居昭陽殿天監中有釋寶誌曰掘尾狗子自發狂當死未死嚙人傷須臾之間自滅亡起自汝陰死三湘又曰山家小兒果攘臂太極殿前作虎視掘尾狗子山家小兒皆猴狀景遂覆陷都邑毒害皇室大同大醫令朱耽嘗直禁省無何夜夢犬羊各一在御坐覺而惡之告人曰犬羊者非佳物也今據御坐將有變乎既而天子蒙塵景登正殿焉及景將敗有僧通道人者意性若狂飲酒噉肉不異凡等世間遊行已數十載姓名鄉里人莫能知初言隱伏久乃方驗人並呼爲闍黎景甚信敬之景嘗於後堂與其徒共射時僧通在坐奪景弓射景陽山大呼云得奴已景後又宴集其黨又召僧通僧通取肉搵鹽以進景問曰好不景答所恨太鹹僧通曰不鹹則爛臭果以鹹封其屍王偉陳留人少有才學景之表啟書檄皆其所製景既得志規摹奪皆偉之謀及

囚送江陵烹於市百姓有遭其毒者並割炙食之

史臣曰夫道不恒夷運無常泰斯則窮通有數盛衰相襲時屯陽九蓋在茲焉若乃侯景小豎叛換本國
讖不周身勇非出類而王偉爲其謀主成此姦慝驅率醜徒陵江直濟長戟強弩淪覆宮闕禍纏宸極毒
徧黎元肆其恣睢之心成其篡盜之禍嗚呼國之將亡必降妖孽雖曰人事抑乃天時昔夷羿亂夏犬戎
厄周漢則莽卓流災晉則敦玄構禍方之羯賊有逾其酷悲夫

編修臣人龍

謹言唐貞觀三年詔姚思廉與魏徵同撰梁書思廉史官姚察子推其父意復採謝

吳等所記以成是書徵惟裁其總論編次筆削則皆出於思廉蓋書成於一手業紹乎一家述作之

盛與李百藥父子輝映一時亦猶史記之有彪固褚亮謂其苦志精勤洵不虛矣舊

唐書經籍志及思廉本傳俱云五十卷新書則云五十六卷與今本合蓋嘉祐以來鈔版目次然也

臣等奉

勅校刊深愧學殖淺陋謹將南史與本文詳加叅校辨其訛舛條其同異錄爲考證以附卷末云臣謹識